

# Nrpakxmrlz Kx Yr Jon Natq Ngr Nzaplxtqngr Mz Nrpakxmrlz Kx Yr Jon

Aposol Jon yrle buk lc. X nzrpilr kx yrle mrkc Efiszs, mz mzlir yiz 85—90 AD mz nibr nzrmcngr mz Jiszs. Nide ***ncblo ne Jiszs kc tqmrlzti-zlwzle***, ✧ x mzlede Jemes kc tqngi kz aposol. Nidr mrlxng Sebedi x Salome. X mz nzvz-nqblq-krde Jon 19:25, kzdung leplz nzrpilr kx lxedr nide kz ile Mxri, kc tqngi lxe Jiszs. Drtwr ngrde kx Jon nide kave kr Jiszs, (da kc tqwai-kzle Jon Kxawrkxtr). Mz nibr nzvzdzkr Jiszs Heven, Jon aclvele lrmakxtr mrkc Jerusalem ✧ nidr badr Pita x Jemes mzle Jiszs. X aclve-kzle Mxri, lxe Jiszs mz nibr nzbzkr Jiszs. ✧ Nzrpilr kx Jon sc tqvzpe taon kc Efiszs mz nzmnc-krde elr, mz yiz 67 AD. Mz nibr kzdung mzli, doa lr gzpman ngr Rom nzayrplapxlr nide mz nzadwatr-krdr nide mz presin mz trmctu Patmos, mz nzmnc-krde esz'-krde elr. ✧ Yr kz Jon letz scde kcng tq x buk ngr Nzaelwapxngr, mz nibr Nrpakxmrlz lc. Mzli kc tqngipe-ngrde lrtzlvz, sc tqbzpe.

Nrpakxmrlz kcng pwx nzbletipx-lxblrng mz kxmu nzaelwapx-krmlr Jiszs bagu. Murde Matiu okatrlle nigu nzkriz-krqu kx Jiszs nide Mevalu x King. Mz buk sc Mak, Jiszs nide Kxnzawz ne

---

✧ : 13:23   ✧ : Galesia 2:9   ✧ : 19:25-27   ✧ : Nzaelwapxngr 1:9

Gct. Mz buk sc Luk, Jiszs nide Mrlx Leplz. X mz buk sc Jon nide Mrlx Gct. Jon tryrleu nqvi lr Jiszs, murde nide Mrlx Gct. Lr Jiu nzkrzlz-angidrlr kx ncblo kx ngi mrlx Gct nzrsakrlrng ncd. Buk sc Jon bletxpx-zlwzbx mz Nrpakxmrlz kcng tq, murde pile da kxmyapxbzng mz nzlukr Jiszs mz nzaelwapx-lzbq-krbzle mz leplz. Mz Jon 20:30-31 rpile kx, "Da kxmatq kxkqlu kx ale-kzp Jiszs bagr. A' da lcdeng tryrowxu mz buk lc. A' yro-ngrne krlcng, murde nalxngiti-kzamu kx Jiszs nide Kxnmcp, Mrlx Gct. X mz nzlxngiti-krmu nide, narmcti-kzamu nzlungr angidr kxmrna." Buk lc tuo-ngrde rxx rtqmx x nzymne-ebzpxngr rlimz x natq Jiszs nzlvqn kc tzaelwapx-ngrdr nzngini-angidr-krde Mrlx Gct.

### **Rkx Rtqmx**

Jiszs alrtipxle lue mz waen. [2:1-12]

Jiszs angyale nzatrkatigr Mangr-nzangiongr Yawe. [2:13-22]

Jiszs amrlzle nrkrdrdq ncblo kx mncm rlr. [4:43-54]

Jiszs amrlzle ncblo kx nrkrdrdqde bz mz zbq ngr Sabat. [5:2-16]

Jiszs apule ncblo siu-nzlvqn dakxznzng. [6:1-15]

Jiszs vzneom mz lue ngr Dxbu Gzlili. [6:16-21]

Jiszs amrlzle ncblo kc mzte tqmwi pnz mzli kc tzmcngr mzte. [9:1-41]

Jiszs atulz-ngrmle Lasarus mz nzbz-krde. [11:1-44]

### **Nzymne-ebzpxngr Rlimz Mz Nzrpikr Jiszs Kx, "Ninge."**

Ninge dakxznzng ngr nzlungr. [6:35, 48]

Ninge zyylr ngr lr nrlc. [8:12; 9:5]

Ninge naonrx kc tzvzkitr leplz mz nzkrlz-  
krbzlr Gct. [10:7, 9]

Ninge kxacive angidr sip nengeng. [10:11, 14]

Ninge kc tqatulz-mopwc' leplz mz nzbz-krdr  
x ninge kc tqka-kzpo badr nzlungr kxmrna.  
[11:25]

Ninge lrpzki, da angidr x nzlungr. [14:6]

Ninge angidr nounc. [15:1-5]

### **Natq Esz'mz Kx Nzaelwapx-kz-ngrdr Kx Jiszs Nide Gct**

Ninge kape (Kxnmcpx). [4:25-26; 13:19]

Ninge Ningepe. [8:24, 28]

Ninge (Yawe). [8:58]

Da zpwxtx, nigr ncdr Trtenge da kxesz'. [10:30;  
14:9; 17:21]

Mrnyzng Heven. [17:5, 11, 24]

Aposol Jon rpile kx Jiszs nide Gct. [1:1, 34;  
20:28]

#### *Jiszs Nide Kxrpalz*

<sup>1</sup> Jiszs nide Natq Gct. X Natq lc mncpe mzli  
kc nrlc trnzvzka-ngrde. X Natq lc nzmnc-pnzng  
ncdr Gct, x ni-kzde Gct. ✧

<sup>2</sup> Nzmnc-pnzng ncdr Gct mzli kc tqyzutrngr  
nrlc.

<sup>3</sup> Natq lc wz-ngrde da amrlx mz nzvz-nqblq-  
krde me pnz drtwr Gct. X trpnzng dalr nrlc kx  
mnctxpx-ngrde mz nzwzng.

<sup>4</sup> Natq lc ngi nou nzlungr kxboi, x apule  
zyzlr kc tqaelwapx-ngrbzle nzalvztrngr angidr  
mz kxmu nzarlaxkr Gct leplz.

✧ 1:1 Nou 1:1; 15:1, 4; 1 Samwel 3:7, 21; 15:10; 1 King 12:22; 1 Be  
Ngrdr 17:3; 22:8; 2 Be Ngrdr 11:2; Sam 33:6; Asaea 38:4; Jeremaea  
1:4; 1 Jon 1:1

<sup>5</sup> X zyzlr ngr nzalvztrngr angidr lc pnamilxtile nabz leplz keng tzmnczbzng mz zmatq ngr alwx x nzbzng. A' rblxbz mz zmatq kxtrka lcng nzamz-krdr zyzlr lc.

<sup>6</sup> Atwzlr-ngrm Gct kzdq profet mz leplz nedeng lr Jiu. X krlcde Jon Kxawrkxtr. ✧

<sup>7</sup> Vzm mz nzyapwxtipx-krde Zyzlr kc tqngi Jiszs, murde leplz amrlx nalxngitilr nide.

<sup>8</sup> Jon Kxawrkxtr trnginipleu Zyzlr lc tqatwzlr-ngrm Gct. A' vztx-ngrple nayapwxtipxbzle Zyzlr lcde mz leplz.

<sup>9</sup> Jiszs ni-angidrde Zyzlr kc navzm mz nrlc. X mz nzvz-krmle, sc tqayzlrpe-ngrbzle nabz leplz amrlx.

<sup>10</sup> Mrlx lc tqngi Natq vzm x mnc mz nrlc ngr alwx. X kxmule-esz' wz-ngrde nrlc, a' lr nrlc trnzglxlr nide.

<sup>11</sup> X vzm bagr, nigr lr Jiu keng tzngi lr mrnyzde, a' lr mrnyzdeng kxnzkqlung nzpxtpx-ngrdr nide. \*

<sup>12</sup> A' kzdung nigr nzabrtzlvzlr nide x nzlxngitilr nide. X atubqtibzle mz leplz lcdeng lrpzki r nzngini-krdr doa ne Gct, murde nalxngitilr nzarlapx-krde nidr.

<sup>13</sup> Doa ne Gct lcng nzmika mz nzrmikangr kxmrna mz drtwr Gct esz'-krde. Nzrmikangr lc

---

✧ **1:6** Matiu 3:1; Mak 1:4; Luk 3:1-2      \* **1:11** Aposol Jon kc tqyrle Nrpakxmrlz lc, nide kzdq lr Jiu, x sc tqvz-nqblq-kaile Jon Kxawrkxtr, x Jiszs kc ate. A' trsutiu drtwrde nzglqpx-lzbq-krde mz nzpipx-zvz-krde drtqde. A' mz nztekqtrngr natqdeng mz Natqgu, takitrde nzryrngr *ninge* x *nigr*; murde nakrlzku kx tqnginide kc tqycmne mz buk lc.

trvzpxpuu mz nzrmcti-lzbqkr trte ncd r lxe, o mz nelz lxe, o mz nqvi lr melrmqdr.

<sup>14</sup> Natq Gct lc ngi doa ne leplz, x mnckr badr. X aelwapx-ngrmle bagr nzalvztrngr angidr x zmrlz ngr Gct kxmyalz. X nigr aposol mcpekr nzmyalz-krde, mz nzngini-krde Mrlx Gct kc esz'txu.

<sup>15</sup> Mzli kc Natq lc tqmncpe-ngrde, Jon Kx-awrkxtr sc tqyapwxtipxpele nide. Rpi bzle mz leplz, mz nate kxetu kx, "Murde mzli kc ena tqrpi-ngrbo kx, 'Vz-kaipc' a' ncblo kc navzm mz nibrnge, myaszlzle ninge, murde mnc pnz kai mz ninge.' X mrlx lc sc tqvz pem."

<sup>16</sup> X sc tqamrlz-ebir-ngrde nigu mz zmrlz ngrde kxmyalz, mz nizrka-krmle da kxmrlzting kxkqlu bagu.

<sup>17</sup> Murde Gct kamle bagr Loukxtr scde mz Mosis. A' da kx myapx-esz'ngr, nizrka-krmle bagu zmrlz ngrde kxmyalz x nzangidati-krde da mz Jisz Kxnmcp x.

<sup>18</sup> Trgalr kx rmc Gct mz mzte, a' ngi txpwz Mrlxde kc esz'txu, kc tqpq zlwz mz nabz Trtede, x aelwapx-ngrmle Trtede bagu.

### *Nzycmnekr Jon Kxawrkxtr*

*Matiu 3:1-12; Mak 1:1-8; Luk 3:1-18*

<sup>19</sup> Mzli lcde, Jon Kxawrkxtr mnc mz nrlar LueJodzn kc tqprkilzm nepi mz nzawrkxtr-krde leplz. Kzdq zbq kxnzetu r lr Jiu kcng mzteadau Jerusalem nzaveamlr kcng pris x ncblo ngr nqvi lr Livae mz Jon. Nzrpibzlr kx, "?Nim ncblo kznike?" †

---

† **1:19** Mc nqvi lr Livae mz Nzalvztr-ngrng Kxmyapxbz.

20 X Jon Kxawrkxtr trpokiapwzu, a' pi-angidrbzle badr kx, "Trnginipwc'u KxnzmcpX, Mevalu kc navzm."

21 Nzvea-mopwzng, nzrpibzlr kx, "?E nim neke? ?Nim Profet Elaeja?" Rpi-mopwzle kx, "Trtingr, trnginipwc'u nide." Nzrpi-mopwzlr kx, "? E nim Profet kc tqapule Mosis?" Rpi-kzpzle kx, "Trtingr." ☆

22 Nzrpi-mopwzlr kx, "Pim bagr ncblo kxnginim, murde napi-mopwzkr mz ncblo kcnq tzaveamlr nigr bam. ?Nike nzwz-krm?"

23 Zbz sc tqayzlu-mopwz Jon badr mz nzymnekr profet Asea. Rpibzle kx, "Ncblo kc tqngininge nide sele. *Natq kzdq ncblo kx natqde etu mz nzryapwx-krbzle mz leplz lzke. Natq lcde rpile kx, 'Oliqtiamu nabzmu mz nzvz-krm Kxetu Gct. Atubqtibzmu lrpzki kx nangi nyzde na-apule nzoliqtikr leplz kzdq lrpzki kx navzkim king.'*" ☆

24 Kzdung ncblo kcnq nzatwzlr-ngrmqng kxnzetu r lr Jiu nznginidr dzbe Farzsi.

25 Farzsi lcnq nzrpibzlr mz Jon kx, "Rpiq kx trnginipqu KxnzmcpX, x Elaeja, x profet kc tqapule Mosis. ?Kx tqmule lcde, myx me twzkime zmatq ngrm mz nzawrkxtr-krm leplz?"

26 Rpibz Jon kx, "Awrkxtrtxpwo leplz mz lue, mz nzoliqtingr nabzdr mz nzvz-krm KxnzmcpX. X nide la tqmncpebz bamu, a' trglxkalamu nide.

27 Sa navzm mz nibrnge, x nide ncblo kxmatq-esz'ngr x ninge ncblo txne. Mz nzmu-krde lcde, trtakitr-kzpwu nzyokaepX-krbo nqvi lr sadol scde."

28 Da lcong nzalelr mz nrlar LueJodzn kc tqprk-ilm nepi, yc-aepztrpz mz mztea Betzni kzble mrkc tqawrkxtrngr Jon. ‡

### *Jiszs Nide Nei Sip Ne Gct Kc Tqrkatx Alwx*

29 X mz z bq kzble, Jon Kxawrkxtr mcle nzvz-krm Jiszs bade. Sc tqrpipemle kx, “Nei Sip kc nangi blz kx naka-nrbalqm Gct, dela tqvzm. Sa nakatxde alwx ngr leplz ngr nrlc!

30 X krlc tqycmnetr-ngrne mz nzrpi-krnge kx, ‘Vz-kaipc’, a’ ncblo kc navzm mz nibnge, myaszle ninge, murde mnc pnz kai mz ninge.’

31 Mzli kc kai trglx-angidrwxu mrlx lc. A’ kc tqvz-ngrmc tqawrkxtr-ngrne mz lue, murde naaelwapx-ngrbz nide mz lr Israel.

32-33 Gct kc tqatwzlr-ngrmle ninge kx naawrkxtrx leplz mz lue, rpimle bange kx, ‘Sa namcq nzvzo-krm Mqngrkxtr mz nzwxbuokrmle mz kzdq ncblo. Krlc ncblo kx naawrkxtr mz Mqngrkxtr.’ A’ trglwxu kx Jiszs Kxnzmcpx nide ncblo lcde, vz-krlzbzle mzli kx mc-angidrngrne nzvzo-krm Mqngrkxtr bade, mz nrkrdrtg kx apule nran, x wxbuom bade.

34 X mcpep da lcdeng, x napibo bamu kx ncblo lc tqwxbuo-ngrmle, ni-angidrde Mrlx Gct.”

### *Ncblo Neng Jiszs Kcng Kai*

35 X nrlcngrlxobz Jon Kxawrkxtr badr kzdu nigr nzling kx ngi oblamzdeng, nzmnc-moung mrlcde.

---

‡ 1:28 Trngiu Betzni kc tqyc-aepztrpz mz Jerusalem.

<sup>36</sup> Mzli lcde kx mc Jon Kxawrkxtr nzvz-krm Jiszs, sc tqrpipemle bagr kx, “Nei Sip ne Gct, dela tqvzm.” §

<sup>37</sup> Kx xlrzbzkr nzycmne-krde, sc tqma-nqblqpekr Jiszs.

<sup>38</sup> Zbz Jiszs lxlvrkimle mq, sc tqmcpele nzvz-nqblq-krgr nide. X sc tqrpipemle kx, “?Nike tqrtangrtiamu?” Rpibzkr kx, “?Kxakrlz, myx me mnc-ngrn?”

<sup>39</sup> Rpm Jiszs bagr kx, “Vzmamu x mc-kzamu mz mzpu.” Vzkr badr x sc tqmcpekr mrkc tqmnc-ngrde. Nzmnc-krgr badr abzo mz nabz nepi kc tqpwx krlzbzle mz nina.

<sup>40-41</sup> Kzdg nigr drtqde Adru, tulzm x vztx-pnzbz mz mzlede, Saemon Pita. Sc tqrpipembzle bade kx, “Rmctipekr Kxnmcpkx kc tqaenzliku!”

<sup>42</sup> X mzli kcpwz Adru sc tqvzmipemle mzlede Saemon mz Jiszs. Kx mc Jiszs Saemon, sc tqrpipembzle kx, “Nim Saemon mrlx Jon. Sa nangi drtqm Sifzs.” (Drtq lc dekcpwz tqngi Pita kc drtwr ngrde *rplz.*)

### *Jiszs Badr Filip X Natziel*

<sup>43</sup> Nrlc kx ngrlxo-mopwzle, Jiszs sc tqaotipe drtwrde nzvz-krde Gzlili Provins, x sc tqvzpekr badr. Kx vzbzkr kc, sc tqrmctipele Filip, x sc tqrpipembzle bade kx, “Vz-nqblqm ninge!”

<sup>44</sup> Filip lc nide ncblo ngr Betsaeda, taon nyz Adru ncd r Pita.

---

§ **1:36** Aposol Jon nangi kzdq nidr ncblo nzling, murde namncpeng badr mz nzycmne-daliti-krde nzqlekr Jiszs ncblo nedeng mz ngalrde kcng 36-51 x mz nzrylzngr mztea Kena mz dckrlzde kc li.



<sup>45</sup> X Filip vz x rmctile Natzniel, sc tqrpipebze bade kx, “Rmctipekr Kxnzmcpx kc tqyro Mosis mz Buk ngr Loukxtr x tzyr-kzlr profet. Ncblo lcde drtqde Jiszs, mrlx Josip ngr mztea Naszret.”

<sup>46</sup> A' rpibz Natzniel kx, “?Elr, nzmu Naszret mztea lc tqtopwzne naprpx-ngrm da kxmrlz?” Rpibz Filip kx, “Eu, a' vzm x mc kz mz mzpq.”

<sup>47</sup> Kx mc Jiszs Natzniel mzli kc tqvz-ngrmle, sc tqycmnetrpe-ngrde mz nzrpi-krde kx, “Ncblo lc nide kx takitrde nzrpi-ngrbz lr Jiu ngr Israel, murde rblxbz bade nzpokia-krde.”

<sup>48</sup> Natzniel kc tqveapebz, rpibzle kx, “?Myx kxmu nzkrlez-krm ninge?” Rpibz Jiszs kx, “Mzli kc trkqleka-ngrpz Filip nim, sc tqmcbo nim mrkc tqwxbulz-ngrn mz nou nc fiki kc.”

<sup>49</sup> Rpibz Natzniel kx, “Kxakrlz, mz nzmc-kai-krm la ninge, krlzx kx nim Mrlx Gct, King r Israel.”

<sup>50</sup> Rpibz Jiszs kx, “?Myx kxmule, lxngiti-ngrn ninge nzpi-krbo bam nzmc-krnge nim mzli kc tqwxbulz-ngrn mz nou nc fiki kc? Krlc da kxtpwz. A' sa namcq kalr da kxetuting kx namyaszpxlr da lc.

<sup>51</sup> Da angidrtx lc napibo bamu. Sa namc-kzamu nzlvxtpxkr Heven, x enjrl neng Gct sa nao-zliomlr x nao-zlilzlr ninge, mz nzngini-krnge Mrlx Lepz Kxnzmcpx, da kc tqwai nzmc-pnzkr Jekop mz nzrmwible-krde.” ☆

## 2

### *Nzyrlzngr Mztea Kena*

<sup>1</sup> Zbq otx li mz nzymne-krbz Jiszs mz Natzniel, x kzdq nzyrlzng r sc tzttrngztipebz Kena, kzdq mztea mrkc Gzlili Provins. Lxe Jiszs mncpe kai mz mztea lcde tzyrlzng.

<sup>2</sup> Zbz Jiszs x nigr ncblo nedeng keng tqmcpx-peleng, nzaveati kz nigr mz nzyrlzng lc, x sc tqvzpekr.

<sup>3</sup> X mz nibrde, sc tqmulvzpekr nzyrlzng lc. Zbz waen kc tqmnqkr kx yrkrle kc, sc tqrpipebz lxe Jiszs bade kx, "Waen keng tzmng yrkrpe. ? Nzmu mrlz nztangr-krgr mou waen kzble?"

<sup>4</sup> Rpibz Jiszs bade kx, "Lxe, mzli ka trtakitrpleu nzpi-krme bange mrla tqaoti drtwrm, murde trkrlzkapzle mzli r nzaelwapx-lzbq-krnge."

<sup>5</sup> Mz nzm-krde lcde, sc tqrpipebz lxedez mz kztedr keng tzokatrng kx, "Mrlzpe. Da kznike pibzle bamu, rtrngztibzmu."

<sup>6</sup> X wxbu elr belue esz'mz kx nzwzng r mz rplz. Belue lcng nangi dalr nzyrcpq-krgr mqgr x kzdung kz da mz nzvz-nqblq-krgr Loukxtr scgr. Belue lcdeng mz nzyrbu-krdr takitr lxblr lita kx trtqki-esz' (100).

<sup>7</sup> Sc tqrpipebz Jiszs mz leplz keng tzokatrng kx, "Ngilatramu belue lcng." Nzngilatrlr x nzyrbu-lxblrng amrlx.

<sup>8</sup> Sc tqrpipebzle badr kx, "Angqpxamu du lue mz belue lcng x twzbzmu mz mrlx kc tqaclvele nzyrlzng lc." X nztwzbzlr bade.

<sup>9</sup> X sc tqabztrpele lue kc tqrlrtipxle waen. Waen lc nzkrlz leplz keng tzokatrng, a' trkrlzu mrlx lc, me nztwzkimle. X mz nzkctipx-krdele x nzabrtzlvz-krdele, sc tqkqlepele ncblo kc tqyrlz.

<sup>10</sup> X sc tqrpipeline bade kx, “Mz nqm̄ ngr nzyrlznḡr, waen kxm̄rlz kc namn̄q kai. X mzli kc naesapxp̄nḡr drtwr ncblo, waen kx trm̄rlzne-zpwxu kc tztwz-mop. A' nim ayzlu-alzuq, x waen kx m̄rlz-esz'ngr yrlq̄txpxq krlzm̄le mzli ka, x sc tqkapx-ateq.”

<sup>11</sup> Jiszs alele rkx lc ayrnr̄nḡr mztea Kena mz Gzlili Provins. Rkx lc aelwapx-ngrde nzmyalz-krde. Nigr ncblo nedeng m̄ckr x lxngit̄kr nide.  
\*

<sup>12</sup> Mz nibrde, Jiszs, lxede, mzledeng x nigr ncblo nedeng, vzo-lxblrkr am̄rlx ngr̄gr mz taon Kzpz̄nizm, x mnct̄kr kcng z̄bq m̄rlcde. ✧

*Jiszs Angyale Nzatr̄katingr Mangr-nzangionḡr Yawe*

*Matu 21:12-17; Mak 11:15-17; Luk 19:45-46*

<sup>13</sup> Mzli lc z̄bq kxetu scgr nigr lr Jiu, kc tz̄rpibz Nzamyangr, ȳcpe pipz nzkaputr-krm̄le, x nigr badr Jiszs sc tq̄vz̄dz̄pekr mzteadau Jerusalem mz nzakaputr-krm̄grle. ✧

<sup>14</sup> Kx vztr Jiszs kc makoa ngr Mangr-nzangionḡr Yawe, sc tq̄mc̄pele leplz nzamwati-krdr kzu, sip, x kio kx nangi blz. X mc-kzle ncblo kxnzr̄tekq̄tr̄nḡ trau r m̄rkz̄ble mz trau r Mangr-nzangionḡr, sc tz̄wx̄bulz̄nḡ mz tebol.

<sup>15</sup> Zbz sc tq̄alepele kc nq̄vi kx nangi bz, tq̄maneup̄x̄peleng ncblo lcng am̄rlx badr sip

---

\* **2:11** Mz nzym̄nekr Jon, da kcng tq̄mat̄q̄ tq̄ale Jiszs nz̄rpibz “rkx.” Murde p̄pile nakrlzku n̄ike drtwr ngr̄dr; a' tr̄ngi-t̄xp̄wzu nzwz̄nḡr esz'-krdr. X rkx lcng nzaelwapx-ngr̄dr nqm̄ kr Jiszs x nzokatr̄lr nzrlxngit̄kr leplz nedeng. ✧ **2:12** Matu 4:13 ✧ **2:13** Nzrlasz̄nḡr 12:1-27

x kzu nedrng, mrkc tzyrlwrtr-ngrbzlr Mangr-nzangiongr. X alznngubzle tebol nyz mrlx kcng tztetekqtrng trau. X trau scdr rlxtxbzle.

16 X rpi-kzpzle mz ncblo kcng tzamwang kio kx, "Twzamu kio lcng x vznamu. Bzq ma nyz Trtenge apusr-ngrnamule me nzamwangr da."

17 Da lc tqalele sc tqadcpxpemle drtwrgr nzrpikr Nzryrngrkxtr kx, "*Mz nzpq-zlwzkr nzaotikr drtwrnge Mangr-nzangiongr nim, apusr-ngrde ninge da kx nzangc mz nyr x yrkrto.*" ✧

18 Zbz kxnzetu r lr Jiu nyzylu-mopqng bade, nzrpibzlr kx, "Myx r kx kx na-aleme bagr kx na-aelwapx-ngrde nzrngisc-krm zmatq ngr Gct mz nzale-krm da lc?"

19 Rpibz Jiszsz kx, "Awxtxoamu Mangr-nzangiongr lc, x kxmrna kc natekqtr-ngrbole, na-atulz-mou-ngrnele zbq natqtxu." ✧

20 Nzrpibzlr kx, "Elr! ?Nzmu atulz-mowq mz zbq kxtqtxu? Mangr-nzangiongr lc nzwzti-ngrde yiz nznpu-pwx-nrade-esz'mz (46)!"

21 A' trnzkrzlzru kx ycmnetr-ngrde Mangr-nzangiongr kc tqngi nrkrdrtdqde.

22 Mz nibr kzdung yiz, mzli kc tqtulzpe-ngr-mople mz nzbz-krde mz zbq kratq, sc tqdcpx ate mz drtwrgr kx pi-pnz-kaile da lc. X sc tqlxngiti-atekr Nzryrngrkxtr kc tqycmnetr-pnz-ngrde na-atulz-mou-ngrm Jiszsz. X lxngiti-kzkr

nzymnetrkr Jiszs lc, mz nide esz'-krde. †

### *Jiszs Krlzle Nabz Leplz Amrlx*

<sup>23</sup> Mzli lc tqmncngr Jiszs Jerusalem mz Namyangr, leplz nzklung nzrlxngititx-ngrpwzlr nzmckrdr rlx kcng tqaleleng.

<sup>24</sup> A' Jiszs esz'-krde, trabru drtwrde nzrlxngitkrdr, murde krlzpele nqm q kr leplz amrlx.

<sup>25</sup> X trpnzng kx narpi-mopwz bade nqm q kr leplz, murde nide esz'-krde kc tqobqplxe nabzdr mz nzteqtr-lzbq-krdr zvz.

## 3

### *Nikodimzs Nzryapwxng Ncdr Jiszs*

<sup>1</sup> Kzdq Farzsi kx prtr mz Kansrl kx acleve Loukxtr scgr, nigr lr Jiu, drtqde Nikodimzs. ✨

<sup>2</sup> Kzdq nrlckxbq vzm mz Jiszs mz nzymnetrkrdr mz nzmncz-ngrbz mz Gct mz nznigini-krde King. X sc tqrppebzle bade kx, "Kxakrlz, krlzkr kx nim kxalvztr kx atwzlr-ngrm Gct. Murde trpnzng leplz kx rkrlz nzalengr rlx lcng tqaleq, a' ngi txpwz ncblo kx mncbz Gct bade mz nzokatr-krdele."

<sup>3</sup> Ayzlu-ngrbz Jiszs natqde kx, "Da angidrtx lc napibo bam. Trpnzng leplz kx namnczlbz mz Gct mz nznigini-krde King rde, a' ngi txpwz doa kx namika kai mz nzmikangr kxmrna."

---

† **2:22** Mz Nrpakxmrlz kcng tzyrng Matiu, Mak, x Luk, be ngr *Jiszs Angyale Nzatrkatigr Mangr-nzangiongr Yawe* kaputr mzli kc naykrpxpe-ngrbz nzlu kr Jiszs. A' mz Nrpakxmrlz kc tqyr Jon, be lc kaputr mzli kc tqabzo-ngrde nzwz-krde. Leplz trnzkrzlru nzale-krde da lc nzwrde esz' o li. ✨ **3:1** Jon 7:50-51; 19:39

4 Rpibz Nikodimzs kx, “?Mzte namc mou, rpiq? ?Nzmu ncblo kxetupe mzte nzmc mou? ? Nzmu krlzle nzprtr-krde mou mz nelz lxede, x sc tzmikape mz nzwrde krali?”

5 Rpi-mopwz Jiszs bade kx, “Da angidrtx lc napibo bam. Trpnzngr kx namnclzbz mz Gct mz nznngini-krde King rde, nzmu trnamika-kaileu mz lue x Mqngrkxtr.

6 Murde nrkrdrdq leplz mikapxle nrkrdrdq, a' Mqngrkxtr mikapxle mqngr.

7 Bzkq kctipxq nzpi-krbo bam ncblo namika kai mz nzmikangr kxmna.

8 Na-aoti drtwrm nzwqkr nenq. Se tqxlrq nzwq-krde, a' trkrlzwq mrkc tqwqkipxmle x mrkc nawqkitrle. Kxmu-kzle lc mz nzwzkr Mqngrkxtr. Se tqmcq nzwz-krde mz leplz kcng tzprtrng mz nzmikangr kxmna. A' trkrlzwq da kx alele x mzli r nzale-krdele.” \*

9 Rpi-mopwz Nikodimzs kx, “?Nzmu trmu-pnzleu la tqpiq?”

10 Rpibz Jiszs bade kx, “?Myx kxmule, alvztrq lr Jiu ngr Israel, a' se trkrlzwq da lcng?”

11 Da angidrtx lc napibo bam. Pibo bam da kx krlz-angidrx x mcx mz mzke', a' trpnzngr nimu lr Jiu kx suti drtwrde nzlxngiti-krde natqng.

12 Mzli kc tqyapwxti-ngrbo bamu dalr nrle, trlxngitiwamuu ninge. ?Mz nzmu-krde lcde, myx kxnamu nalxngiti-ngrnamu ninge kalr, mz nzyapwxtr-krbo dalr Heven?

---

\* **3:8** 3:3 Mz natq lr Grik, nzmikangr kxmna drtwr ngrde nzrmc-moungr mz x nzmikangr wq. 3:8 Mz natq lr Grik, nenq drtwr ngrde *nenq* x *mqngr*.

13 Trgalr leplz kx vzdz x krlzlezle Heven x krlz-angidrle dalr Heven, a' ninge txpwz, Mrlx Leplz kc tqrlaszomle Heven x vzom mz nrlc.

14-15 X krlzku kx Mosis, mzli kc tzmnc-ngrdr lzke, tqglqlz-ngrde ningidoe kc tqngi bras mz nounc, murde leplz nalung. ☆ X mz nqm̄q lcpwz, Mrlx Leplz sa naglqlz kz nide mz kros, murde krkcng tzlxngitilr nide narmctilr nzlungr kxboi.”

†

16 Da zpwx. Gct atwzlr-ngrmle Mrlxde kc esz'txu murde nzmrlzti-zlwzle lr nrlc. Murde krkcng tzlxngitilr mrlxde trtxpnzngr nzbz-alo-krdr, a' sa narmctilr nzlungr kxboi.

17 Tratwzlr-ngrpū Gct Mrlxde mz nrlc mz nzayrplapx-krde lr nrlc, a' mz nzarlapx-krde nidr mz nzayrplapxngr mz alwx.

18 Delc, krkcng tzlxngitilr nide trpnzngr nazarplapxngr nidr. A' krkcng trnzlxngitilru nide, nzmncpeng mz nzayrplapxngr lc, murde trnzlxngitilru Mrlx Gct kc esz'txu.

19 Nzayrplapxngr lc vzpxm mz nzatwzlr-krm Gct mrlxde mz lr nrlc mz nzaelwapx-krde da angidr badr. A' nzp̄txpx-ngrdr nzalvztr-krdeng, mz nzmrlzba-krdr alwx, murde nzale-zvzlr da kxtrka.

20 Krkcng amrlx tzaleng da kxtrka, nztrka badr da angidr. X trnzlxngitilru da angidr, murde trsutiū drtwrdr nzaxtx-krdr da kxtrka kcng t̄zrtrngztibzlr.

21 A' krkc tq̄rtrngzbz da kxtubq, vz-nq̄blqle

---

☆ 3:14-15 Nz̄kqlū-krdr 21:4-9 † 3:14-15 Kzdu kxn̄z̄etung, mz drtwrdr n̄z̄ym̄nekr j̄isz̄ lc krlz̄bzle ngalrde kc 21. X k̄z̄dung kz kxn̄z̄etung, n̄z̄rpilr kx yr̄krpx mz ngalrde kc 15.

da angidr, murde na-aelwapx-ngrde kx da lcong tqaletile nzvzpxmqng mz Gct.

*Jiszs Ycmnetr-moungr Jon Kxawrkxtr*

<sup>22</sup> Mz nibrde, nigr badr Jiszs, sc tqvzpekr mz Judiz Provins. Mnctikr badr kzdung mzli mrlcde mz nzawrkxtrngr leplz.

<sup>23-24</sup> Mzli lc Jon sc tqaotr ncte nzawrkxtrngr, murde tradwatrka Herot Antipas mz presin. ✧ Awrkxtr mrkc vaulz Aenon, yc-aepztrpz mztea Salim, murde mrlcde ycng r vaulz kxkqlu. X leplz nzvzbzng mrlcde mz nzawrkxtrkr Jon nidr.

<sup>25</sup> Kzdg zbg oblamzng Jon nztalwz-ngrdr badr kzdq lr Jiu mz namrlzu r nzrycpqng da mz Lou sc Mosis.

<sup>26</sup> Mz nibrde nzvzng, sc tzrpipebzlr mz Jon kx, “Kxakrlz, ncblo kc tqmncamu ncd r mz nqlvi r LueJodzn kc tqyctxo, x tqycmnetr-ngrn, mzli ka sc tqawrkxtrpe kz. X leplz kxkqlu sc tzyrkrxpep-wzng bade.”

<sup>27</sup> Rpibz Jon kx, “Trpnzng ncblo kx nartrngzbx da lcdeng mz nide esz'-krde, a' nzkaomqng Gct Heven. X kxmu-kzle la mz nide.

<sup>28</sup> Xlrpeamu nzrpi-krbo kx trnipwc'u Kxnm-cpx. A' ninge ncblo kx atwzlr-kai-ngrm Gct kx naoliqtixbo leplz mz nzvz-krmle. ✧

<sup>29</sup> “Na-aoti drtwrmu nzyrlzng. Murde mz nzyrlzng olvz vz txpwz mz ncblo kc nayrlztile nide. X mrlx kzte ncblo lc, prtr mz nzalal-krm drtwrdr. Delc, tqabrtzlvz-ngrne nide. ✧ Murde nide Ncblo kc Tqyrlz x ninge mrlx kztede. Mrlz

✧ **3:23-24** Matiu 14:3; Mak 6:17; Luk 3:19-20 ✧ **3:28** Jon 1:20

✧ **3:29** Jon 15:11; 17:13



leplz kxkqlu nzyrkr-krmlr bade mz nzapu-krdr olvz rde.

<sup>30</sup> Nzmlrue-krde naetunelz zvz, x ninge navz-neo alzu." ‡

<sup>31</sup> Nigu kcng tzmika mz nrlc, nigu dalr nrlc x ycmnpx-ngrpwzku dalr nrlc. A' Jiszs kc tqvzom wq Heven, nide kc tqmyaszlze leplz amrlx.

<sup>32</sup> X pipxbzle mz leplz da kx mcleng x da kx xrleng, a' trpnzng r x rxngitibz natqde.

<sup>33</sup> A' krkcng tzlzngitilr nide, nzkrzlzr kx natq Gct ngi da angidr.

<sup>34</sup> X mrlx kc tqatwzlr-ngrm Gct, pipxle natq Gct murde Gct ka-zvzbzle Mqngrkxtr bade.

<sup>35</sup> Trte mrlztile Mrlxde, x aprcbzle bade zmatq ngr nzaclve-krde doa x da amrlx. ☆

<sup>36</sup> Krkcng tzlzngitilr Mrlx Gct, narmctilr nzlungr kxboi. A' krkcng tzpxtpx-ngrdr nide, trtxpnzng nzmcti-krdr nzlungr lc. A' zngya ngr drtwr Gct yctr-zvzbz badr.

## 4

### *Jiszs X Kzdaq Olvz Lr Szmariz*

<sup>1</sup> Dzbe Farzsi nzxlrlr kx leplz kx awrkx-trpeng Jiszs x nzvz-nqblqlr nide, nzkqlu-krdr nzmyaszpxpelr oblazng Jon.

<sup>2</sup> Jiszs esz'-krde trawrkxtru leplz, a' nginigr txpwz kx nzaleng.

<sup>3</sup> Zbz nigr badr Jiszs rkalzmgr Judiz Provins, x sc tqvzdzpe-moukr Gzlili Provins. Murde krlzpe Jiszs nzxlrlr Farzsi nzawrkxtr-krgr.

---

‡ **3:30** Kzdu leplz mz drtwrdr nzymnekr Jon Kxawrkxtr lc krlzbzle ngalrde 36. ☆ **3:35** Matiu 11:27; Luk 10:22

4 Mz nzvz-nqblqkr Jiszs me pnz drtwr Gct, o-zlikr lrpzki kc tqtavautr Szmariz Provins mz nzvzdz-krgr Gzlili.

5 Vdzkr x krlzbzkr kzdq mztea ngr Szmariz drtqde Sika. Mztea lc esotrpz mz nardzng kc tqka-pnzbz Jekop mz mrlxde Josip mzli kc bqnc.

☆  
6 Mrlc dekc tqycngr lrpao nyz Jekop. X drtq Jiszs kx tapele kc mz nzvz-krmle mzli kc bea, sc tqwxbuope mz nrlar lrpao lc mz nzama-krde.

7-8 X nigr ncblo nedeng, sc tqvzpekr mz mztea, mz nzxpe-krgr dakxnzng. Mzli kc tqvzpe-ngrgr, vzm kc olvz lr Szmariz kx na-avoo lue. Sc tqrpipebz Jiszs bade kx, “Kam du mqnge lue la.”

9 A' rpibz olvz kc kx, “?Elr, nim lr Jiu x ninge lr Szmariz, memule tqrlx-ngrme bange lue?” Krlc tqycmne-ngrbzle lc, murde lr Jiu nzngangr-ngrdr lr Szmariz. ☆

10 Rpibz Jiszs kx, “Trkrlzwq da kx nakaom Gct, x trglxwq ninge lc tqrlxbz bam lue kxpipz. Nzmu naglxq ninge, narlxme bange lue, murde nakabo bam lue ngr nzlungr.” ☆

11 Mz drtwr olvz lc, ycmnetrngr Jiszs lue kxvo, x sc tqrpipebzle kx, “Kxetu, lrpao lc vzola x trpnzng scm bepao kx naveclz-ngrme lue. ? Lue kc tqpiq narkabz nzlungr mz leplz, natwzme drlve?

12 Lrpao lc, trtegu Jekop kc tqrkam bagu, x nzmnlr badr doa nedeng x sip nedeng. ?Myx kxmule, nim kx myapxbz mz nide? ?X lue kc nakabzme mz leplz myaszpxle lue lc?”

---

☆ 4:5 Nou 33:19; Josua 24:32 ☆ 4:9 Esra 4:1-5 ☆ 4:10 Jeremaea 2:13; 17:13

13 Rpibz Jiszs bade kx, “Lue lc, kxmule-esz' nzrmnqngr nzwrde kqlu, a' drtwr leplz kc tqbr-lxkz mou.

14 A' doa kx narmnq lue kc nakabo, trtxpengr nzbrlxkzkr drtwrde. Murde lue kc nakabo bade na-apulzmle mz nabzde lue kxvaulz kx etunepx x nakabzle bade nzlungr kxboi.”

15 Rpibz olvz kc kx, “Kxetu, kam bange lue la tqpiq. Murde namnqx x drtwrnge bzkq brlxkz mou, x bzkq vo-zvzmc lue mrka.”

16 Zbz Jiszs sc tqaelwa-lzbqpe-ngrbz bade murde naokatrpzle nide. X sc tqrpipebzle bade kx, “Vz, oti menalzm x vzmim mrka.”

17 Rpibz olvz kc kx, “Trpnzng r menalznge mzli ka.” Rpibz Jiszs bade kx, “Eu, da zpwx la tqpiq, kx trpnzng r menalzm.

18 Murde yrlztipeq ncblo nzlvqn, a' krkc tqmwimiq mzli ka trngiu menalzm. X da angidr la tqpime.”

19 Rpibz olvz kc kx, “Kxetu, krlztrpebo kx nim profet ne Gct, murde Gct txpwz kx rkrlz nzaelwa-ngrbz bam kxmu nzmnc-krnge.

20 Mzli kc bqnc kxnzetu rgrng, nigr lr Szmariz, nzabzlr nzangioo-krmlr Gct mz Mangr-nzangiongr nyzgr, mrka mz Newz Gerisim. A' nimu lr Jiu rpiamu kx takitxtrpwzde nzangiongr mz Mangr-nzangiongr nyzmu mrkc Jerusalem. ?Mz nzm-krde lcde, neke mz nigu kx ngi da angidr?”

21-22 Rpi-mopwz Jiszs bade kx, “Olvz lc e, napi-zpwxbo bam, x lxngiti ninge. Nimu lr Szmariz angioamu Gct kx trkrlzwamuu. A' nigr lr Jiu angiokr Gct kx krlz-angidrkr. Murde mcpw Gct

nigr mz nzaelwapx-krde kx sa na-arlapxle leplz. Mzli lc navztrp trpengr nzangioo-krmamu Trte mz newz lc, x wai-kzle Jerusalem. A' leplz ne Gct sa na-angiopelr nide drlve keng nzmnc-ngrdr.

<sup>23</sup> A' kxmule-esz', mzli kc tzpi navzm, deka tqkaputrpem. Murde mzli ka leplz na-angiopelr Gct mz nabzdr. X na-angioldr mz zmatq ngr Mqngrkxtr mz nzvz-nqblq-krdr da kxtubq. X leplz kxnmulr lcng, dekc tqrtangrting Gct mz nzangio-krdr nide.

<sup>24</sup> Murde trnipleu leplz kx namcku, a' nide Mqngr. Mz nzmu-krde lcde, nzangiongr nide navdzdm mz nabz kxtubq mz nzokatrkr Mqn-grkxtr."

<sup>25</sup> Rpibz olvz kc kx, "Krlzx kx Kxnmcpz, kc tzipibz Kraes, sa navzm. X mzli kc navz-ngrmle, sa nayokaetipxmle bagr da amrlx."

<sup>26</sup> Rpibz Jiszsz bade kx, "Ninge kape."

### *Nzrvzmi-ngrm Leplz Mz Gct Apule Nzrkqlzngr Nrlanc*

<sup>27</sup> Mzli lcpwz nigr ncblo nedeng sc tqyzlupemgr mz mztea Sika. X kctitpxkr nzmc-krgr Kxetu rgr nzymne-krdr ncdz olvz lr Szmariz. Murde kxakrlz kx apule Jiszsz nzrpwa'-ngrbz bade nzymnemi-krde olvz. A' trpnzngr nigr kx rpibzle mz olvz kc kx, "?Nike suti drtwrm?" X trpnz-kzngr kx rpibzle mz Kxetu rgr kx, "?Memule tqycmnemi-ngrn olvz lc?"

<sup>28-29</sup> Zbz olvz kc rlaszle belue mqde, sc tqyzlupe mztea. Kx krlzbzle kc mztea, sc tqrpipebzle mz lr mztea kx, "Doa lcng, vzmamu ena. Rmctix kc lr narnrlc kx yapwxtimle da amrlx

kcng tqrtrngztibo. ?Trnipleu Kxnmcpx kc tzpi navzm?”

<sup>30</sup> Zbz sc tzkalzpemqng mztea, mz nzrmctilzbq-krdr badr Jiszs.

<sup>31</sup> Mz nibr nzvzkr olvz kc, sc tqrpipebzk bade kx, “Ei Kxakrlz, mutx ena dakxnzng lcng tqtwzmgr.”

<sup>32</sup> Rpm Jiszs bagr kx, “Dakxnzng nange sa tqyc, a' trmcwamuu.”

<sup>33</sup> X sc tqrpi-etrpekr kx, “?Myx kxmule? ? Rtwzpem dq nade dakxnzng?”

<sup>34</sup> Rpm Jiszs kx, “Dakxnzng nange ngi nzalekrnge me pnz drtwr Gct kc tqatwzlr-ngrmle ninge, x nzaykrpx-krnge nzwzng lc.

<sup>35</sup> Na-aoti ena drtwrmu nrlanc. Murde kzdq nzymne-krmu rpile kx, ‘Ycbep la temz pwx x leplz kc tqrkqlzpe.’ A' mz nzrkqtilz-krqu leplz, traenzlikuu mzli kxboi. Murde mzbq ka pex rtq mz nabz leplz kcng tzxlrlr natqngc, x nzapulr nzbrpekr dalr nrlanc, kx narkqtilzpep mz nzvzmi-krbo nidr mz Trtenge.

<sup>36</sup> Nzrvzmi-ngrbz leplz bade apule nzrkqlzng dalr nrlanc. Mrlx kc tqrkqlz, nzxpepe mz nzrtwzkrde dalr nrlanc. Murde nrade yc zvz mz nzokatr-krde leplz mz nzprtr-krdr mz nzlungr kxboi. X mz nzmu-krde lcde, mrlx kc tqpe x mrlx kc tqrkqlz nzabrtzlvzlr doa kx rmctile nzlungr kxboi.

<sup>37</sup> X nzymnengr kc tqrpile kx, ‘Kzdung ncblo nzli: kxpe x kxrqqlz,’ sc tqtutrpe. Murde mrlx kc tqpe apule mrlx kc tqrpipx-kaipz mz leplz nrpa ngr Gct. X mrlx kc tqrkqlz apule mrlx kc tqrvmibz leplz bade.

38 Mz nzmukrde lcde, atwzlrpe-ngrbo nimu mz nrlanc kc tqngi nrlc ka. Trkxputrwamuu elr mz nzpengr. A' nzpeti doa kzbleng, mz nzrpiplx-krbzlr mz leplz nrpa ngr Gct. X prtxtrpwzmu mz nzrkqtilzngr da kx prpxm mz nzwz-krdr, murde narvzmimamu leplz mz Gct.”

### *Lr Szmariz Kxnzkqlung Nzlxngitilr Jiszs*

39-40 Leplz ngr mztea lcde nzlxngitilr Jiszs mz nzxlr-krdr natq olvz kc. X sc tzlc-amnqpelr nigr mz nzmnc-krgr badr mou kxpipz. X mnctikr badr z bq li.

41 Jiszs kx ryapwxbzle kc badr, leplz nzkqlumoung kx nzlxngiti-kzlr kx nide Kxnzmcpx.

42 Delc tizrpi-ngrbzlr mz olvz kc kx, “Mzli ka lxngitipekr kx nide Mevalu ngr lr nrlc murde mcangidrpekr x xlr-angidrpe-kzkr. A' trngi-txpwzu nzymne-krme bagr.”

### *Jiszs Amrlzle Mrlx Kz dq Kxrmailz*

43 Mz nibr z bq kcng li tqmnctikr Szmariz Provins, nigr badr Jiszs rkalzmgr, sc tqvzpekr Gzlili, mz provins nyzde.

44 Kxmule-esz' Jiszs traleleu r kx kxmatq, a' lr Szmariz nzlxngitilr nide. X mzli kcpwz Jiszs krlz-kzle kx narblxbz mz lr mrnyzdeng nzlxngiti-krdr nide, murde r pile kx, “Profet amrlx trnzamrlueu lr mrnyzdr.” ☆

45 Mzli kc tqkaputr-ngrmgr Gzlili, lr mrlcde nzabrtzlvzlr nide. Murde nzvz-kzng mz Nzamyangr Jerusalem, x nzmclr da amrlx kcng

☆ 4:44 Jon 1:11; Matiu 13:57; Mak 6:4; Luk 4:24

tqalepele, myapxbz mz nzngyatikr drtwrde nza-trkatingr Mangr-nzangiongr Yawe. ✧

<sup>46</sup> Mzli lcde, nigr badr Jiszs krlz-mopwzkr Kena, mztea ngr nzyrtzngr mrkc tqale-pnz-ngrde lue kc tqrlrtipxle waen. X kzdq ncblo kxrmailz mz gzpman mnc mz taon Kzpznmizm. X mrlxde kxtopwz yagoxtx zlwz mz ma nyzde. ✧

<sup>47</sup> Kx xlrle nzrkalz-krm Jiszs Judiz Provins mz nzvzdz-krde Kena, sc tqvzpem tqpipebzle mz Jiszs kx navzong ncdr Kzpznmizm. Murde namrlzbzle mrlxde kc tqycpe pipz nzbz-krde.

<sup>48</sup> Rpibz Jiszs bade kx, "Trpzngr nimu kx lxngitile ninge, a' krlc tqrlxngiti-ngrnamu nzmckrmu rxx kcng tqalex."

<sup>49</sup> A' rpibz trte doa kc kx, "Kxetu, vz-anim, murde doa nenge ma tqbz."

<sup>50</sup> Zbz sc tqrpipebz Jiszs kx, "Vzpe ye ma nyzm, mrlxm mrlzpe." Trte doa kc lxngitibzle natq Jiszs, x sc tqvzpe mz ma nyzde.

<sup>51</sup> Mz nourla, mzli kc tqvzobe-ngrbzle mz lrpzki, sc tqrmctipele kxnzawz-nrbalq nedeng. X nzrpibzlr kx, "Mrlxm tryagoxpeu, sc tqmnc-nrwxpengr."

<sup>52</sup> X sc tqveatipebzle mzli kx mrlz ngr drtq mrlxde. Nzrpibzlr kx, "Nzyagox-krde dwaszle nide bq, mzli kc mz nabz nepi kc tqesz'."

<sup>53</sup> X sc tqdcpxpe mz drtwr trtede kx krlc nabz nepi tqrpi-ngrbz Jiszs bade kx, "Mrlxm mrlzpe." X sc tqlxngitipele kx Jiszs nide Kxnmzcpx. Mz nzmu-krde lcde, kx nzkrzltilrle, nidr badr lr ma nyzde amrlx nzlxngitilr Jiszs.

<sup>54</sup> Krlc rkx krali mou kx ale Jiszs Gzlili. Da lc waile mzli kc tqyzlu-ngrmgr Judiz Provins.

## 5

### *Jiszs Amrlzle Kc Ncblo Mz Nqlvi R Kzdz Nabzde*

<sup>1</sup> Mz nibr kzdung mzli, nigr badr Jiszs sc tqvzdzpe-moukr Jerusalem, murde ycpe pipz nzakaputr-ngrm kzdq Nzmulvznggr kxetu, mz nzyrlwr-lxblr-krgr, nigr lr Jiu.

<sup>2</sup> Mz Jerusalem yc kc elr kzdq nabzde kx lrlz-ngrm lue, drtqde *Betesta* mz natq lr Jiu, x yc-aepztr mz kzdq naonrx kxetu ngr bz ngr mzteadau, drtqde *Naonrx Ngr Sip*. Mz nqlvi r nabzde lcde, tuo elr matelq pwx, x matelq kranzlvqn akipxle nabzde lc.

<sup>3</sup> Matelq lcng nzyrbqpx-ngrm leplz kxnzyagoxng kxnzkqlung. Kzdung kx mztr kcba, kxnzvz-tengineng, x kx nrkrdrtdr bz. [Lepz lcng tzaenzlilr nzyclwzkr lue.

<sup>4</sup> Murde kzdung mzli enjrl ne Gct nalvcom, x sc tqkapulzpem mz lue. Mzli kc tqyclwznggr lue, kxyagox kznike krlzo-kaile lue, drtqde kc tqmrlzpe.] \*

<sup>5</sup> Kzdq ncblo yrbq mrlcde, kx yagoxtiptele yiz nzpnu-tq-nrade-rtqmz (38) mz zyagox kx rblx nzvz-ani-krde.

<sup>6</sup> Jiszs kx krlzmle nabzde lcde, sc tqmcpele ncblo kc. Kx krlztrpebzle kc nzboinepe-krm nzyagox-krde, sc tqrppebz Jiszs bade kx, “?Suti drtwrm nzmrlz-mou-krm?”

---

\* 5:4 Kzdung nzryrkr Jon kcng pnz trnzyrlqtrpwzu mz ngalrde 3b-4.



<sup>7</sup> Rpibzle kx, “Eu Kxetu, a' trpnzngr leplz kx naglqobzle ninge mzli kc tzyclwzngnr lue. Murde mzli kc nangrlaneo-ngrbo, ncblo kzble kc tqdwa-kirpxpe-ngrde ninge, tqvzope kai mz lue.”

<sup>8</sup> Rpibz Jiszs bade kx, “Tulzm, glqlzm nqni mnrm x nim kc tqvzpeq.”

<sup>9</sup> X mzli kcpwz drtq ncblo kc sc tqmrlzpe. Glqlzmle nqni mnrmde x sc tqvzpe.

A' ncblo lc amrlz Jiszs mz Sabat.

<sup>10</sup> X kxnzetu r lr Jiu, kx nzmclr ncblo lc, sc tzipipebzlr bade kx, “?Ei, nila tqaleq? ?Trkrlzwq nzngikr Sabat koma? Nzwzngnr mz nzrglq-krm nqni mnrm apxngnr Lou sc Mosis.” ☆

<sup>11</sup> Rpibz ncblo kc badr kx, “Mrlx kc tqamrlzle ninge, pimle bange naglqlzmc nqni mnrmge, x navzx.”

<sup>12</sup> Nzrpi-mopwzlr kx, “? Neke rpibz bam nzglqlz-krm nqni mnrm x nim kc tqvzpeq?”

<sup>13</sup> A' trkrlz-pnzleu drtqde. X trmcpeleu krkc tqamrlzle nide, murde Jiszs amrbrtr-lzbqpe mz zbo ngr leplz.

<sup>14</sup> Mz nibrde, sc tqrmctipe mou Jiszs Mangr-nzangiongr, x tqrpipebzle bade kx, “Mzli ka mrlzpeq, a' bzkq rtrngzpebzme alwx, murde zyagox kxtrka zlwz ma tqdwati-mopwzle nim.”

<sup>15</sup> Kx krlzle kc drtq Jiszs, sc tqvzpe, tqpipebzle mz kxnzetu r lr Jiu kx, “Jiszs nide kc tqamrlzle ninge.”

<sup>16</sup> X sc tzngyatipe drtwrdr Jiszs, murde nzamrlz-krde ncblo kc mz Sabat.

---

☆ **5:10** Nzrlaszngnr 20:8-10; 31:14-15; 35:2-3; Livae 16:29-31; 23:3; Lou Kcpwz 5:12-14

<sup>17</sup> Kx krlztipebz Jiszs nzngyatikr drtwrdr nide, sc tqrpipebzle badr kx, “Trtenge tramau mz nzwz-krde, a' wz mz zbq kang kqlu. X vztr-kzpz mzbq ka kxmule-esz' ngi Sabat. X navz-nqblqpwo nide.”

<sup>18</sup> Nzycmnekr Jiszs lc trka mz drtwr kxnzetu r lr Jiu. X nzrpilr nanibqlr nide, murde xpqbrlr-ngrde lou ngr Sabat. X mou, rpile kx nide Mrlx Gct. X mz drtwrdr, rtulrtr-lzbq-ngrde nzrsakrlr-krdr ncd r Gct. X delc tqtakitr-ngrde nznibqngr nide.

### *Zmatq Kx Kabz Gct Mz Mrlxde Jiszs*

<sup>19</sup> X sc tqayzlupebz Jiszs mrkc tqpnz drtwrdr, mz nzrpi-krbzle badr kx, “Da angidr lc napibo bamu. Ninge mrlx Gct. X trpnzngr da kx nartrngztibo esz'-krnge. A' rtrngzbo da kx pwxlvztrpo mz Trtenge. Murde aletx-kzpo da kcpwz tqaleting Trtenge.

<sup>20</sup> Krlzx nzalengr da lcng murde Trtenge mrlztile ninge. X aelwa-kz-ngmle bange da amrlx kcng tqaletileng. X mz da kx na-alex, sa na-aelwapx-mou-ngrbzle r kx kxkqlu kxmyapxbzng, murde naktipxamu kalr.

<sup>21</sup> Ninge Mrlx Gct rkabo nzlungr mz doa kznike suti drtwrnge, da kc tqwai Trtenge nzatulz-kr-mople leplz kxnzbzng, x rkabz nzlungr badr.

<sup>22</sup> Murde trngiu Trtenge kc napile doa kx tubq o kx vz-rbr, da kc tqwai nzaotikr drtwrmu le. A' aprcpemle bange zmatq amrlx mz nzale-krnge da lc.

<sup>23</sup> Murde leplz amrlx na-amatqlr ninge da kc tqwai nzamatq-krdr Trtenge. A' krkcng

tzpxtxpx-ngrdr nzamatq-krdr ninge kc tqatwzlr-ngrmle, trnzamatq-kzlru Trtenge.

24 “Da angidrtx lc napibo bamu. Doa kx xlrle natqnge, x lxngitile Trtenge Gct, prtrpe mz nzlungr kxboi. X trpnzngr nzayrplapxngr nide. Murde sc tqprpxpem mz nzbzngr x tqprtrpe mz nzlungr kxmrna.

25 Mzli ka sc tqkrlzpebzle mzli kxmrna. Murde krkcng tzlxngitilr natqnge nzprtrpeng mz nzlungr kxmrna.

26 Ninge nou nzlungr, da kc tqwai Trtenge nznigini-krde nou nzlungr.

27 X ni-kzngc Mrlx Leplz. Delc, tqaprc-kz-ngrmle bange zmatq ngr nzayrplapxngr leplz mz alwx ngrdr.

28-29 Bzkq kctipxamu da lcng tqpibo bamu. Murde mzli lc navztrp, leplz amrlx kcng tzbzng sa naxlrlr natqnge, x sa na-atulz-mopqng mz gq ldrng. Mzli lcde, krkcng tzale-pnzng da kxmrlz, sa na-atulz-mopqng mz nzlungr kxboi. A' krkcng tzaleng da kxtrka, sa na-atulz-kzpqng mz nzayrplapx-alokr Gct nidr. ✧

30 “Trna-ayrplapxwxu leplz mz alwx ngrdr mz zmatq rnge, a' aletxpo da kcng tqpim Trtenge bange. X nzayzlu-krbo da mz leplz tubq x rsakrlrngr. Murde na-atutxtrpwo me pnz drtwr Gct, a' trngiu me pnz drtwrnga.”

### *Jiszs Aelwapx-ngrde Kx Nide Mrlx Gct*

31 Rpi-mopwz Jiszs kx, “Da kcng pwx nzaelwapx-ngrdr kx zmatq rnge vzpxm mz

---

✧ 5:28-29 Daniel 12:2

Gct. Nzmu nayapwxtitxpwo ninge mz leplz, trnzlxngitilru natqnge.

<sup>32</sup> “A’ Jon Kxawrkxtr tqycmnetr-kai-ngrde ninge. X takitrde nzlxngiti-krmu natqde, murde da kcnq tqycmnetr-ngrde ninge da zpwx.

<sup>33</sup> Murde mzli kc tqatwzlr-ngrbzmu ncblo nemu kcnq bade, pi-kzpwzle da angidr lc badr.  
✧

<sup>34-35</sup> X Jon lc apule nyzylrkr lam kc tqwou, mz nzaelwapx-krde nzalvztrngr angidr. X abrt-zlvzamu nzalvztr-krdeng mzli kx mrbcnepwz. X pipx-ngrbo nzymcne-krde bamu, murde nalxngitiamu x narmctiamu nzlungr kxmrna.

<sup>36</sup> “X nzwz-krngeng ngi da kralli kx aelwapx-kz-ngrde kx zmatq rnge vzpxm mz Gct. Murde da kcnq tqaletixng myaszpxle natq Jon. X delc trsutiu drtwrnge leplz nztu-krmlr mz nibrnge mz nzymcne-krbzlr ninge. Murde nzwzngr lcnq tqkam Trtenge bange nzaelwapx-ngrdr kx atwzlr-ngrmle ninge.

<sup>37</sup> “X natq Trtenge ngi da kratq kc tqycmnetr-kz-ngrde ninge. A’ trpnzngr nzxlr-krmu natqde x nzglx-krmu nide. ✧

<sup>38</sup> X trdcpxu mz drtwrmu natqde, murde trlxngitiwamuu ninge kc tqatwzlr-ngrmle.

<sup>39</sup> “X Nzryrngrkxtr ngi da krapwx kc tqycmnetr-kz-ngrde ninge. Rlwx-zvzamu murde mz drtwrmu narmctiamu nzlungr kxboi mz nzvz-nqblq-krmule. Eu, a’ Nzryrngrkxtr lcpwz dekc tqycmnetr-ngrde ninge.

---

✧ **5:33** Matiu 3:11-12; Mak 1:7-8; Luk 3:16-17; Jon 1:26-27, 29-34, 36 ✧ **5:37** Matiu 3:17; Mak 1:11; Luk 3:22

<sup>40</sup> A' se tqpxtpx-ngrnamu nzvz-krmamu bange, mz nzrka-krbo bamu nzlungr kxboi.

<sup>41</sup> "Trkxneu mz drtqng kx naglqpxamu ninge o trtingr.

<sup>42</sup> Murde krlzpex nabzmu, kx trmrlztiwamuu Gct.

<sup>43</sup> Kxmule-esz' vzmc mz zmatq ngr Trtenge, a' pxtpx-ngrnamu nzlxngiti-krmu ninge. A' lxngiti-aniamu leplz kcng tzvzmqng mz zmatq ngrdr esz'-krdr.

<sup>44</sup> Rblxbz bamu nzlxngiti-krmu ninge murde tr-rtangrtiwamuu nzglqpxkr Gct nimu. A' glqpx-lzbq-tpwzmu mz nimu esz'-krmu.

<sup>45</sup> "X trnginingeu kc narlwa-ngrbzle nimu mz da lcng mz mz Trtenge. A' Mosis kc tqrpi drtwrmu kx navdz-ngrnamu Heven mz nzyrlq-krmu Lou scde, nide kc narlwa-ngrde nimu.

<sup>46</sup> Rlwangr Mosis nimu, murde nzmu nalxn-gitiamu natqde, nalxngiti-kzamu ninge. Murde ninge kc tqycmnetr-ngrde.

<sup>47</sup> A' mz trnzlxngiti-krmuu nzryrkr Mosis, rblx-kzpz bamu nzrxngitingr natqngeng."

## 6

*Jiszs Apuleng Ncblo Siu-nzlvqn (5,000)*

*Matiu 14:13-21; Mak 6:30-44; Luk 9:10-17*

<sup>1</sup> Mz nibr kzdung mzli, nigr badr Jiszs prtzkr mz bot scgr, x sc tqalilvcopekr mz nrlarde kc Dxbu Gzlili. (Kzdg kz drtq dxbu lc Taebirizs.)

<sup>2-4</sup> Vzdzpekr badr mz kzdq nra x sc tqwxbuo-lxblrpekr me mnzpz' mz nzalvztr-krde nigr. Mzli lc ycpe pipz nzkaputr-krm nzyrlwr-lxblrkr lr Jiu,

kc tzipibz Nzamyangr. X leplz kxnzkqlung sc tzyrkr-nqblqpelr Jiszs, murde nzmcpke-krdr rxx ngr nzamrlz-krde leplz kxnzyagoxng.

<sup>5</sup> Kx mc Jiszs leplz kcng nzvz-krmlr bade, sc tqrpipebzle mz Filip kx, “?Myx me naxpe-ngrgu dakxnzng kx natakitrde zbo ngr leplz lc?”

<sup>6</sup> (Krlc tqkxmu nzymne-krbz Jiszs lc, murde na-abzle Filip mz nzkrzpe-krde nike nartrngztibzle.)

<sup>7</sup> Rpibz Filip kx, “Nzmu naxpeku dakxnzng, trau kxkqlu ela natwz, kx takitrde na-atatr-ngrm mz zbq kxtrtqki-li (200). Kxmule-esz' da pipzne lxblr kz badr, a' nzmu trnzyrkrpx-kz-ngrdru.”

<sup>8</sup> Zbz kzdq nigr, drtqde Adru, mzle Saemon Pita, rpibzle mz Jiszs kx,

<sup>9</sup> “Kzdq se doa ncblo kxtpwz mrlc twznede nade bret nzlvqn x nc kxtpwzne li. ?A' myx kxnamu nztakitr-krdr zbo ngr leplz lc?”

<sup>10</sup> Mrkc tqmnc-ngrmgr lvcngr nabr, sc tqrpipem Jiszs bagr kx, “Pibzmu mz leplz nawxbuong.” Zbz leplz kcng sc tzwxbuopeng. X me ycng nrlwxngr ncblo krlzbzle siu-nzlvqn (5,000), a' trnzrlwxtrpwzu olvz x doa kxnztopwzng.

<sup>11</sup> Jiszs kalzmle bret kcng, awitx-ngrbzle mz Gct, x sc tzakipebz mz leplz kcng tzwxbung. X waisr-kz-ngrde nc kcng. Nzmungr amrlx ngrdr x nelzdr krlc, murde batrpz Gct nzklunepxkr dakxnzng kcng.

<sup>12</sup> Leplz amrlx nelzdr kx krlc-lxblrpelr kc, sc tqrpipem Jiszs bagr kx, “Mikatiamu dakxnzng kcng tzmutrnggr leplz lcng. Trmrlzu nzwztx-krdr brmrda.”

13 Ata-lxblrtikr x nulvzokr topla nzpnu-esz'-nrade-li (12) mz nctq bret kx yctxong mz nzmukr leplz lcng.

14 Kx nzmclr rkx lc, leplz lcng sc tzrpipekr kx, "Zpwxtx, krlc Profet kc tqpi Gct navzm mz nrlc."

☆

15 X kx krlztipt Jiszs kx leplz sa nartulrtrpzlr nznngini-krde king, sc tqvzdzpe mou mz nra esz'-krde.

*Jiszs Vzneom Mz Lue Ngr Dxbu Gzlili*

*Matiu 14:22-33; Mak 6:45-52*

16 Nrlc kx milzpqtrpzle kc, sc tqvzopekr esz'-krgr mz Dxbu Gzlili.

17 Prtzkr mz bot scgr, sc tqalilvckipekr mz nrlar dxbu kc, murde nakrlzbzkr taon Kzpznm. Alilvckr, alilvckr x nrlc kc tqbqtxtrpe. A' Jiszs trkrlzkaple nigr.

18 Zbz nenq kc tqwqpe, x dcpwe kxtrka kc tqprtzipem. X sc tqavzopekr nqni scgr, murde nayapekr.

19 Sc tqyapekr, tqyapekr, x kx krlzpebzkr kc me tavau, sc tqmcppekr nzvz-krm kzdq ncblo mz lue. X kx esonetrple kc, sc tqmwxlz-zlwzpe-ngrgr nide.

20 A' krlc Jiszs. X rpimle bagr kx, "Ninge lc! Bzq mwxlramu!"

21 X sc tqabrtzlvzpekr, sc tqaprtzpekr nide mz bot. Zbz pwrkilvc-ngrgr, murde sc tqkrlzpepgr mepz mz taon kc na-alilvckitrkr.

*Jiszs Nide Dakxznng Ngr Nzlungr*

22-23 Nrlc kxngrlxobzle, zbo ngr leplz kcng tzyrlwrpe-moung mz nrlar dxbu. Kzdung bot ngr taon kxetu Taebirizs, sc tzdwa-aepztrpqng mrkc tzm-ngrdr. X sc tzaenzli-moulr Jiszs, murde nzkrzlzr kx alilvco-lxblrmgr badr bq. X amnctxkr Jiszs x sc tqyzluopekr mz bot Kzpnizm.

24 X mzli kc tzkrlzpe-ngrdr trnzmncpe-kru Jiszs, x wai-kzle nigr ncblo nedeng, sc tzprtzpeng mz bot kcng, x sc tzalilvcopeng Kzpnizm, tzrtan-  
grtipelr nide.

25 Kx nzkrlzobzlr kc Kzpnizm mz nrlar dxbu kc, sc tzmctipelr Jiszs, x nzrpibzlr bade kx, “?Ei, Kxakrlz, myx kxmu nzvz-krme mrka?”

26 X sc tqalvztrpeng Jiszs mz mangr-nzkrka'ngr. Rpibzle badr kx, “Da angidrtx lc napibo bamu. Kc tqrtangrti-ngrnamu ninge ye, murde nzmu-krmu x drtwrmu esatxpx. A' trvz-ngrpwa'muu murde krlzamu drtwr ngr rkx kc tqaelwapx-ngrbo bamu.

27 Bzkq aotxtrpwz drtwrmu nzvz-kato-krmu mz nrlc ka mz nzrtwz-krmamu dakxnzng kx namibi. A' na-aoti drtwrmu nzvz-kato-krmu, mz nzmcti-krmu dakxnzng kc narkabz bamu nzlungr kxboi. Dakxnzng lc nide kc nakabo bamu. Murde Gct aelwapx-angidr-ngrde kx aprcpemle zmatq ngrde bange.”

28 Zbz, sc tzveapebzng bade, nzrpibzlr kx, “? Nike nartrngztibzkr mz nzale-krgr nzvzkr Gct?”

29 Rpibz Jiszs badr kx, “Nzwzng kx suti drtwr Gct nartrngztibzmu nide sele. Lxngitiamu ninge kc tqatwzlr-ngrmle.”

30 A' nzrpibzlr kx, “?Rkx kznike na-aelwapx-ngrme bagr murde nalxngitigr kx vzpxme mz



Gct?

<sup>31</sup> ? Myx kxmule? ? Krlzq nzalengr rkx kcng tqale Mosis mzli kc melrmqgung tzmnc-ngrdr lzke, x nzmung dakxnzng kc tzipibz *mana*? Murde Nzryrngrkxtr rpile kx, 'Gct rkaom dakxnzng Heven kx nangqdr.' " ☆

<sup>32</sup> Rpibz Jiszs kx, "Da angidrtx lc napibo bamu. Dakxnzng kc tqkabz Trtenge ngi dakxnzng angidr kx vzom Heven. A' trngiu dakxnzng lc tqkabz Mosis.

<sup>33</sup> Murde dakxnzng angidr kc tqkapx Gct, tqvzom Heven mz nzrka-krbz nzlungr mz lr nrlc."

<sup>34</sup> Nzrpibzlr kx, "Kxetu, ka-zvzm bagr dakxnzng lc."

<sup>35</sup> Rpibz Jiszs badr kx, "Ninge dakxnzng ngr nzlungr. Doa kx vzm x lxngitile ninge trtxpengr nzbrtale-krde x nzbrlxkzkr drtwrde. Murde rkabo nzlungr kxmna mz nabz leplz.

<sup>36</sup> Kxmule-esz' mcpeamu mzke' a' trtxpnzng nrlxngiti-krmu kx vzpxmc mz Gct.

<sup>37</sup> Leplz amrlx kcng tqamnqtrp Trtenge bange, sa navzmqng bange. X krkcng tzvzmqng bange trtxpnzng nmaszlrpx-krngeleng. A' sa nabrtzlvzx nidr.

<sup>38</sup> Murde vzo-ngrmc Heven mz nzale-krnge me pnz drtwr Trtenge, a' trngiu da kx vzpxm mz drtwrnge esz'-krnge.

<sup>39</sup> X me pnz drtwr Trtenge nide sele. Leplz kcng tqamnqtrple bange, trtxpnzng nidr kx namrbpxm. A' na-acive-zpwxx nidr x na-atulz-mopwc'ng mz Mzli Kxmatq kc navzm.

☆ **6:31** Nzrlaszng 16:4, 15; Sam 78:24

<sup>40</sup> Dazpwxtx, Trtenge suti drtwrde kx krkcng amrlx tzlxngitilr ninge narmctilr nzlungr kxboi, x na-atulz-mopwc'ng mz Mzli lc Tqmatq."

*Kxnzetu R Lr Jiu Nzrpwa'-ngrdr Jiszs*

<sup>41</sup> Kx nzxlrzbz kxnzetu r lr Jiu nzymne-krde lc, drtwrdr sc tqlcpe. Murde rpi Jiszs kx, "Ninge dakxnzng kc tqvzom Heven."

<sup>42</sup> X sc tzrpipekr kx, "Jiszs xke, Mrlx Josip. X krlz-angidrku trtede x lxede. ?A' nike tqrpi-ngrde kx, 'Vzomc Heven?' "

<sup>43</sup> Rpibz Jiszs badr kx, "Bzkq drtwrmu lctrp mz natqngc lcng.

<sup>44</sup> Trpnzngr kx navtxnem bange, a' ngi txpwz kx vectrp Trtenge. X leplz kxnmulr lcng, sa na-atulz-mopwc'ng mz Mzli Kxmatq lc.

<sup>45</sup> Mzli kc bqnc, leplz kcng tzvzmqng mz Gct, kxmu nzyrkr profet le nide sele. Nzrpilr kx, 'Gct sa na-alvztrle leplz amrlx.' ✧ X mzli ka, krkcng naxlrlr nzalvztrkr Trtenge x nzlxcngitilr nide, sa navzmqng bange.

<sup>46</sup> Mz nzalvztrkr Gct leplz, trngiu drtwr ngrde kx leplz nzmcpelr Gct mz mztr. Trtingr, a' nginitxpo kx vzpxm bade x mc-txpwzle nide.

<sup>47</sup> Da angidrtx lc napibo bamu. Doa kx lxngitile ninge, rmctile nzlungr kxboi.

<sup>48</sup> Ninge dakxnzng ngr nzlungr.

<sup>49</sup> Mzli kc bqnc, melrmqgung tzmnc-ngrdr lzke, nzmung mana. X kxmule-esz' nzmung mana kc tqvzom wq, a' nzbzngr sa tqvz zvz.

<sup>50</sup> A' mzli ka, dakxnzng angidr kc tqvzom Heven blepxngr. Murde doa kx namu dakxnzng lcde, trtxpnzngr nzbz-krde.

<sup>51</sup> X ninge dakxnzng kxlu, kc tqvzom Heven. Doa kx ngqde dakxnzng lc, sa nalu-zvzpe. Murde dakxnzng lc ngi ncvrnge, x rlrpx-lzbq-ngrne mz nzalu-krnge lr nrlc."

<sup>52</sup> X lr Jiu keng drtwrdr kc tqtrkape. X sc tzrpipehr kx, "?Myx kxnamu, nzka-krm mrlx lc ncvr drtqde mz nzngq-krngule?"

<sup>53</sup> Zbz sc tqrpipebz Jiszs badr kx, "Da angidrtx lc napibo bamu. Ninge Mrlx Leplz. Nzmu trnangqwamuu ncvrnge x trnamnqwamuu mepyr rnge, trtxpnzngr nzlu-krmu.

<sup>54</sup> A' doa kx ngqde ncvrnge x mnqle mepyr rnge, rmctile nzlungr kxboi x sa na-atulz-mopwc' mz Mzli Kxmatq kc navzm.

<sup>55</sup> X sa nalu-mou, murde ncvr drtqnge ngi dakxnzng angidr, x mepyr rnge ngi da kx nzmng angidr.

<sup>56</sup> X doa kx ngqde ncvrnge x mnqle mepyr rnge, mncpxm bange x mncpebo bade.

<sup>57</sup> Trtenge kc tqatwzlr-ngrmle ninge, nide nou nzlungr. X ni-kznge nzlungr, murde vzpxmc bade. Mz nzmu-krde lcde, doa kx ngqde ncvr drtqnge, sa nalu murde ninge nzlungr.

<sup>58</sup> "Napi-mopwc' bamu kx ncvrnge ngi dakxnzng kx vzom Heven. Dakxnzng lc trapuleu mana kc tzngq melrmqgung lzke, x nzbzngr sa tqvz vz. A' doa kx namu dakxnzng angidr lc, rmctile nzlungr kxboi."

<sup>59</sup> Nzalvztrkr Jiszs lc, ycmne mz mangr-nzkrka'ngr mrkc Kzpnizm.

*Leplz Nzkqlung Nzvecpx-lzbqmqng Mz Jiszs*

<sup>60</sup> Kx nzxlr leplz kxnzvx-nqblqlr nide nzymne-krde lc, sc tzipelr kx, "Nzalvztrngr lc rblxm bagu. ?Myx kxnamu nzkrz-krgr natq lcng?"

<sup>61</sup> Krlzpe Jiszs kx drtwrdr lctrpz mz zalvztrngr lc. X sc tqpipebzle kx, "?Myx kxmule, natqngc lcng nzataolr nimu mz nzlmgiti-krmu ninge?"

<sup>62</sup> ?X nzmu namcamu ninge, nyzlulz-krnge Heven mrkc tqrkakilzmc, mzli kc tqvzo-ngrmc? ?Nike napnz drtwrmu mzli lcde?

<sup>63</sup> Murde natq kcng tqpibo bamu, nidr kcng tqrkabz nzlungr kc tqvzpxm mz Mqngkrxtr mz nabzmu. A' zmatq ngr leplz trtakitrde nzokatrngr nimu.

<sup>64-65</sup> A' kzdung nimu trnzlmgiti-angidrlru natqngc. Delc tqrpi-pnz-ngrbo bamu kx, 'Trpnzngc doa kx navztxnem bange, a' ngi txpwz kx rlr-ngrm x kam Trtengc.' " Jiszs kc tqkxmu nzymne-krde lc, murde krlz-pnz-kaile mz nzabzokr nzwx-krde, doa kx na-amwale nide x krkcng trnalmgitlru nide.

<sup>66</sup> Mzli lcde, leplz nzkqlung kx nzvecpx-lzbqpeng mz nzvx-nqblq-krdr nide.

*Ncblo Neng Jiszs Tzvx-nqblq-zvzpelr Nide*

<sup>67</sup> Sc tqrpipe-kzp Jiszs bagr, nigr ncblo kcng nzpnu-esz'-nrade-li (12) kx, "?Myx kxmule mz nimu, suti kz drtwrmu nzrlasz-krmu ninge?"

<sup>68</sup> A' rpibz Saemon Pita bade kx, "?Kxetu Lod, ncblo kznike navz-nqblq-moukr? Murde nim me vzkipxm natq ngr nzlungr.

69 X mzli ka lxngiti-angidrpekr kx nim Ncblo Kxtr kc esz'txu, tqatwzlr-ngrm Gct." ✨

70 Rpm Jiszs bagr kx, "Kxmule-esz' mcpxx nimu mz nzmncr-krmamu bange, a' kzdq nimu ngi kxnzawz ne Setzn."

71 Krlc tqycmnetr-ngrde Judzs, mrlx Saemon Iskariot, kc na-amwale nide.

## 7

### *Mzle Jiszs Trnzlxngitilru Nide*

1 Mz nibr kzdung mzli, nigr badr Jiszs sc tqoklatipekr mztea ngr Gzlili Provins. Trsutiu drtwrde nzvz-krde Judiz Provins, murde kxnzetu r lr Jiu nzrpilr nanibqlr nide.

2 Mzli lc nzyrlwr-lxblnrg kx tzrpibz Matelq ycpe pipz nzkaputr-krmle. ✨ \*

3 Zbz mzle Jiszs sc tzrpipebzlr bade kx, "Rlasz mrka x vzdz Judiz, murde leplz nemqng namc-kzpzlr rkx kcng tqaelwapx-ngrn.

4 Nzmu kx tqsutu drtwrm nzamatqng nim, bzkq ale-kapqq rkx kcng tqaleq, a' aelwapxngr mzlixl, murde nakrlzti lr nrlc amrlx."

5 Krlc tqkxmu nzymne-krdr lc, murde trnzlxngitikalr nide.

---

✨ **6:69** Matiu 16:16; Mak 8:29; Luk 9:20 ✨ **7:2** Livae 23:34;

Lou Kcpwz 16:13 \* **7:2** Mz nzyrlwr-lxblnrg lc mz Septembz o Oktobz, lr Jiu adcpz mz drtwrdr mzli kc melrmqdrng tzmncng mz matelq x tent mrkc lzke badr Mosis. Kxmule-esz' nzrnginyzdr ma, a' nzmncpxmqng mz matelq mz zbq rlimz. X mz zbq lcdeng nzrtwztrng lue x nzawoung kadol Mangr-nzangiongr Yawe. Murde yc mz drtwrdr nzrka-krbz Gct mqdr lue, x nzmailz-krde nidr mz nyr mrkc lzke.

<sup>6</sup> Sc tqrppebz Jiszs badr kx, “Mzli r nzvz-krnge mrla trkrlzkapzle. A' nimu mzli kx yctxp, sa tqtakitrde nimu.

<sup>7</sup> Lr nrlc trnzsutiu drtwrdr nzatrkatikrdr nimu, a' suti drtwrdr nzatrkatikrdr ninge, murde nzpi-zvz-krbo badr kx nqm q krdrng trka.

<sup>8</sup> Vdzamu esz'-krmu mz nzyrlwrngr lc, a' namnctxpwo murde mzli r nzvzdz-krnge mrla trkrlzkapzle.”

<sup>9</sup> Natq lcng pibz Jiszs badr, x sc tqm nctxpewz Gzlili.

### *Jiszs Alvztr-ngrde Lou Ngr Sabat*

<sup>10</sup> Mz nibr nzvzdzkr mzledeng Jerusalem, nigr badr Jiszs sc tqvzdz-kapqpebzkr. X traelwapx-lzbq-ngrpwzu me nzyrlwrpx-lxblngr, murde trsutika drtwrde nzkrlztingr nzvzdz-kz-krmle.

<sup>11</sup> Zbz kxnzetu r lr Jiu sc tzrtangrtipelr nide. X tzrpilr kx, “?Myxpe Jiszs?”

<sup>12</sup> Lepz nzkqlung kx nzymne-awang mz zbo ngr leplz kc. Kzdung nzrpilr kx, “Nide ncblo kxmrlz.” A' kzdu-kzng nzrpilr kx, “E trtingr! Murde mrlx la rmailz-rbr leplz kxnzkqlung.”

<sup>13</sup> Nzpi-awa-krdr lc Jiszs trnzplzpxlru, murde nzmwxlrtilr kxnzetu rgr.

<sup>14</sup> Kx krlzbzle kc vau r wiki lc, Jiszs vztr Mangr-nzangiong r sc tqalvztrpe elr.

<sup>15</sup> Kx nzxlrzbz kxnzetu r lr Jiu nzalvztrkrde nzkctitxpxlr, sc tzrpipelr kx, “Mrlx lc trsikluneu mz Lou scgu. ?A' myx me twzkimle da lcng tqpipxleng?”

16 Rpibz Jiszs badr kx, “Da lcng tqalvztr-ngrne trnzvzdzpqngqu mz drtwrnge. A' da lcng aelwan-grm Gct, kc tqatwzlr-ngrmle ninge.

17 Doa kx nartrngzbz me pnz drtwrde, sa nakrlzle kx nzalvztr-krnge vz-nqblq-zvzle me pnz drtwr Gct.

18 Murde doa kx ycmnetr-ngrde zmatq ngrde esz'-krde, suti drtwrde nzangiongr nide. A' doa kx yc mz drtwrde nzangiokr leplz Kxetu rde, ncblo kxmule lcde tubq x trpokiau.

19 Mosis rkabz bamu Loukxtr. A' trpnzngr nimu kx rvz-nqblq zvz natqdeng. X mz drtwrmu rpiamu kx xpqbrlr-ngrne Lou ngr Sabat. ?E delc tqrpi-ngrnamu nanibq-ngrnamu ninge?”

20 Nzrpibzlr leplz kx, “Eke, drka' la tqmncpxm bam. ?Neke rpile nanibqle nim?”

21-23 Rpibz Jiszs mz kxnzetu r lr Jiu kx, “Kzdzq mzli wzx mz Sabat mz nzamrlz-krnge ncblo. A' yrkelvzamu ninge. A' nimu wz-kzamu mz Sabat mzli kznikeng vz-nqblq-ngrnamu Lou sc Mosis, mz nzrpakrngr doa ncblo. (A' lou lc vz-pnz-kaip x lou sc Mosis kc ate.) Murde nzmu zbq ngr nzrpakrngr kx tqtaole mz Sabat, sc tqrtrngztipebzmu nzrpakrngr. X da lc tubq mz drtwrgu. ?A' memule tqngyatingr drtwrmu ninge, mz nzamrlz-atwrnr-krnge ncblo mz Sabat? ☆

24 Bzkg obqti-txpwzmu da kx yctrpz yz, a' nzaolvz-krmu da natutr mz da kxtubq.”

### *Me Vzkim Kxnmcpx*

☆ 7:21-23 Jon 5:1-9; Nou 17:10-13; Livae 12:3

<sup>25</sup> Kzdung lr Jerusalem nzrpilr kx, “Mwx ncblo lc tzpi kxnzetung kx nanibqlr.

<sup>26</sup> Rlr! A' se tqycmnetxpxpebz mz mz leplz kxnzkqlung x trpnzngr nidr kx ayzlubzle natqde. ?Myx kxmule, nzkrلزtrpebz kxnzetu rgung kx ni-angidrpede Kxnmcpx?

<sup>27</sup> A' trtingr. Murde krlzku kx mzli kc navz-ngrm Kxnmcpx trpnzngr kx narkrlz me navzkimle. A' mrlx lc krlzku mztea nyzde, dekc trnangini-ngrdeu Kxnmcpx.” Krlc tqkxmu nzymne-krdr lc, murde mz drtwrdr nzrpilr kx Jiszs mzte nzmc mztea Naszret.

<sup>28</sup> A' trnzkrلزlr kx mzte nzmc Betleem, mztea nyz Kxnmcpx, mz nzatutr-krde natq profet kcng bqnc. ✧ Mz nzmu-krde lcde, mz nzalvztrkr Jiszs kc Mangr-nzangiongr, nate plxtpxle mz nzrpi-krde kx, “Rpiamu kx krlzamu ninge x me vzkimc. A' trkrlzvamuu me vzkimc. Murde trvz-lzbqpw'c'u, a' atwzlr-ngrmle ninge Gct angidr. X trkrlz-kzvamuu nide.

<sup>29</sup> A' ninge kx rkrlz angidr nide, murde vzpxmc bade x atwzlr-ngrmle ninge.”

<sup>30</sup> Kzdung leplz kx nzxlrbzlr nzymne-krde lc, sc tzrpipebr nalolvzpelr murde rpile kx vzpxm mz Gct. A' trpnzngr kx kabzle mqde, murde trkrlzkapzle mzli r nznrbqngr nide.

<sup>31</sup> A' leplz kcng tzlxngitilr nide, sc tzrpipebr kx, “Mwx, nide Kxnmcpx kc tzpi navzm. Murde ale rkx kxkqlu.”

<sup>32</sup> Kx nzxlr kzdung Farzsi nzpi-awa-krdrle, sc tzaveatipebr kzdung pulis ngr Mangr-nzangiongr nzlolvz-krdr nide.



<sup>33</sup> A' mzli kc tzkaputr-ngrbz pulis lcdeng, nzlalztqzbng bade. X sc tqrpipebz Jiszs mz leplz lcng amrlx kx, "Mzli r nzmnc-krbo bamu trboipeu x ninge kc tqyzlupe-mopwc' mz Gct kc tqatwzlr-ngrmle ninge.

<sup>34</sup> Mzli lcde, sa nartangrtiamu ninge, a' trnam-cwamuu ninge. X trtxpnzngr nzvz-krbzmu mrkc namnc-ngrne."

<sup>35</sup> Sc tzipipe kxnzetu r lr Jiu kx, "?Mrlx lc navzkile drlve kc tqrpi-ngrde trpnzngr nzmc-krgru nide? ?Myx kxmule, navz mz kzdung kz nrlarnrlc kcng tqaclve kz King r Rom? ?X nalvztrle lr Jiu kcng tzmncng mrlcdeng x lr mrlcde kcng tzmnc-mrbrng?"

<sup>36</sup> Rpile kx sa nartangrtiku, a' trpnzngr nzmc-krgru nide. X trpnzngr nzklrz-krbzku mrkc namnc-ngrde. ?Nike tqkxmu nzycmne-krde ke?"

### *Jiszs Rka Lue Ngr Nzlungr*

<sup>37</sup> Mz milzpq ngr zbq krartqmz ngr Matelq, Jiszs tulzm Mangr-nzangiongr Yawe, sc tqetu-mipe natqde nzrpi-krde kx, "Doa kx drtwrde brlxkz navzm bange, murde narmnq lue ngr nzlungr kxmrna." †

<sup>38</sup> "Murde kxnzlxngitilr ninge sa na-atutrlr Nzryrngrkxtr kc tqrpile kx, 'Lue ngr nzlungr sa nangqtr-zvzbz mz nabz leplz.' " ☆

† **7:37** Mz zbq krartqmz lc, lr Jiu nzyzlupeng ma nyzdr, mz nzyckr drtwrdr nzprtr-krdr drtc' kc tqesalz-ngrbz Gct badr, tzipi-ngrbz Kenzn. A' trnzrtwztrung lue x trnzawou-kzung kadol Mangr-nzangiongr. Krlc zbq kx myapxbz x nzyrlwrngr kx ngi Matelq kc tqyrkrpxpe mz milzpq ngr zbq lc. [Livae 23:36]

☆ **7:38** Asaea 44:3; 55:1; Esikel 47:1-9; Sekaraea 14:8

<sup>39</sup> Lue ngr nzlungr lc, tqycmnetrngr Jiszs ngi Mqngrkxtr, kc nakabz mz leplz kcng nalxn-gitilr nide. A' mzli lc tqycmne-ngrde, Mqn-grkxtr trvztrkapz mz nabz leplz. Murde Jiszs trnzglqlzka.

<sup>40</sup> Kzdung leplz kx nzxlrbzlr nzymnekr Jiszs, sc tzrpiplr kx, "Mrlx lc ni-angidrde profet kc tqaenzliku, tqapule Mosis."

<sup>41-42</sup> X kzdung nzrpilr kx, "Eu, mrlx lc nide angidr Kxnmcpx ne Gct." A' kzdu-kzng nzrpilr kx, "Trtingr, Kxnmcpx nzmu trvzpxpuu Gzlili. Murde Nzryrngrkxtr rpilr Kxnmcpx navzpxm mz nqvi lr Devet x mzte namc Betleem, taon nyzde." ✧ Kc tqmu nzymne-krdr lc, murde trnzkrzlru kx Jiszs mzte nzmc Betleem, a' nzrpilr kx mzte nzmc Gzlili Provins.

<sup>43</sup> Zbz drtwrdr kc tresz'tipeu.

<sup>44</sup> Kzdung nzrpilr nalolvzlr nide, a' trpnzng kx kabzle mqde.

### *Kxnzetu R Lr Jiu Nzpctxpx-ngrdr Jiszs*

<sup>45</sup> Zbz pulis ngr Mangr-nzangiongr sc tzyzlu-pebznz esz'-krdr. X kxnzetu rdr kcng tzatwzlr-ngrdr nidr mz nzlolvz-krdr Jiszs, sc tzrpipebzlr badr kx, "?Memule tqvz-ngrmamu esz'-krmu?"

<sup>46</sup> A' mz nzmrlzkr badr natq Jiszs, nzrpibzlr kx, "Trgalr ncblo kx myaszpxle nzymne-krde."

<sup>47</sup> Nzrpi-mopwz Farzsi kx, "? Memule, angqngupe-kzle nimu x sc tqlxngitipe-kzamu nide?"

<sup>48</sup> ?Xlrpe-kzamu dq ena nigr kx lxngitile mrlx lc?

---

✧ 7:41-42 2 Samwel 7:12; Sam 89:4; Maekz 5:2

49 Trtingr. A' leplz lcng trnzkrzlru Lou scgu. X sa na-ayrplapx Gct leplz lcng.”

50-51 Zbz Nikodimzs, kc tqvzbz mz Jiszs mzli kc ena, rpibzle mz Farzsi kztedeng kx, “Mz nzvz-nqblq-angidr-krde Lou scgu, trtakitrpheu nzpi-krgru kx ncblo vz-rbr, a' nalalztq-kaipzku mz nzymne-krde.” ✨

52 Zbz kxnzetu kcng sc tzngyatipe drtwrdr nide. Nzrpibzlr bade kx, “?Memule, ni-kzp lr Gzlili? Na-aoti drtwrm Nzryrnrkxtr, murde rpile kx trpnzng profet kx naprxm Gzlili.” †

### *Olvz Kx Rmwimi Ncblo Kzble*

53 Kx yrkrpxbz nzymnekr Farzsi lc, sc tzaki-lzbqpeng, tzyzlupeng mz ma nyzdr.

## 8

1 A' Jiszs rkalzm Mangr-nzangiongr, x sc tqvzdzpekr badr mz Newz ngr Nc Olivi mz nzmwingr.

2 Zbz mzli kc mz nourla mz zbz krartqmz ngr Matelq, Jiszs yzlu mou Mangr-nzangiongr. Kx nzmc leplz nide, sc tzykrpe-mopwzng bade. X Jiszs wxbutxo x sc tqalvztrpele nidr.

3 Mzli lc krkeng tzalvztrng mz Lou sc Mosis x kzdung Farzsi nzvzmibzlr mz Jiszs kc kzdq olvz. Olvz lc yrlz a' rmwimi ncblo kzble.

4 Zbz sc tzrpipebzlr mz Jiszs kx, “Kxakrlz, olvz lc yrlz, a' nzmc nzmwimi-krde kzdq ncblo kzble.

---

✨ 7:50-51 Jon 3:1-2 † 7:52 Kzdung nzryrkr Jon kcng pnz trnzylqtrpwzu mz ngaldeng 7:53—8:11.

<sup>5</sup> Mz Lou scgu, Mosis kapxle natq kx olvz kxmule lc navaebq mz rplz. ?A' myx kxmu nzaotikr drtwrm le?" ✧

<sup>6</sup> Krlc tzymne-ngrbzlr lc bade nzrpilr natalzlr nide. Murde nzmu narpibz Jiszs kx navaebqlr olvz kc, xpqbrlr-ngrde lou sc gzpman ngr Rom. X nzmu narpibzle kx bzkq nzvaebqlr olvz kc, xpqbrlr-ngrde Lou sc Mosis. Mz nzmu-krde lcde, myx me ayzlukibz Jiszs le, nzkrzlzlr nzrlwangr nide mz lou kx xpqbrlr-ngrde.

A' Jiszs sc tqyrngzope mz drtc' tqryrpe mz nratoki r mqde.

<sup>7</sup> A' mzli kc tzvea-zvz-ngrbzlr bade, Jiszs yrng-zlzm, sc tqrpipebzle badr kx, "Mrlz, a' doa kx trpnzngr alwx ngrde kxes', nide kc navaebq-kaile olvz lc mz rplz."

<sup>8</sup> Zbz, yrngzo mou x ryr mou mz drtc'.

<sup>9</sup> X kx nzxlrzbz kxnzalvztrng mz Lou sc Mosis x Farzsi kcng nzymne-krde, drtwrdr trmrlzu. X sc tzdwapxpeng amrlx ngrdr yz, yzuo mz lrt-zlvz nzdwapx-krdr, vz vz nzyrkrtpxng. Murde nzkrzlzlr kx nidr amrlx ngrdr nzaleng alwx. Zbz Jiszs ncdr olvz kc tzvzmimlr, nzmnc-txpwzng mz mzlir zbo ngr leplz lcng.

<sup>10</sup> Jiszs yrngzlyz-mop, sc tqrpipebzle bade kx, "? Myxpe leplz kcng tzvzmimlr nim? ?Mncbe dq kx na-ayrplapxle nim?"

<sup>11</sup> Ayzlu-ngrbz olvz kc natqde kx, "Kxetu, trpengr kx mnc." X rpi-mopwz Jiszs kx, "X ninge, trna-ayrplapx-kzwXu nim. A' vzpe x bzkq alepeq alwx."

---

✧ **8:5** Livae 20:10; Lou Kcpwz 22:22-24

*Jiszs Nide Zyzlr Ngr Lr Nrlc*

<sup>12</sup> Jiszs rpi-mopwzle mz leplz kcng tzmncng Mangr-nzangiongr lc kx, “Ninge zyzlr ngr lr nrlc. Doa kx vz-nqblqmlc ninge tralepeu alwx, a' sa nalxngitile da angidr mz nzmcti-krde nzlungr kxmrna.” ☆

<sup>13</sup> A' nzrpibz Farzsi bade kx, “Rblxbz mz leplz nzlxngiti-krdr natqm. Murde da amrlx kcng tqpipxq ycmnetrtx-ngrpwzme nim esz'-krm, x trnzkrzlru kx da zpwx lc tqpiq o trtingr.” ☆

<sup>14</sup> Rpi-mopwz Jiszs kx, “Kxmule-esz' ycmnetr-ngrne ninge esz'-krnge, a' da lcng tqpixng da angidr. Murde, krlzx mrkc tqvzkimc x mrkc navzkix. A' trkrlzwamuu mrkc tqvzkimc x mrkc navzkix.

<sup>15</sup> Aolvzamu leplz mz nzvz-nqblq-krde drtwr ncblo. A' traolvzwxu leplz mz nzvz-nqblq-krde drtwr lc.

<sup>16</sup> A' nzayzlu-krbo da mz leplz tubq-esz'ngr. Murde trpipxwxu esz'-krnge, a' nigr ncdr Trtenge kc tqatwzlr-ngrmle ninge.

<sup>17</sup> Lou scmu rpile kx, ‘Nzmu ncblo kxnzling kx drtwrdr esz'ti, nalxngitiku natqdr.’ ☆

<sup>18</sup> Rpix kx natqngc da angidrng. X Trtenge kc tqtu-kzp mz nibrnge, rpi-kzle kx natqngc ngi da angidr kz. Mz nzmu-krde lcde, takitrde nzrlxngitingr natqgrng.”

<sup>19</sup> Nzrpibzlr kx, “?Myx Trtem kc tqpiq?” Rpi-zle kx, “Trkrlzwamuu Trtenge murde trkrlz-kzwamuu ninge. Nzmu nakrlzamu ninge, krlz-kzamu Trtenge.”

---

☆ **8:12** Asaea 9:2; Matiu 5:14; Jon 9:5    ☆ **8:13** Jon 5:31    ☆ **8:17** Lou Kcpwz 17:6; 19:15; Matiu 18:16

<sup>20</sup> Jiszsz pile natq lcnq mz nzalvztr-krde mz Mangr-nzangiongr, mrkc mz bokis kc tzyrlqongr trau. A' trpnzngr kx rlolvz nide, murde trkr-lzkapzle mzli r nznribqngr nide.

*Trpnzngr Farzsi Kxnavz Mrkc Navzki Jiszsz*

<sup>21</sup> Rpi-mopwz Jiszsz mz Farzsi kcng kx, "Ninge lc navzpex. X sa nartangrtiamu ninge, a' trtx-pnzngzr nzvz-krmamu mrkc navzkix. Murde mzli kc nabz-ngrnamu, alwx ngrmu trnaipqpxpwzu Trtenge."

<sup>22</sup> Sc tzipipe kxnzetu r lr Jiu kx, "Rpile kx trpnzngr nzvz-krbzku mrkc navzkile. ?Myx kxmule, na-abz-lzbq?"

<sup>23</sup> Rpihz Jiszsz kx, "Nimu lr nrlc, a' ninge lr Heven.

<sup>24</sup> Delc tqrpi-ngrbo bamu kx sa nabz-ngrnamu alwx ngrmung. Murde nzmu Trtenge naipqle nimu, nalxngitiamu kx Ninge Ningepe, kc tqatwzlr-ngrmle." \*

<sup>25</sup> X sc tzipipebzlr bade kx, "?Nim angidr ncblo kznike?" Rpihz Jiszsz kx, "Nzwrde kqlupe nzpi-krbole bamu.

<sup>26</sup> X kxmule-esz' krlzx nzpi-krbo bamu da kxkqlu, x krlz-kzx nzpi-krbo nzvz-rbr-krmung kxkqlu, a' pitxpo nike pim Trtenge kc tqatwzlr-ngrmle ninge. X nide da angidr."

<sup>27</sup> Jiszsz ycmnetr-ngrde Trtede Gct, a' tryrplatitr-pwzu nardr.

---

\* **8:24** *Ninge Ningepe* drtwr ngrde kx Jiszsz nide Gct. Murde Gct ycmnetr-ngrde nide esz'-krde mz natq lcnq mzli kc tzyrapwx-n-grdr ncdz Mosis. Mc Nzrlaszngz 3:14.

28 Sc tqrpibezle badr kx, “Mz nibr nzadolz-krmu ninge, Mrlx Leplz, sc tqkrlz-ateamu kx Ninge Ningepe. Murde trvz-nqblqwxu me pnz drtwrnge esz'-krnge, a' pitxpwo nike alvztrp Trtenge bange.

29 Trtenge kc tqatwzlr-ngrmle ninge, sc tqm-ncm bange. Tr-rlaszleu ninge murde rtrngz-zvzbo da kx aelalzmlle drtwrde.”

30 Mzli lc leplz nzklung kx nzlxngitilr Jiszs, mz nzxlr-krbzlr natqdeng.

### *Jiszs X Ebraam*

31-32 Sc tqrpibez Jiszs mz lr Jiu kxnzlxngitilr nide kx, “Mz nzyrlq-angidr-krmu natqnge, aelwapx-ngrde kx nimu leplz nengeng. Delc nakrlz-zpwx-ngrnamu da angidr, x da angidr lcde sa na-aopxbzle drtqmu.”

33 Kx nzxlrbzlr nzymne-krde, sc tzrpipeir kx, “Ei, nigr nqvi lr Ebraam, x trgalr leplz kx awz-nrbalqle nigr, x drtqgr opxpe. ?A' nike tqrpi-ngrn kx drtqgr sa na-aopx?” ☆

34 Rpi-mopwz Jiszs badr kx, “Da angidrtx lc napibo bamu. Pe-amqngi alwx leplz amrlx kcng nzaleng alwx. X trpnzngr scdr zmatq kx na-aopx-ngrdr drtqdr.

35 X doa kxmule lc traxvctru mz nqvi lr neidu. A' doa ncblo ne trte, nide txpwz kc tqtakitrde nzmncr-zvz-krde mz nqvi lr neidu.

36 Mz nzm-krde lcde, mzli kx Mrlx Trte aopx-ngrbzle drtqmu, axvctrpele nimu mz nqvi lr trtede, x drtqmu opx angidr.

---

☆ **8:33** Matiu 3:9; Luk 3:8

37 Da zpwxtx nzrpi-krmu kx nimu nqvi lr Ebraam. A' kzdung nimu suti drtwrdr nznibq-krdr ninge, murde nzpxtpx-ngrdr natqngeng.

38 Pibo bamu da kx pwxlvztrpo mz Trtenge. X ale-kzamu da kx pibz trtemu."

39 A' nzrpibzlr bade kx, "Ebraam nide kc tqngi trtegr." Rpibz Jiszs kx, "Nzmu nangini-angidrmu doa ne Ebraam, navz-nqblq-kzpzmu nqm q krdeng kxmrlz.

40 Pi-zvzbo bamu da angidrng kx xlrtrpo mz nao Gct. A' rpiamu nanibq-ngrnamu ninge. Trngiu nqm q kr Ebraam lc tqwaiamu.

41 Mz nzrtrngzti-krbzmu da lcng, vz-nqblq-angidramu nqm q kr trtemu, kc trngiu Gct x trngi-kzu Ebraam." Nzrpibzlr kx, "Trnipgru doa ngr peto, a' Gct kx ngi Trtegr angidr."

42 Rpi-mopwz Jiszs badr kx, "Nzmu Gct nangi Trtemu le, namrlztiamu ninge. Murde vzpxmc bade, x vzmc mz nrlc. Trvzpw'c'u mz zmatq rnge esz'-krnge, a' nide kc tqatwzlr-ngrmle ninge.

43 A' narmu trnzrplatitrlru natqng.

44 Murde nimu doa ne trtemu, Setzn. Dekc tqmrlz-ngrbz bamu nzvz-nqblqngr me pnz drtwrde. Abzo mzli kc tzwzng nrlc, Setzn tqngi Kxr nibq. X ni-kzde Kxapokia, murde da angidr trycpwzu bade. X mz nzpokia-krde vz-nqblq-tpwzle nqm q krde esz'-krde. Murde nide Mepokia x Nou Nzpokianger amrlx.

45 X trlxngiti-ngrwamuu ninge mz nzpi-krbo bamu da angidr, murde nimu doa nedeng.

46 ?Neke mz nimu krlzle nzaelwa-ngrm da kx vz-rbrtix? ?Nzmu kx tqrpibo da angidr, memule trlxngiti-ngrwamuu ninge?



47 Doa neng Gct nzlxnngiti-angidrlr natqde. A' trlxngitiwamuu natqde murde trnginipwa'muu doa nedeng."

*Jiszs Mnc Kai X Ebraam Kc Ate*

48 Kx nzxrlr natq Jiszs mz trnzngini-krplru doa neng Gct, nzrpibzlr bade kx, "Eke! A' nim trngiulrJiu. Nim lr Szmariz kxngangr! X drka' la tqmncpxm bam."

49 Rpibz Jiszs kx, "Trpnzngr drka' kx mncpxm bange. Murde amatqx Trtenge, a' tramatqwa-muu ninge.

50 X mz trnzamatq-krpwa'muu lc ninge, Trtenge sa na-ayrplapxle nimu. Murde suti drtwrde kx leplz amrlx na-amatqlr ninge, Mr-lxde. X navz-nqblq-zvzx me pnz drtwrde.

51 "Da angidrtx lc napibo bamu. Doa kx lxngitile natqnge, trtxpnzngr nzbz-krde."

52 A' nzrpibzlr bade kx, "Mzli ka krlz-angidrpekr kx drka' la tqmncpxm bam. Murde Ebraam bzpe x profet nzbzpeng, a' se tqrpiq kx doa kx lxngitile natqm trtxpnzngr nzbz-krde.

53 ?Myx kxmule, myapxbzme mz melrmqgr Ebraam? ?Mz drtwrm nim neke?"

54 Rpi-mopwz Jiszs badr kx, "Nzmu na-amatq-lzbqnge trpnzngr drtwr ngrde. A' Trtenge kc tqamatqle ninge, rpianu kx nide Gct rmu.

55 X kxmule-esz' rpianu kx nide Gct rmu, a' trkrlz-angidrwamuu nide. Murde ninge kx rkrly angidr nide. Nzmu narpix kx trkrlzwxu nide, sc tqapupe-kzx nimu kxnzpokiayang. A' krlzx nide x vz-nqblqx natqde. X trpokiawxu.

<sup>56</sup> “X melrmqmu Ebraam kz abrtz-zvz-ngrde nzxlr-krde ninge mzli kc tqmnc-ngrde mz nrlc. Murde lxngitile natq Gct kx sa na-atwzlr-ngrmle ninge mz nrlc.”

<sup>57</sup> Nzrpibz kxnzetu r lr Jiu kx, “Pokiatspeq! Murde Ebraam bz pnz mzli kc bqnc, x trkr-lzkapzme yiz kx nznpu-nzlvqn (50). ?A' se tqrpipeq mc-kzq Ebraam?”

<sup>58</sup> Rpi-mopwz Jiszs badr kx, “Da angidrtx lc napibo bamu. Ebraam mzte trnzmcka, a' Ninge la tqmncpex.”

<sup>59</sup> Kx nzxlrzbzlr natqde lcong, sc tzrtangrpeng rplz kx nzvaebq-ngrdr nide. A' Jiszs amrbtr-lzbqzbz mz zbo ngr leplz, x sc tqvzpxpe yz Mangr-nzangiong.

## 9

### *Jiszs Amrlzle Ncblo Kx Mzte Mwi*

<sup>1</sup> X mz nzvz-krgr badr Jiszs mz lrpzki, rmctikr kzdq ncblo kx mzte mwi. Nzmwikr mzte lc nzmcmi pnz mzte.

<sup>2</sup> X rpibzkr kx, “?Kxakrlz, myx kxmule mz nzmwikr mzte lc? ?Ngi dalr alwx ngrde esz'-krde o alwx ngr trtede x lxede?” Krlc tqycmne-ngrbzkrc lc murde mz drtwrgr zyagox amrlx vzpxm mz alwx.

<sup>3</sup> A' ayzlu-ngrm Jiszs natqgr kx, “Nzmwikr mzte trngiu dalr alwx ngrde x trngi-kzu alwx ngr trtede x lxede. A' mzte mwi murde zmatq ngr Gct na-aelwapxngr mz nzamrlz-krnge nrkrdrdqde.

<sup>4</sup> Murde nawztrpzku mz Trtenge kc tqatwzlr-ngrmle ninge, mzli ka tqrnginyzbe-ngrgu mzli.

Murde mz nibr nzbz-krde ncblo trkrlzpeleu nzwzng.

<sup>5</sup> A' mzli ka tqmncbe-ngrne mz nrlc, apux zyzlr kc tqrlr-ngrbzle mz lr nrlc nzmc-krdr da angidr.”

☆

<sup>6</sup> Mz nibr natq lcng, Jiszs sc tqbyaope mz drtc'. X zbya ngrde sc tqayabemipele drtc' mz nzayayr-krdele. X sc tqabli-kztrpebzle mz mz ncblo kc mzte tqmwi.

<sup>7</sup> X rpibzle bade kx, “Vz x ycpqo mzpq mz nabzde Siloam.” *Siloam* drtwr ngrde *Nzatwzlrngr*. Ncblo kc vz mrkc tzatwzlrkile, ycpqpxle drtc' kcng mz mzte. X mzli lcpwz, sc tqrmcpe da, x sc tqyzlupe mrnyzde.

<sup>8</sup> Ncblo lc mzli kc ena wxbu zvz mz nrlar lrpzki mz nzrlx-krde scde da. Kx nzmc leplz nide, sc tzrpipelr kx, “?Ei, trngiu mrlx kc tqwxbu zvz mz nrlar lrpzki tqrlxm bagu scde da?”

<sup>9</sup> Kzdung leplz nzrpilr kx, “Ncblo lc nide lape.” A' kzdu-kzng nzrpibzlr kx, “E trkr, ncblo kzble la, a' nzobq-krde apule nide.” A' kx xlrzbzle nzymnetr-krdr nide, sc tqrpibzle kx, “Ninge kape.”

<sup>10</sup> Zbz sc tizrveapebzng bade, nzrpibzlr kx, “?Myx kxmu mzpq tqobqpe-ngrde?”

<sup>11</sup> Sc tqrpibzle badr kx, “Ncblo kc tqngi drtqde Jiszs ayayrtile kc drtc' mz zbya ngr naode, sc tqabli-kztrpebzle mz mzke', x rpimle bange navzne mz nabzde Siloam x naycpqpxx mzke' elr. Kx ycpqpxx kc mzke', ninge kc tqrmcpex da.”

<sup>12</sup> Nzrpibzlr kx, “?Myxpe ncblo lcde?” Rpibzle kx, “Trkrlzwxu.”

*Farzsi Nzycmnetrng Mz Ncblo Kc Mzte Tqmwi Pnz*

<sup>13</sup> Zbz ncblo lc, sc tzvzmipebzlr badr Farzsi.

<sup>14</sup> Zbq kc tqamrlz-ngrbz Jiszs mz ncblo lc ngi Sabat.

<sup>15</sup> Mz nzmu-krde lcde, nzveati-mopwz Farzsi mz ncblo kc kxmu nzobqpxkr mzte. Sc tqrpipebzle kx, "Alatrpzle kc drtc' kx yayr mz mzke', ycpqpxx, x ninge kc tqrmcpex da."

<sup>16</sup> Zbz drtwr Farzsi tresz'tipeu. Kzdung nidr nzrpilr kx, "Ncblo kxmule lc tratwzlr-ngrpwqu Gct, murde nzww-krde mz zbq lc rnzlvzole Lou ngr Sabat." A' kzdu-kzng nzrpilr kx, "Trtingr, mrlx lc atwzlr-ngrm Gct, murde ncblo kxale alwx, traleu r kx kxmule lc."

<sup>17</sup> X nzrpi-mopwz Farzsi mz ncblo kc kx, "?Rpiq kx ncblo kc aobqpxbzle mzpq? ?X mz nzaobqpxkrbzle lc mzpq, mz drtwrm nide neke?" Rpiq kx, "Mwx nide profet."

<sup>18</sup> A' kxnzetu r lr Jiu trnzlxngitilru ncblo lc. Zbz sc tzaveatipelr trtede ncdx lxede.

<sup>19</sup> Kx nzvzmlr kc, Farzsi kcng sc tzrpipebzlr kx, "?Mrlxmu lc? ?Da zpwx kx nzmwikr mzte nzmcmi pnz mzte? ?A' nike tqobqpengr mzte mzli ka?"

<sup>20</sup> Nzrpibzlr kx, "Krlz-angidrkr kx mrlxgr lc mzte mwi mzli kc tzmika-ngrde.

<sup>21</sup> A' trkrlzkru nike tqobq-ngrde x neke tqaobqpxbz. A' veabzmu bade, nipede doa kxetu x krlzle nzymne-krde esz'-krde."

<sup>22</sup> Krlc tzymne-ngrbzlr lc, nzmwxlrtilr kxnzetu r lr Jiu, murde nzpipxlr kx, "Doa kx rpilr Jiszs nide Kxnzmcp, sa na-amnctrpzlr

yz mz mangr-nzkrka'ngr x namapulrpx-ngrdr mztea.”

<sup>23</sup> Delc tzipi-ngrbz trtede ncdx lxede kx, “Nipede doa kxetu, veabzmu bade.”

<sup>24</sup> Zbz sc tzkqlepe-moulr ncblo kc mz nzwrde krali, tzipipebzlr kx, “Esalzbz mz Gct kx da angidr kc napiq. Murde krlzkr kx mrlx lc tqaobqpxbzle mzpq rtrngzbz alwx.”

<sup>25</sup> Rpihbzle badr kx, “Trkrlzwxu kx nide ncblo kxrtrngzbz alwx o trtingr. A' da kx krlztxpo mzli kc ena mzke' mwi, a' mzli ka obqpe.”

<sup>26</sup> Nzrpi-mopwzlr kx, “?Nike waisr-ngrde nim mz nzamrlz-krbzle mzpq?”

<sup>27</sup> Rpi-mopwzle badr kx, “Rlr, pipebo bamu a' trxlrwamuu. ?Nike tqrpi-ngrnamu napi-ngr-mopwc'le? Mwx suti kz drtwrmu nzngini-krmu ncblo nedeng.”

<sup>28</sup> Kx nzxlrbzlr nzymne-krde, drtwrdr trmrlztilzpqngqu, sc tzpibqtipelr, x nzrpibzlr kx, “Nim kxvz-nqblqle nide, a' nigr vz-nqblqkr Mosis.”

<sup>29</sup> Murde krlzkr kx ycmnekipx Gct Mosis, a' mrlx la trkrlz-pnz-kru me vzkimle.”

<sup>30</sup> Rpi-mopwz ncblo kc badr kx, “Rlr, kctipxpex nimu. ?Ncblo lc aobqpxbzle mzke', a' se trkrlzwamuu me vzkimle?”

<sup>31</sup> Krlz-angidrku kx Gct trayzlupwzleu nzkrka'kr ncblo kx rtrngz-zvzbz alwx x trtekqrleu nqmq nr drtwrde. A' lalztqpwx mz doa kx angiole nide x alele nike suti drtwrde.

<sup>32</sup> Abzo mzli kc pnz trgalr ncblo kx aobqpxbzle mz mrlx kx mzte mwinepxm mz nzrmcngz mzte, da kc tqwaix.

<sup>33</sup> A' mrlx lc mc-angidrpeku nzvzpx-krmle mz Gct. Nzmu trnavzpxpleu mz Gct, trpnzngr da kx na-alele."

<sup>34</sup> A' nzrpibzlr kx, "Ei, trtakitrdeu nzalvztr-krm nigr, murde mzpq nzmc mz alwx ngr trtem x lxem, x tao zvz mz alwx." Zbz sc tzamnctrpebzlr nide yz mz Mangr-nzangiongr, x tzmapulrpxpe-ngrdr mztea.

### *Kxnzvrbrng Mz Nzobqkr Gct*

<sup>35</sup> Kxrmcti Jiszs ncblo kc tzmapulrpxngr, sc tqrpipebzle kx, "?Myx kxmule? ?Lxngitipeq Mrlx Leplz?"

<sup>36</sup> Rpibz ncblo kc kx, "?Kxetu, neke tqngi ncblo lcde? Pim bange murde nakrlzx x nalxngitix nide."

<sup>37</sup> Rpibz Jiszs bade kx, "Ninge lc tqycmnebz bam, ninge nide."

<sup>38</sup> Zbz sc tqrpipebzle kx, "Kxetu Lod, lxngitix kx nim Kxnzmcpx." X rweobz zpr mz Jiszs mz nzangio-krde nide.

<sup>39</sup> Rpibz Jiszs kx, "Vz-ngrmc mz nrlc mz nzpwxliti-krnge leplz mz alwx ngrdr x mz nzalvztr-krnge nidr kcng trnzkrzlzkalr Gct, murde narmctilr nzlungr kxrna. A' vz-kz-ngrpc' mz nzaelwapx-krbo da kvz-rbr mz leplz kcng tizr-pilr kx nzalvztr-krdr tubq."

<sup>40</sup> Kzdung Farzsi kx nzmncng badr sc tizr-pipebzlr kx, "?Mz nzymne-krm lc nigr du kz kxnzalvztr-rbrng?"

<sup>41</sup> Rpibz Jiszs badr kx, "Eu. Murde leplz kcng trnzkrzlzlr Gct, trnzvz-rbrung mz nzvz-nqblq-krdr nide. A' mz nzrpi-krmu kx nzalvztr-krmu

tubq, aelwapx-ngrde kx vz-rbramu mz nzobqkr Gct.”

## 10

### *Kxacle Angidr Sip*

<sup>1-2</sup> Rpi-mopwz Jiszs badr kx, “Naycmne-ebzpxbo dq ncblo kxacle sip. Kxacle Angidr sip dwatrpz mz naonrx. A' mrlx kx trdwatrpwzu mz naonrx, a' okilzbzle mz nibr bz, nide mrlx kxpna da.

<sup>3</sup> Ncblo kc tqacle naonrx, lvxpxbzle naonrx mz kxacle sip. X sip nedeng nzkrzlzr natqde mz nzkqle-krbzle drtqdr, x sc tqvzmipxpeleng.

<sup>4</sup> X nzvz-nqblqlr me vzkile, murde nzkrzlzr natqde.

<sup>5</sup> Trnzvz-nqblqlru ncblo kzble, murde trnzkrzlzru natqde. A' nzdwaszlr nide.”

<sup>6</sup> Yapwxtibz Jiszs badr nzycmne-ebzpxngr lc mz nzaelwapx-krde nzblepx-krde mz leplz kcng tzesabrtlr leplz. A' tryrplatitrpwzu nardr natqde.

<sup>7</sup> Zbz sc tqrpipe-mopwz Jiszs kx, “Da angidrtx lc napibo bamu. Ninge naonrx kc tzdwakitr sip mz nzprtr-krbzlr badr kztedrng.

<sup>8</sup> Leplz kcng tzvz-kaipqng mz ninge, nzalvztr-ngrdr da kx vz-rbr. X nzapulr kxnzpnang da x nzangqnguting. Delc sip trnzlalztq-ngrpwzlr badr.

<sup>9</sup> X ninge naonrx kc tzvzkitr leplz mz nzkrzlz-krbzlr Gct. Doa kx vztrp bange nide kx narlapx. X na-apule sip nenge mz nzdwatr-krmle x nzdwapx-krde mz nzrmcti-krde dakxznng ngr nzlungr.

<sup>10</sup> Vz-ngrmc murde sip nengeng namnc-zpwxng. A' ncblo kxpna da vztz-ngrple nzp-nangr, nznibqngr x nzodangr.

<sup>11</sup> “Da angidrtx lc napibo bamu. Ninge kz Kxacle-angidrl sip. Murde Kxacle-angidrl sip rlrpx-lzbqngr mz nzbz-krde mz nzarlpx-krde sip nedeng. \*

<sup>12</sup> Ncblo kxnzawz, trnipleu ncblo kxacle x rngine sip. Ncblo kxnzawz dwaszle sip mz nzmc-krde nzvz-krm kuli kzpeto. Zbz kuli kc sc tqlolvzpele kcng x aodalitipele kcng.

<sup>13</sup> Ncblo kxnzawz dwa murde yc txpwz mz drtwrde nzatatr-ngrm trau, a' tryc-ngru drtwrde sip.

<sup>14-15</sup> Ninge Kxacle Angidr sip. Krlzx sip nengeng x nzkrzlzr ninge, da kc tqwai nzkrzlzr Trtenge ninge x nzkrzlz-krnge Trtenge. X rlrpx-lzbq-ngrne mz nzbz-krnge nidr. ✧

<sup>16</sup> Kzdung sip kx nangi nengeng trnzprtrkang mz nabxbz nyznge. Krlcdeng navzmi-kzpc'ng mz nabxbz nyznge x sa naxlr-kzplr natqng. Murde sip nengeng amrlx nanginidr dzbede kx esz', x nangininge txpwz kxaclele nidr.

<sup>17</sup> “X rlrpx-ngrne nznibq-krdr ninge murde krlzx kx sa nalu-mopwc'. Delc Trtenge tqmrlzti-zlwz-ngrde ninge.

<sup>18</sup> Trpnzngr kx nanibqle ninge, a' ninge kx narlr-lzbq-ngrbz mz nznibq-krdr ninge. Murde rngiscnge zmatq ngr nzka-krbo nzlungr x

---

\* **10:11** Jiszs nide *Kxacle Angidr Sip*, x ni-kzde *Kxacle sip kxmyapxbz* [Hibru 13:20-21] x *Kxetu r kxnzaclelr sip nedeng*. [1 Pita 5:4] ✧ **10:14-15** Matiu 11:27; Luk 10:22



nzrkatx-krngele. Krlc natq kx kam Trtenge bange kx na-angidax.”

<sup>19</sup> Zbz lr Jiu sc tzaki-lzbqpe-moung mz natq kcng tqpiti Jiszs.

<sup>20</sup> Leplz nzkqlung nzrpilr kx, “Eke! Mrlx lc dwasz drka', delc tqlukurnr-ngrde. ?Memule tqlalztq-ngrbzmu bade?”

<sup>21</sup> A' kzdu-kzng nzrpilr kx, “Ncblo kx dwasz drka' nzymne-krde trkxmuleu lc. ?Myx kxmule, drka' krlzle nzaobqpx-krde mz kxmwi?”

*Kxnzetu R Lr Jiu Nzpctxpx-mou-ngrdr Jiszs*

<sup>22-23</sup> Mzli lcpwz, mzli r zbao mz Disembz, yce pipz nzkaputr-krm Nzyrlwr-lxblnrgr mz Nzatr-moung Mangr-nzangiongr Yawe Jerusalem. X nigr badr Jiszs sc tqvztrpekr Mangr-nzangiongr, x sc tqvznepe mz Makoa nyz Solomon. †

<sup>24</sup> Kxnzetu r lr Jiu nzvzmqng nzmnc-ngalelvzlr nide, murde nzrpilr namctrpzlr dq da kx vz-rbrtile. X sc tzrpipebzlr kx, “Mzli boipe, a' drtwrgr kc tqveabe. Kx nim Kxnzmcpix o trtingr, pi-zpwxm bagr murde nakrlzkr.”

<sup>25</sup> Rpibz Jiszs badr kx, “Pipebo bamu, a' trlxngitiwamuu ninge. Rkx kcng tqalexng mz zmatq ngr Trtenge, da lcng nzaelwapx-ngrbzlr bamu ncblo kc tqngininge.

<sup>26</sup> A' trlxngitiwamuu murde trnipwamuu sip nengeng.

---

† **10:22-23** Mz nzyrlwr-lxblnrgr mz Nzatr-moung Mangr-nzangiongr nadcpxngr mz drtwrdr nzalqng x nzrlvpxngr mou Mangr-nzangiongr mz nibr nzatrkatikr kzdq kxetu r ncblo ngr vea kxtrngiulrJiu. Mc Daniel 11:31. Zbq lcng nzrpi-kzpzlr Nzyrlwr-lxblnrgr Kxyzlr.

27 X krlzx sip nengeng, nzxlrmlr natqnge, x nzvz-nqblqmlr ninge.

28 Kabo badr nzlungr kxboi x trtxpnzngr nzbz-krdr. X trtxpnzngr kx narvecpxm mz mqnge.

29 Trtenge kc tqrkam bange myapxbz mz leplz amrlx. Mz nzmu-krde lcde, trtxpnzngr kx navecpxmle nidr mz mq Trtenge.

30 Da zpwxtx, nigr ncdr Trtenge da kxesz'."

31 Kx nzxlrzbzlr natqde lcng, drtwrdr kc tqngyape mou. Murde rtultr-lzbqzbz mz nzrsakrlr-krdr ncdr Gct. X sc tizrtrngzope mou rplz kx nzvaebq-ngrdele.

32 A' rpibz Jiszs badr kx, "Da kxkqlu kx alepex mz zmatq ngr Trtenge mz nzokatr-krnge leplz. ?A' myx mz da lcng kx takitrde nzvaebq-krmu ninge?"

33 Nzrpibzlr bade kx, "Trnavaebq-ngrgru nim nzale-krm da kxmrlz, a' mz nzamatine-krm Gct. Murde nim ncblo txne, a' rtultr-lzbqbm mz nzrpi-krm kx nim Gct." ☆

34 Rpibz Jiszs badr kx, "Nzyro mz Nzryrngrkxtr kx rpibz Gct badr kzdung leplz kx nzapulr nide. ☆

35 Krlzku kx nike pi Nzryrngrkxtr ngi zvz da zpw. Delc Gct tramatine-lzbqu mz nzrpi-krde kx leplz lcng nzapu-kzlr nide.

36 ?Mz nzmu-krde lcde, myx kxmu nzamatine-krnge Gct mz nzrpi-krnge ninge mrlxde? ☆ Murde mcpx Trtenge ninge, x atwzlr-ngrmle ninge mz nrlc.

---

☆ 10:33 Livae 24:16 ☆ 10:34 Sam 82:6 ☆ 10:36 Nzrlaszng 22:28

<sup>37-38</sup> Rtrngzti-zpwxbo me pnz drtwrde. Nzmu trna-alewxu da lcng, sa tqmrlz trnzlxngiti-krpwamuu ninge. Kxmule-esz' trlxngitiwamuu nzrpi-krbo ninge Mrlx Gct, a' narlxngitiamu murde vz-nqblqx natqdeng. X mz nzvz-nqblq-krnge natqdeng, nakrlz-angidramu kx Trtenge sc tqmncm bange x sc tqmncbo bade.”

<sup>39</sup> Kx nzxlrzbzlr nzycmnekr Jiszs drtwrdr kc tqngyatxpe mou. X sc tzipilr nalolvzpe-ngrdr nide. A' ani txpwz nzrlasz-krde Mangr-nzangiongr.

<sup>40</sup> Nigr badr Jiszs rkalzmgr Judiz Provins x kawickr LueJodzn. Vzkr mrkc tqawrkxtr-pnzng Jon, x sc tqmncpekr elr. ✧

<sup>41</sup> Leplz nzkqlung nzvzmqng elr mz nzxlr-krbzlr nzycmne-krde. Zbz sc tzipipelr kx, “Ncblo lc opxm nide Kxnzmcpx, murde aelwapxng r kx kxkqlu. Kxmule-esz' Jon Kxawrkxtr trpnzng r kx kx aelwapx-ngrde, a' Jiszs angidatipele da amrlx kcng tqyapwxtingr Jon nide.”

<sup>42</sup> X leplz nzkqlung nzlzngitilr kx nide Kxnzm-cpx.

## 11

### *Nzbzkr Lasarus*

<sup>1-2</sup> Kzdz kc ncblo drtqde Lasarus. X inwedeng drtqdr Mata x Mxri. Mxri nide kc kalr na-aelubzle nanyc Jiszs mz tolo x na-amingrbzle mz nqnginarde. Doa lcng nztqng mztea nyzdr Betzni mrkc Judiz Provins. Zbz kzdq mzli mzlwedr Lasarus kx yagoxle. ✧

<sup>3</sup> Ile-lzbq lcng nzling sc tzatwzlrpe-ngrbzlr natqdr mz Jiszs. Nzrpibzlr kx, “Kxetu, mzlem kc tqmrlzti-zlwzq sc tqyagox.”

<sup>4</sup> Kx xlr Jiszs natqdr, sc tqrpipemle bagr kx, “Zyagox lc trngiu dalr nzbzkr Lasarus. A' ngi dalr nzaelwapx-krnge nzmyalzkr Gct mz nzale-krnge rkx kxmatq mz nznigini-krnge Mrlxde.”

<sup>5-6</sup> Kxmule-esz' Jiszs mrlzti-zlwzle Mata, Mxri, x Lasarus, x xlrle nrpa ngr nzyagoxkr Lasarus, a' mncti-moule zbq li mrkc tqmnc-ngrgr badr.

<sup>7</sup> Mz nibr zbq kcng li, sc tqrpipemle bagr kx, “Navz-mouku ena Judiz.”

<sup>8</sup> A' rpibzkr bade kx, “?Kxakrlz, navz-mowq mrlcde? A' mzli lc belq dekc tzmu lr Jiu nzvaebq-ngrdr nim, x nzmu navzbzme sa na-ale-mopwzlr bam.”

<sup>9-10</sup> A' ayzlu-ngrmle natqgr mz kzdq nzymne-ebzpxngr. Rpimle kx, “Na-aoti drtwrmu nrckxn-grlx x nrckxbq. Mz nzvz-nqblq-krnge me pnz Trtenge, apux ncblo kx vzne mz nrckxngrlx. Trtaou mz nzmnc-krde, murde vz-nqblqle da angidr. A' doa kx trvz-nqblqleu natq Gct apule ncblo kx vzne mz nrckxbq. X tao mz alwx murde da angidr lc trycpxpau mz nabzde.”

<sup>11</sup> Zbz rpi-mople kx, “Mzlegu Lasarus mwipe, a' navzpebzku mzli ka mz nzameo-krbo nide.”

<sup>12</sup> A' rpibzkr kx, “Kxetu, nzmu namwile, drtqde sa namrlz.”

<sup>13</sup> Krlc tqpi Jiszs nzbzkr Lasarus, a' mz drtwrgr nzmwinger mz kx otim nemwi.

<sup>14</sup> Zbz sc tqrpi-angidrpemle bagr kx, “Lasarus bzpe.

<sup>15</sup> A' abrtzlvzx trnzmnc-krpwc'u Betzni mz nzamrlz-krnge nide mz nzyagox-krde. Murde da kc na-alebo bade mzli ka, sa nabatrpzle mz nabzmu nzlxngiti-angidr-krmu ninge. Vzmamu, navzpebzku bade.”

<sup>16</sup> Žbz Tomas, kc kzdq drtqde Lipxm, sc tqr-pipemle bagr kx, “Navzku amrlx ngrgu badr, murde nabz-lxblrku badr.” \*

*Jiszs Atulz-mople Leplz X Rkabz Badr Nzlungr*

<sup>17</sup> Kx vz-aepzmgr kc badr Betzni, sc tqxlrpele kx Lasarus yrbqtipele mz gq zbq pwxpe.

<sup>18-19</sup> X lr Jiu kxnzkqlung nzyrkrkimlr Jerusalem, murde Jerusalem ncdr Betzni takitr kilomita kxtq. Nzvz-ngrmlr mz nzamnc-lrpi-krdr Mata ncdr Mxri mz nzvztikr drtwrdr mzlwedr kc tqbz.

<sup>20</sup> Mata kx xlrle kx Jiszs kc navzm, sc tqvzpxpe mz nzmcti-krde nide. A' Mxri mncpwz brma.

<sup>21</sup> Kx krlzmle kc Jiszs, Mata aelwapx-ngrde nzrlxngiti-krde mz nzrpi-krde kx, “Kxetu, nzmu namncq mrka, mzlwenge trbzu, murde nzmu amrlzbzme nide.

<sup>22</sup> Kxmule-esz', a' krlzx kx mzli ka nike rlx-tibzme mz Gct, sa nakabzle bam.”

<sup>23</sup> Rpibz Jiszs bade kx, “Mzlwem sa natulz-mop mz nzbzngr.”

<sup>24</sup> Rpibz Mata kx, “Eu, krlzx kx sa natulz-mop mz Mzli lc Tqmatq na-ayzlu-ngrbz Gct da mz leplz.”

---

\* **11:16** Mz drtwr kzdung leplz, Tomas nzlipxmqng ncdr Matiu, murde ncblo lcng nzling nzryro-rlilr-zvzng mz Matiu 10:3, Mak 3:18, x Luk 6:15. A' trkrlz-angidrkuu kx ngi da zpwz o trtingr.

<sup>25</sup> Rpi-mopwz Jiszs bade kx, “Ninge kc tqatulz-mopwc' leplz mz nzbzngr x ninge kc tqrka-kzpo badr nzlungr kxboi. Doa kx lxngitile ninge, kxmule-esz' bzpe, a' sa natulz-mop mz nzbzngr.

<sup>26</sup> X krkc tqtulz-mop murde lxngitile ninge, mqngrde trpengr nzbz-krde. ?Lxngitiq da lc?”

<sup>27</sup> Rpihz Mata kx, “Eu, lxngitix kx nim Kxnm-cpx, Mrlx Gct kc navzm mz nrlc, da kc tqwai nzpikr profet leng amrlx.”

### *Jiszs Yrni*

<sup>28</sup> Mz nibr nzymnekr Mata lc, sc tqyzlupe brma tqycmne-awapebz mz ilede Mxri. Rpihzle bade kx, “Kxakrlz vzbem, x rpilc namcle nim.”

<sup>29</sup> Kx xlr Mxri le, tutxlzm x sc tqvz-anipe mz nzmcti-krde Jiszs,

<sup>30</sup> mrkc tqaenzlibep, tqrmctingr Mata nide.

<sup>31</sup> A' mzli kc tqdwapxngr Mxri yz, leplz kcng tzmncng badr nzdwapx-kzng, murde mz drtwrdr Mxri nayrni mz gq lr Lasarus.

<sup>32</sup> Mxri kx krlzmle Jiszs, rtco-lzbq-ngrbz mz nzamatq-krde nide. Sc tqrpipebzle bade kx, “Kxetu, nzmu namncq mrka, mzlwenge trbzu murde nzmu amrlzbzme nide.”

<sup>33</sup> Kx mcpz Jiszs nzyrnigr Mxri x leplz kcng, sc tqngyati-zlwzpe drtwrde zmatq ngr Setzn mz nzatrkatikrde leplz mz nzbzngr.

<sup>34</sup> Zbz sc tqrpipebzle mz ile-lzbq lcng kx, “?Myx gq lrde?” Nzrpibzlr kx, “Kxetu, vzm murde na-aelwa-ngrbzkr bam.”

<sup>35</sup> X Jiszs sc tqyrnipe kz.

<sup>36</sup> Zbz leplz kcng sc tzipipelr kx, “Ycbz nzmrlzti-zlwz-krdele!”

37 A' kzdu nidr nzrpilr kx, "Mrlx lc aobqpxbze mz ncblo kx mzte mwi. Nzmu navz-animle mwx krlz-kzle nzarlapx-krde Lasarus mz nzbzngr."

*Jiszs Atulz-mople Lasarus Mz Nzbzngr*

38 Zbz Jiszs ngyati mou drtwrde zmatq ngr nzbzngr. X mzli lc krlzpebzk badr butqbr kc tqyrbqpx-ngrm Lasarus. Naonrx ngrde nza-pqbrtr rplz kxetu, murde ma tzdwatitr animol.

39 Rpibz Jiszs badr kx, "Alqlipxamu rplz lc." A' rpibz Mata bade kx, "Kxetu, yrbqtipxpemle mrla zbzq pwxpe x brtupe."

40 Rpibz Jiszs bade kx, "Rlr! Se tqpi-atebo bam kx sa namcq zmatq ngr Gct mz nzlxngiti-krm ninge."

41 Zbz sc tzalqlipxpebr rplz kc x Jiszs sc tqkrka'lzpe Heven, nzrpi-krde kx, "Trte, awi-ngrbo bam nzlalztq-khme bange x nzayzlu-khme natqngge.

42 Kxmule-esz' lalztq-zvzme bange, a' tqkxmu nzymne-krbo lc bam, murde leplz lcng nalxngitilr ninge kc tqatwzlr-ngrme."

43 Zbz sc tqetumipe natqde nzrpi-krde kx, "Lasarus, vzpxm."

44 X mzli kcpwz, Lasarus sc tqvzpxpem, mqde rlilr nzpilvz lrpz x nanycdeng, x narde kz. Rpibz Jiszs kx, "Yokaepxbzmu lrpz lang murde navzne." X sc tzyokaepxpebzlr.

*Kxnzetu R Lr Jiu Nzrpilr Nanibqlr Jiszs*

*Matiu 26:1-5; Mak 14:1-2; Luk 22:1-2*

45 Zbz leplz kx kqlung kx nzrmcng rkx lc nzlxngitilr nide.

46 A' kzdung nidr sc tzyzlupeng Jerusalem mz nzrpi-krbzlr mz Farzsi da kx ale Jiszs.

47 Zbz Farzsi kcng sc tzyrlwr-lxblrpeng badr kxnzetu rdr pris mz Kansrl kc tqaclvele Lou scdr lr Jiu. X sc tzrpipekr kx, “?Nike na-alepeku? Jiszs sc tqaelwapx-zvzngr rkx kxmatq. X mzli ka nzrpilr kx atulzpe-mop ncblo mz nzbznggr.

48 Nzmu trnarpwa'-ngrbzkuu nzwz-krde, leplz amrlx sa nalxngitilr nide x nayrlqlr nzngini-krde King r Israel. X doa lr gzpman ngr Rom sa na-ayrplapxlr nigu mz nzrpwa'-krmle nzyrlwr-lxblkrgru Mangr-nzangiongr nyzgu, x sa nanibqtilr nigu lr Israel.”

49 Zbz Kaefzs kc tqngi Nardr Pris mz yiz lcde, rpibzle kx, “Mrlzpe nzngqngu-krmu.

50 Takitrde ncblo dq naesz' nabz-ngrbzle leplz amrlx, murde na-arlapxnggr lr Israel.”

51 A' natqde lcng trpileu mz drtwrde esz'-krde, a' mz nzwz-nqblq-krde me pnz drtwr Gct. Batrpz Gct bade nzwzkr profet lc, murde nide Nardr Pris nede. X Jiszs na-atutrle natqdeng mz nzbz-krde, murde na-arlapxle lr Jiu amrlx kcng tzlxngitilr nide.

52 X trnabz-ngrdeu nzarlapx-krde lr Jiu esz'-krdr, a' nabz-kz-ngrde lr nrlic kcng tqmcpz Gct mz nzngini-krdr doa nedeng. Murde doa neng Gct amrlx nanginidr neidu kxesz'.

53 Zbz abzo mzli lcde, kxnzetu r lr Jiu sc tzyrlqpelr drtwr ngr nznibq-krdr Jiszs.

54 Mz nzmu-krde lcde, nigr badr Jiszs sc tqrlaszpekr Jerusalem, tqvzpekr rlru mz taon Efrem.



<sup>55</sup> Ycpe pipz nzakaputr-krmlr zbq kxtr, kc tqngi Nzamyangr scdr lr Jiu. X lr Israel amrlx nzyrkr-mqng Jerusalem mz nzoliqti-lzbq-krdr. Murde natakitrdr nzprtrngr mz Mangr-nzangiongr, mz nzvz-nqblq-krdr Lou sc Mosis.

<sup>56</sup> X mz nzyrlwr-krdr kc Mangr-nzangiongr, sc tzatxti mztr Jiszs. X tzipibzlr mz kztedrng kx, “? Rkrlz dq nimu kx Jiszs sa navzm?”

<sup>57</sup> X kxnxetu r lr Jiu trnzkrly-kzlru kx navzm o trtingr. A' nzrpilr nalolvzlr nide, delc tzkapx-ngrdr natqdr kx doa kx rkrlz me mncngr Jiszs napibzle badr.

## 12

### *Jiszs Aelu Mxri Tolo Betzni Matiu 26:6-13; Mak 14:3-9*

<sup>1</sup> Nigr badr Jiszs sc tqyzlupekr Betzni, mztea nyz Lasarus kc tqatulz-mople mz nzbz-krde. Mzli lc ycbe zbq esz'mz, x Nzamyangr kc tzakaputr-pemlr.

<sup>2</sup> Nzrtrngztibzlr nzmu-ngrbz mz Jiszs. Lasarus nigr badr x leplz kcng tzwxbulz-kzng badr Jiszs mz tebol. A' Mata okatr mz nzakingr dakxznng.

<sup>3</sup> Zbz Mxri twzmle kc botol ngr tolo kx narnabr ngrde lqlwx x mnrte mrlz zlwz. X mz nzamatq-krde Jiszs, sc tqaelupebzle nanyc Jiszs x amingrt-ibzle mz nqnginarde. X mnrte lvabqpe mz nabz ma kc.

<sup>4-5</sup> Judzs, kzdq nigr ncblo neng Jiszs, kc namwale nide kalr, rpibzle kx, “Tolo lc narnabr ngrde takitrde nzatatr-krm ncblo mz yiz kxes'. ?Memule tramwa-ngrnleu x trau rde nakabz mz leplz kcng trnzrngiscung da?”

<sup>6</sup> Krlc tqkxmu nzymne-krde lc murde nide ncblo kxpna da x aclevele bxli r trau kx nzkabz badr mz nzwz-krdr. X trau kx nzyrlqo elr krlzle nzrkalz-ngrm. A' nzymne-krde lc, trvzpxpuu mz nzyckr drtwrde leplz.

<sup>7</sup> Rpibz Jiszs kx, "Bzkq ycmnebzme bade. Da lc tqtrngzti-ngrbzle ngi dalr nzoliqti-krbzle nrkr-drtqng mz nzaelu-krbzlele tolo mzli kc nabz-ngrne.

<sup>8</sup> Mnc-zvzamu badr leplz kcng trpnzngr scdr da, x krlzamu nzokatrngr nidr mzli kznikeng suti drtwrmu. A' ninge trnamnc-zvzpou bamu. Mz nzm-krde lcde, takitrde nzaelwapx-krmamu nzmrlzti-zlwz-krmu ninge mzli ka." ✧

<sup>9</sup> Kx nzxlr leplz nzmncr Jiszs Betzni, sc tzvzpemqng. Trnzvz-ngrmlru Jiszs txpwz, a' nzrpilr namc-kzlr Lasarus kc tqatulz-mople.

<sup>10</sup> Zbz kxnzetu rdr pris sc tzryrlqpeng drtwr kx nanibqpe-kz-ngdr Lasarus.

<sup>11</sup> Murde lr Jiu kxnzkqlung trnzvz-nqblqpelru kxnzetu rdng, a' nzlxngitipelr Jiszs mz nzmckrdr nzatulz-mou-krmle Lasarus.

*Sade Kx Nzprlxvztingr Nabx Nc Paam Mz Lrpzki R Jiszs Mz Nzvztr-krde Jerusalem*

*Matiu 21:1-11; Mak 11:1-11; Luk 19:28-40*

<sup>12</sup> Nrlc kxngrlxobzle, nzxlr leplz kcng tzvzmqng mz Nzamyangr, kx Jiszs sc tqvzpe mz lrpzki mz nzvztr-krde Jerusalem. X sc tqvzpekr badr.

<sup>13</sup> Zbz sc tzrlakipxpeng nabx nc paam, x sc tzmcti-lzbqpeng badr mz nrlarde kx yz

Jerusalem. X natqdr kc tqetupe tzipipelr kx, "Hosana! Glqpxkr King Kxnmcpk kc tqvzm mz drtq Yawe! Nim kc nangi King rgr lr Israel." ✧

<sup>14-15</sup> Otim Jiszs kc nei dcngki, wxbuom elr x sc tqvope-ngrde. Da lc atutrle nzipikr Profet kx, "*Bzkq mwxlrpeamu lr Jerusalem!* ✧ *King rmu dese tqvzpem mz nrwx, votrp mz nei dcngki.*" ✧

<sup>16</sup> Zbz mz nibr nzvzdzkr Jiszs Heven, sc tqd-cpx ate mz drtwrgr kx da lcng tqprtzbz mz Jiszs nzatutrlr natq kcng tqyclz-pnz-kaip mz Nzryrngrkxtr, tzymnetr-ngrdr Kxnmcpk x nike naprtzbz bade.

<sup>17</sup> A' mrkc Jerusalem leplz kx nzmclr Jiszs nzatulzpe-mou-krde Lasarus mz nzbzngr, sc tzlenepelr nrpa lc.

<sup>18</sup> X kx nzxlr leplz kx nzkqlung rkx lcde, sc tzykr-ngrmlr mz Jiszs.

<sup>19</sup> Zbz sc tzipi-etrpe Farzsi kx, "Mzlangeng, tryatrpewzkuu bade. Murde lr Jiu mz mztea amrlx nzvz-nqblqpelr nide."

### *Jiszs Ycmnetr-ngrde Nzbz-krde*

<sup>20</sup> Kzdung lr Grik nzprtrpzng mz leplz kcng tzvzdzng Jerusalem mz nzakaputr-krmlr Nzamyangr.

<sup>21</sup> Lr Grik lcng nzipibzlr mz Filip kx, "Kxetu, rpikr naycmnekr badr Jiszs."

<sup>22</sup> Filip sc tqpipebzle mz kzdq lr mrnyzde, Adu. X sc tzvzmipebzlr lr Grik kcng mz Jiszs. Tzpipebzlr kx, "Kxetu, leplz lcng trngiulrjiu nzipilr naycmneamu badr."

---

✧ **12:13** Sam 118:25-26 ✧ **12:14-15** Szfznaea 3:16 ✧ **12:14-15** Sekaraea 9:9

<sup>23</sup> Mz nzayzlu-krbzle natqdr, Jiszs yapwxtipxbzle nzbz-krde kx na-arlapxle leplz kxnzkqlung. Rpibzle kx, “Ninge Mrlx Leplz. X mzli ka sc tqkrlzpebzle mzli r nzbz-krnge x nzvzdz-krnge Heven.

<sup>24</sup> Naycmne-ebzpxbo nra wit. Murde nra wit nataole mz drtc' x namibiole mz nzryrlq-krbzle nrade kxkqlung. Nzmu trtaoleu mz drtc', esz'tx alo. Mz nzmu-krde lcde, na-apux nra wit mz nzbz-krnge murde na-arlapxx leplz kxnzkqlung.

<sup>25</sup> Murde doa kx otr-zvzngr drtwrde nzlu-krde mz nrlc ka, sa namale-lvile nzlungr kxboi. A' doa kx yrlqtxole nzlu-krde mz nzvz-nqblq-krde ninge, sa naptr mz nzlungr kxboi. ✧

<sup>26</sup> X mrlx kznike nawztrp bange navz-nqblqmle ninge, murde kxnzawz nengeng sa namnc-zvz-kzng mrkc namnc-ngrne. X Trtenge sa na-amatq leplz amrlx kcng tzwztrpqng bange.”

<sup>27</sup> X mz nzaotikr drtwrde nzbz-krde lc, rpi-mople kx, “Mzli ka nabznge talvzo. ?Mrlz nzrlxti-krbo mz Trtenge kx bzkq rlrpx-ngrde nzbz-krnge? A' trtingr! Murde vz-nqblqle me pnz drtwrde. X vz-ngrmc mz nrlc murde na-angidatix da amrlx kcng naprtzmqng bange mz nzbz-krnge.

<sup>28</sup> Trte, krka'-ngrne kx nzmyalz-krm na-aelwapxngr mz nzmnc-krnge. Eu, angida.” X mzli kcpwz Gct ycmneom Heven, rpile kx, “Nzmyalz-krnge aelwapxpe-ngrbo x sa na-ale-moux.”

---

✧ 12:25 Matiu 10:39; 16:25; Mak 8:35; Luk 9:24; 17:33

<sup>29</sup> Kx nzxlr leplz kcng natq Gct, kzdung nidr nzrpilr bzlrmei. A' kzdung nidr nzrpibzlr kx, "E trtingr, enjrl ne Gct ela tqycmnebz bade."

<sup>30</sup> A' rpibz Jiszs badr kx, "Natq lc trngiu dalr nzokatr-krde ninge, a' ngi dalr nzokatr-krde nimu. Murde nakrlzamu kx Gct atwzlr-ngrmle ninge."

<sup>31</sup> Mzli ka krlzmle mzli r nzippxkr Gct kx lr nrlc nzvz-rbrng. X krlz-kzple mzli r nzaovxiokr Gct zmatq ngr Setzn, Kxetu r nrlc ka.

<sup>32</sup> A' ninge Mrlx Leplz. X mzli kc naglqlz-ngrdr ninge, sa navectrpc' leplz amrlx bange."

<sup>33</sup> Mz natq lcng aelwapx-ngrde kx nabzom mz kros.

<sup>34</sup> Rpibz leplz kcng bade kx, "?Nabzq? A' Lou scgu alvztr-ngrde nigu kx trpnzng nzbzkr Kxnmcp. ?Nike tqrpi-ngrn mzli kc naglqlzng Mrlx Leplz mz kros? ?Mrlx Leplz kznike?" \*

<sup>35</sup> Rpibz Jiszs badr kx, "Apux zyzlr. A' sa namncbepo bamu mzli kxpipz. Mz nzmukrde lcde, navz-nqblqamu nzalvztr-krngeng mzli ka tqmncbe-ngrbo bamu, murde ma tqtaoamu mz alwx kc tqakamrbr-ngrbzle da mz nabzmu. Murde doa kx vz-nqblqle da kx tropxu vz-rbr zvz.

<sup>36a</sup> Delc, mzli lc tqmncbe-ngrbo bamu, na-abrtrpa'mu drtwrmu bange, murde nanginimu doa nengeng mz nzale-krmu da kxtubq."

---

\* **12:34** Traopxpwzu mz lr Jiu kx Nzryrnrkxtr rpilr kx Kxnmcp na-aetqzb drtqde x naobqszo nide, na-atrkati nide, x nanibq nide. [Sam 22:1-18; 69:8, 11, 20-21; 118:22a; Asaea 53:1-12] Murde nzlxngitilr natq Gct kx rpilr kx nangi king kc etu, na-aovxioler enqmi rdrng amrlx, x na-acive-alole leplz amrlx. A' trnzlxngitilru natq kzbleng.

### *Lr Jiu Vz Zvz Trnzlxngiti-krdr Jiszs*

<sup>36b</sup> Yrkrpxbz nzymne-krbz Jiszs, sc tqvzpekr badr mz nzmnc-kapq-krgr.

<sup>37</sup> Murde trnzlxngitilru nznngini-krde Kxnm-cpx, kxmule-esz' r kx kcng kqlung tqalele, tzaelwapx-ngrdr zmatq ngr Gct.

<sup>38</sup> Mz nzm-krde lcde, sc tqatutrpele natq Profet Asaea mz nzrpi-krde kx, "Yawe, trpnzng kx lxngitile natqnge, x trpnzng kx rkrlz zmatq kc tqaelwapx-ngrgr." ✧

<sup>39-40</sup> X mz trnzlxngiti-krdr lc, angidatipe-kzle natq Gct kc tqpipx Asaea, mz nzrpi-krde kx, "Mztr nzakcpebz x nardr nzamqngipebz, murde nzpxtxpx-ngrdr nzm-krdr x nzlxlngiti-krdr da angidr. Mz nzm-krde lcde, rblxbz badr nzyzlu-krmlr bange murde na-arlapxx nidr." ✧

<sup>41</sup> Krlc tqkxmu nzryapwxkr Asaea lc, murde mpe-kaile nzmyalzkr Kxnmcpx mzli kc navz-ngrmle mz nrlc.

<sup>42-43</sup> Yzuo mzli lc, kxnetu r lr Jiu nzkqlung kx nzlxlngitilr Jiszs. A' trnzpinedru murde nzmwxlritilr Farzsi, ma tzyrlqtrpzlr nidr yz mz mangr-nzkrka'ngr x tzmapulrpx-ngrdr nidr mztea. Murde nzmrlzkr badr nzglqpxkr leplz nidr myaszpxle nzglqpxkr Gct nidr.

### *Nzayrplapxng Vzxpm Mz Natq Jiszs*

<sup>44</sup> Jiszs natqde etutx mz nzrpi-krbzle mz zbo ngr leplz kcng kx, "Doa kx lxngitile ninge, trlxngitileu ninge esz'-krnge, a' lxngiti-kzle Gct kc tqatwzlr-ngrmle ninge." ✧

---

✧ **12:38** Asaea 53:1; Rom 10:16 ✧ **12:39-40** Asaea 6:10 ✧ **12:44** Matiu 10:40; Mak 9:37; Luk 10:16

<sup>45</sup> X doa kx mcle ninge mcpe-kzle Gct.

<sup>46</sup> Vzmc apux zyzlr kc tqaewapx-ngrbzle mz lr nrlc kxnamu nzrlapx-krdr, murde doa kx lxngitile ninge trnataopeu mz alwx.

<sup>47</sup> A' doa kx xlrle nzymne-krnge x trlxngitileu, trna-ayrplapxwxu nide. Murde trvz-ngrpwc'u nzayrplapx-krnge lr nrlc, a' vzo-ngrmc Heven nzarlapx-krnge nidr.

<sup>48</sup> A' nzayrplapxngr nidr vzpxm mz kxmu nzyrlq-krdr natqng. Doa kx mapulrpx-ngrde ninge x pxtpx-ngrde natqng, vz-rbrpe x sa na-ayrplapx mz Mzli Kxmatq kc navzm.

<sup>49</sup> Murde natq lcng tqpibo trnzvzpxpwqung bange, a' krlcng tqpibo natq kx nzvzpxmqng mz Trtege. Natq lcng kamle bange kx napibo bamu.

<sup>50</sup> X krlzx kx nzlungr kxboi vzpxm mz natq kx kamle. Mz nzmukrde lcde, pix da kx pim Trtege napibo bamu.”

## 13

### *Jiszs Ycpqtibzle Nanyc Ncblo Nedeng*

<sup>1</sup> Mzli kc nepi trtaoka-ngrde x trkrlzkapzle Nzamyangr, Jiszs krlzpe-kaile kx mzli r nzrlasz-krde nigr ycpe pipz, mz nyzylu-kr-mopwzle mz Trtede. X mz nzmrlzti-zvz-krde leplz nedeng mz nrlc, aelwapx-ngrmle nzetukr nivz lrde bagr.

<sup>2</sup> Mzli kc mz milzpq, nigr badr Jiszs sc tqmul-vzpekr Nzamyangr. X kzdq nigr, Judzs Iskariot, yrlqtrpebz Setzn mz nabzde nzamwa-krde Jiszs.

<sup>3</sup> A' Jiszs krlzle kx aprcpebz Gct zmatq ngr da amrlx kcng naprtzbzng bade. X krlz-kzle kx prpxm mz Gct x nayzlu-mopwz bade.

<sup>4</sup> Delc, mzli kc tqmube-ngrgr, tulzm, sc tqwztr-pem bagr. Aotxole nzq scde kc tqrmnrtr-ngrbz, x rtrngztibzle taol pewi-lzbq-ngrde.

<sup>5</sup> Zbz sc tqpuliopole kcng lue mz dis, x ycpqti-ngrbzle nanycgr. X amingrtibzle mz taol kc.

<sup>6</sup> Kx krlzbzle kc Saemon Pita, rpibz Pita bade kx, “?Kxetu, da zpwxpe kx na-avzo-lzbqppeme mz nzycpq-krbzme nanycge?”

<sup>7</sup> Rpibz Jiszs kx, “Mzli ka trkrlzkalq da lc tqtrngztibo. A' sa nakrlzq mzli lc navzm.”

<sup>8</sup> Rpibz Pita kx, “Trtxpnzngz nzycpq-krbzme nanycge.” Rpibz Jiszs kx, “Nzmu kx trycpqpwu' nim, trvz-nqblq-angidrpewq ninge.”

<sup>9</sup> A' Saemon Pita narde tryrplatrpwzu mz natq Jiszs, x sc tqrpi-mopwzle kx, “Kxetu Lod, bzkq ngi txpwz nanycge, a' mqnge x narng kx.”

<sup>10</sup> Rpibz Jiszs kx, “Pita, doa kx kipope, drtqde prkipe. X trpengr nzkipo-krde a' ngi txpwz nanycde, murde nzblqking mz nzayo-krde mz lrpzki. X nabzmu lqngi, a' kzdq nimu esz', trtingr.” \*

<sup>11</sup> X krlc tqrpi-ngrmle kx, “A' kzdq nimu esz', trtingr,” murde krlzpele kzdq nigr na-amwale nide.

<sup>12</sup> Mz nibr nzycpqti-krbzle nanycgr, kq-mou-ngrde nzq scde x sc tqyzlupe mou mrkc tqwxbulz-ngrde mz tebol. Sc tqrpipemle bagr kx, “?Krlzpeamu da lc tqwaisz-ngrne nimu? ☆

---

\* **13:10** Krlc drtwr ngrde kx Jiszs alqti-pele nidr, a' alwx kznikeng nzale-moulr naycpqtipx-moung mz nzplzpx-krdrileng. ☆ **13:12** Luk 22:27



<sup>13</sup> Rpimamu bange ninge Kxakrlz x Kxetu rmu, x da zpwxtx nzpi-krmamule.

<sup>14</sup> X kxmule-esz' ninge Kxakrlz x Kxetu rmu, a' avzo-lzbqx mz nzycpqi-krbo nanycmu. X kxnamu-kzamu lc, na-avzo-lzbqamu mz nzycpqi-etr-krmu nanycmu.

<sup>15</sup> Nakrlzamu kx aelwapx-ngrbo lrpzki bamu, murde navz-nqblqamu nike alebo bamu, mz nzavzo-lzbq-krmu x nzokatr-etr-krmu.

<sup>16</sup> Da angidrtx lc napibo bamu. Trpnzngr kxnzawz kx myaszlzle kxetu rde, x menrpa trmyaszlzleu doa kx atwzlr-ngrde nide. Mz nzmukrde lcde, takitrde nimu menrpa nengeng naokatr-etramu. ✧

<sup>17</sup> Nzmu nakrlz-angidramu da lcng, Gct sa naaelalzmle drtwrmu mz nzvz-nqblq-krmuleng.”

*Jiszs X Ncblo Nedeng Nzmulvzlr Nzamyangr  
Matu 26:17-25; Mak 14:12-21; Luk 22:7-13, 21-23*

<sup>18</sup> Jiszs rpi-mople bagr kx, “Trycmnetrwxu nimu amrlx ngrmu mz nzrpi-krbo kx nabzmu lqpe. Krlzx kx mcpxx nimu amrlx ngrmu. A' nzymnekr Nzryrngrkxtr na-atutr, mz nzrpi-krde kx, ‘Mzli ka kztenge kc tqmukr ncd, nipe-kzde enqmi rnge.’ ✧

<sup>19</sup> Napi-pnzbo da lc, murde mzli kc nakaputr-ngrmle, sc tqlxngitipeamu kx ninge Kxnzmcpx ne Gct.

<sup>20</sup> Da angidrtx lc napibo bamu. Doa kx abrtzlvzle ncblo kx atwzlrpx-ngrne, lxngiti-kzle

ninge. X mz nzlxngiti-krde ninge, lxngiti-kzle Gct kc tqatwzlr-ngrmle ninge.” ☆

<sup>21</sup> Zbz mz nibr nzycmne-krde lc nabz Jiszs sc tqtalvzope. X sc tqrpipe-mople bagr kx, “Da angidrtx lc napibo bamu. Kzdg nimu sa namwale ninge mz enqmi rngeng.”

<sup>22</sup> A' kx xlrbzkr nzycmne-krde, sc tqobq-etrpekr kx neke mz nigr kc tqpile, murde trkr-lzkru.

<sup>23</sup> X wxbutrpo bade, mz nrlarde kxrtc.

<sup>24</sup> Zbz Saemon Pita kc nrlar mzte tqaopemle bange, kx naveatibo kx nelc tqpile.

<sup>25</sup> Dtrrpo nrlarde x sc tqveapebo bade, rpibo kx, “?Kxetu, neke tqkxmu nzpi-krmle ke?”

<sup>26</sup> Ayzlu-ngrmle natqngc kx, “Mrlx kc naleobo bret nade mz lue lr supsup.” Zbz kx leole kc nctq bret kc, sc tqkapebzle mz Judzs Iskariot, mrlx Saemon.

<sup>27</sup> Mz nibr nzngqkr Judzs bret kc, Setzn kc tqprtrpebz bade, a' tropxu mz mzkr. X sc tqrpipebz Jiszs bade kx, “Aniti nike nartrngztibzme.”

<sup>28</sup> A' trpnzngr nigr kx rkrlz drtwr ngr nzycmne-krbz Jiszs lc bade.

<sup>29</sup> Murde mz nzaclve-krbzle kc traу scgr, mz drtwrgr kzdung nigr naxpe kzdung kz dalr Nzamyangr o narkabz traу mz kxtrnzrngiscung.

<sup>30</sup> Mz nibr nzngqkr Judzs nctq bret kc, tulzm x

---

☆ **13:20** Matiu 10:40; Mak 9:37; Luk 9:48; 10:16

sc tqdwapxpe yz. X mzli lc nzlo kc tqyzutrpe. †

### *Natq Kxmrna*

<sup>31</sup> Mz nibr nzvzpekr Judzs, rpim Jiszs bagr kx, “Mzli ka ninge Mrlx Leplz, ycpe pipz nzaelwapxngr nzmyalz-krnge. X nike na-alex sa na-aelwapx-kz-ngrde nzmyalzkr Gct.

<sup>32</sup> X nzmu na-aelwapx-ngrne nzmyalz-krde, Gct esz'-krde sa na-aelwapx-kz-ngrde nzmyalz-krnge. X nzale-krdele trnamnetiu.

<sup>33</sup> Doa nengeng, namnctibo bamu mzli kx mrbcne. Mz nzmu-krde lcde, sa nartangrtiamu ninge kalr. A' napi-kzpo bamu natq kcpwz tqpiibo mz kzdung kxnzetu r lr Jiu, mz nzrpi-krbo kx, ‘Mrkc navzkix, trgalr ena nzvz-krmamu elr.’

☆

<sup>34</sup> Natqngce kxmyapxbz kxmrna nide sele: ‘Namrlzti-lzbqamu, da kc tqwai nzmrlzti-krnge nimu.’ ☆

<sup>35</sup> Mz nzmrlzti-lzbq-krmu lc, sa na-aelwapx-ngrbzmuz mz leplz amrlx nzngini-angidr-krmu leplz nengeng.”

### *Plzpx-kaipz Jiszs Nzrpikr Pita Trkrlzleu Nide Matiu 26:31-35; Mak 14:27-31; Luk 22:31-34*

† **13:30** Natq lc tqngi nzlo, ngi kzdq nzymne-ebzpxngr. Murde nzlo drtwr ngrde nyzutrkr da kxtrka kcng amrlx tzwaisrngr Jiszs, mz nzamwagr Judzs kc nide, mz nzlolvzkr kxnzetung nide, mz nzvzmi-krdr nide mz kot, mz nztqlvztr-krdr nide mz kros, x mz nzbz-krde. Judzs apule ncblo kx vzne mz nrckxbq x tao mz alwx, murde da angidr trycpxpuz mz nabzde. Mc Jon 11:9-10.

☆ **13:33** Jon 7:34; 8:21 ☆ **13:34** Jon 15:12, 17; 1 Jon 3:23; 2 Jon 5

<sup>36</sup> Rpibz Saemon Pita bade kx, “?Kxetu, drlve kc navzkiq?” Rpibz Jiszs bade kx, “Trnavz-nqblqpwe'u ninge mzli ka, a' vz-nqblq-krllzpwq ninge kalr.”

<sup>37</sup> Rpibz Pita kx, “?Nike trnavz-nqblq-ngrpwc'u nim mzli ka? Murde nabz-ngrbo nim.”

<sup>38</sup> Rpibz Jiszs kx, “?Nabz-ngrn ninge? Da angidr tx lc napibo bam. Koma mz nrlckxbq nzrpi-krm kx trkrlzwq ninge nzwrde natq, x natq kio kx ayrrngr kc ate.”

## 14

### *Jiszs Ngi Lrpzki, Da Angidr, X Nzlungr*

<sup>1</sup> Jiszs rpi-mople bagr kx, “Bzkq nelzmu taprlzm. Abrtrpzmu drtwrmu mz Gct x abrtrkzpa'mu drtwrmu bange.

<sup>2-3</sup> Murde mrkc Heven ma nyz Trtenge kqluesz'ngr, x navz-kaipo mrlcde mz nzoliqtixkrbo nzvz-krmamu. Dekc, nayzlu-ngr-mopwc' mz nzvzmi-krnge nimu, murde namnc-aloamu mrkc tqmnc-ngrne. X takitrde nzlxngiti-krmu natqngeng murde trkrlzwxu nzpokianger.

<sup>4</sup> “X krlzamu mrkc navzkix x lrpzki rde.”

<sup>5</sup> Rpibz Tomas kx, “Kxetu, trkrlzkru mrkc navzkiq. ?Mz nzmu-krde lcde, myx kxnamu nakrlz-ngrgr lrpzki lc?”

<sup>6</sup> Rpibz Jiszs bade kx, “Ninge lrpzki, da angidr x nzlungr. Ninge lrpzki kc nao-zli mz nzrkrlz-ngrbz Heven. X ninge kx na-aelwapx-ngrbz da angidr kx vzpxm mz Gct. X ninge kz nou nzlungr kxboi. Mz nzmu-krde lcde, trpnzng kx navztxnebz mz Trtenge, a' navzki-kaiple bange.

<sup>7</sup> “Murde mz nzkrz-angidr-krmu ninge, nakrlz-kzamu Trtenge, murde apux nide. X abzo mzli ka mcpeamu nide x krlzpe-kzamu nide.”

<sup>8</sup> Rpibz Filip kx, “Kxetu, da kx rlxti-txpwzkr bam, aelwa-ngrm bagr Trtem.”

<sup>9</sup> Ayzlu-ngrbz Jiszs natqde kx, “?Filip, myx kxmule? ?Mnctipebo bamu mzli boipe, a' sc trkrzkalq ninge? Murde doa kx mcpele ninge, mcpe-kzle Trtenge. ?Memule tqrpi-ngrme kx na-aelwa-ngrbo Trtenge bamu?”

<sup>10</sup> ?Myx kxmule trlxngitiwq kx sc tqmncbo mz Trtenge x Trtenge sc tqmncm bange? Murde natq kcng tqpitibo bamu, nzvzpxmqng mz Trtenge, a' trnzvzpxpwqung bange. X wz-nqblqx me pnz drtwr Trtenge, kc tqmncpxm bange.

<sup>11</sup> Takitrde nzlxngiti-krm kx sc tqmncbo mz Trtenge x sc tqmncm Trtenge bange. Kxmule-esz' a' nalxngitiamu mz nzmc-krmu rrx kcng tqalexng.

<sup>12</sup> Da angidrtx lc napibo bamu. Doa kx lxngitile ninge sa na-ale-kzle rrx lcng tqalexng. X sa na-ale-kzle du rrx kx namyapxbzng, murde nzvzpx mz Trtenge.

<sup>13</sup> X da kx rlxtiamu mz zmatq r drtqng sa na-angidabo, murde na-aelwapx-ngrne nzmyalzkr Trtenge.

<sup>14</sup> X mzli kznike narlx-ngrmamu dq da mz zmatq r drtqng, sa na-angidabo.”

### *Jiszs Esalz-ngrde Mqngrkxtr*

<sup>15</sup> Rpi-mop Jiszs bagr kx, “Nzmu mrlztiamu ninge, yrlq-angidramu natqng.

<sup>16</sup> X sa narlxtibo mz Trtenge, nzatwzlr-mou-krmle dq Kxokatr kx namnc-alobz bamu.

<sup>17</sup> Krlcde Mqngrkxtr kc tqaelwapx-zvz-ngrde da angidr. Rblxbz mz lr nrlc nzlxngiti-krdr Mqngrkxtr, murde trnzglxlr nide x trnzkrlz-angidrleu nzwz-krde. A' nimu, krlzpeamu nide, murde sc tqmncbz bamu x sa navztrp mz nabzmu.

<sup>18</sup> Mzli kc nadwasz-ngrne nimu, trpnzngr nzaxtx-krbo nimu nzapu-krmu doa kxnbzszng. Murde na-apule kx ninge la nayzlu-mopwc' mz Mqngrkxtr.

<sup>19</sup> Ycpe pipz trnzmcpeu lr nrlc ninge. A' sa namc-mouamu ninge. Murde nzlu-krmu kxmrna vzpxm mz nzlu-mou-krnge.

<sup>20</sup> X mzli lc Mqngrkxtr navzpx-ngrmle bamu, sc nakrlz-ateamu kx mncho mz Trtenge, x mnc-mamu bange, x mncho bamu.

<sup>21</sup> Doa kx yrlq-angidrle natqngc, mrlztile ninge. X mz nzmrlzti-krde lc ninge, sa namrlzti kz Trtenge nide. X sa namrlzti-kzx nide x na-aelwalzbq-ngrbo bade."

<sup>22</sup> Zbz sc tqrpipebz Judzs kzble kx, "?Kxetu, nixpwzgr, a' lr nrlc trtingr?"

<sup>23</sup> Rpibz Jiszsz bade kx, "Doa kx mrlztile ninge yrlq-angidrle natqngeng. X mrlzti zlwz Trtenge, x sa navzmgr x namncpx-kzpggr bade.

<sup>24</sup> A' trnavzpggru mz mrlx kx trkati nivz lrde ninge, x tryrlq-angidrleu natqngc. Murde natqngc lc trvzpxpuu bange a' vzpxm mz Trtenge kc tqatwzlr-ngrmle ninge.

<sup>25</sup> "Napipx-pnzbo bamu da lcng mzli ka tqmncbe-ngrbo bamu.

<sup>26</sup> Murde sa na-atwzlr-ngrm Trtenge Kxokatr kc tqngi Mqngrkxtr, mz zmatq rngi. X sa nalvztrle nimu mz da amrlx kx takitrde nzrkrlz-krmuleng, x na-adcpw-mopwzle drtwrmu mz natq amrlx kcng tqpitibong.

<sup>27</sup> “Amnqlvz-ngrne nimu nzmnc-zpwxngr kc tqycm bange. Murde nzmnc-zpwxngr kc tqkabo bamu, trapuleu nzmnc-zpwxngr mz nrlc, a' yc-amqngi zvz. Bzkq nelzmu taprlzm x ayo, x bzkq mwxlramu.

<sup>28</sup> Xlrpemamu nzpi-krbo kx narkalzpemc x sa nayzlu-mopwc' bamu. Nzmu namrlzti-angidramu ninge, naelalz-ngrm drtwrmu nzvz-krbo mz Trtenge, murde myapxbz mz ninge.

<sup>29</sup> Mzli ka, napi-pnzbo bamu da lcng x mzli r nzkaputr-krmlr kc ate. Murde nzrlxngiti-krmu naxplr, mzli kc nakaputr-ngrmlr.

<sup>30</sup> Nzycmne-krbo bamu naesakitxpe mzli ka, murde Setzn kc tqngi kxetu r nrlc ka, se tqvzpem. Kxmule-esz', a' trpnzngr nzmncz-krbo bade murde trpnzngr da kx vz-rbrtix.

<sup>31</sup> A' rtrngzti-ngrbo da amrlx kcng tqpitim Trtenge bange, murde nakrlz lr nrlc kx mrlztix nide. Delape. Tulzamu, navzpeku.”

## 15

### *Jiszs Nide Nounc Angidr*

<sup>1</sup> Mzli kc tqvz-ngrgr mz lrpzki, Jiszs rpi-mople bagr mz nzycmne-ebzpxngr kx, “Ninge nounc angidr, x Trtenge nide kx ngi nyzde nrlanc.

<sup>2</sup> Lakitxpx-atwrnr-ngrdeng nrlangeng amrlx kcng trpnzngr nradr. X nrlangeng kcng nradr tqycbz lvxoleng murde nado zlwz.

<sup>3</sup> X mz nqmq kcpwz, natqnge alqtile x okatrlle nimu mz nzale-krmu da kxmrlz.

<sup>4</sup> Trpnzngr nrla nounc kx nado mz nide esz'-krde, a' natutrpwz mz noude. Kxmu-kzle lc mz nimu. Na-axvctr-lzbqmmamu bange murde namncbo bamu. A' nzm trna-axvctr-lzbqpwa'muu bange, trpnzngr nramu, murde ninge nou nzlu-krmu.

<sup>5</sup> "Ninge nounc x nimu nrlangeng. Doa kx axvctr-lzbqbz bange x mncbo bade, sa nado zlwz. Trpnzngr da kxmrlz kx nartrngztibzmu nzm trna-axvctr-lzbqpwa'muu bange.

<sup>6</sup> X doa kx lakipx-lzbqm bange, trpnzngr nrade. A' nrlade kxmule lcng takitxtrpwzle nzangcng mzyr.

<sup>7</sup> A' nzm na-axvctr-lzbqmmamu bange x yrlq-angidramu natqnge, krlzamu nzrlxti-krbzmu mz Gct da kx suti drtwrmu, x sa na-angidabzle.

<sup>8</sup> Mz nzaxvctr-lzbq-krmmamu bange, dekc nado-zlwz-ngrnamu x na-aelwapx-ngrnamu kx nimu leplz nengeng. X nramung na-aelwapx-kz-ngrdr nzmyalz-esz'ngrkr Trtenge. \*

<sup>9</sup> "Mrlztix nimu da kc tqwai nzmrlztikr Trtenge ninge. Mz nzm-krde lcde, namncz-zvzmamu mz nivz lrnge.

<sup>10</sup> X sa namncz-zvzmamu mz nivz lrnge nzm nayrlq-angidramu natqnge. Da kc tqwaix nzyrlq-angidr-krbo natq Trtenge, x mncz-zvzbo mz nivz lrde.

---

\* **15:8** Mz nzycmnekr Jisz, rpile 'Ninge nqvi lr grep angidr.' Mz Nzryrngrkxtr *nqvi lr grep* drtwr ngrde lr Jiu ngr Israel. Mz nzrpi-krde kx nide angidr nqvi lr grep, mxw drtwr ngrde kx lr Israel trznnginpedru nqvi lr grep angidr.



11 Pipxbo bamu natq lcng murde na-abrtzlvzx nimu x nabzmu na-abrtz zvz. ☆

12 “Natqnge kx nayrlq-angidramu nide sele, ‘Mrlzti-lzbqamu da kc tqwai nzmrlzti-krnge nimu.’ ☆

13 Nivz kx myapxbz rlrpx-ngrde nzlu-krde mz nzokatr-krde mzledeng.

14 X sa nanginimu mzleeng, mz nzyrlq-angidr-krmu natqnge.

15 Mzli ka trpengr nzrpi-krbo nimu kxn-zawzng, murde kxnzawz trkrlzleu da kcng tqtrngztibz kxetu rde. A' nipemu mzleeng, murde da amrlx kcng tqxlrtrpo mz nao Trtenge, tqpitipebo bamu x krlzpeamu.

16 Trmcpxwamuu ninge, a' mcpxx nimu murde nramu nakqlu zvz. X da kznike rlxtibzmu mz Trtenge mz zmatq r drtqnge, sa na-angidabzle.

17 Yrlq-angidramu natqnge lc, ‘Mrlzti-lzbqamu.’ ” †

### *Leplz Neng Jiszs X Lr Nrlc*

18 Jiszs rpi-mople bagr kx, “Bzkq kctipxamu mzli kc napxtpxngr lr nrlc nimu, murde nzpxtpx-kai-ngrdr ninge.

19 Kqlcx nimu murde nablepxbzmu mz lr nrlc. Delc tzpxtpx-ngrdr nimu. A' nzmu nanginimu lr nrlc, sa namrlztilr nimu murde nzmrlzti-zvzlr lr mrnyzdr.

20 Nadcpx mz drtwrmu da lc tqpibo bamu, ‘Trpnzng kxnzawz kx myaszlzle kxetu rde.’ Nzmu kx tzatrkatilr ninge kc tqngi kxetu rmu, sa

---

☆ 15:11 Jon 3:29; 17:13 ☆ 15:12 Jon 13:34; 15:17; 1 Jon 3:23; 2 Jon 5 † 15:17 Gct sa naka-tpwzle da mz nzvz-nqblq-krde me pnz drtwrde.

na-atrkati-kzlr nimu mz nzngini-krmu kxanzawz nengeng. A' nzmuz nayrlqlr natqnge, sa nayrlq-kzlr natqmu. ✧

<sup>21</sup> Lr nrlc sa na-atrkatilr nimu mz nzngini-krmu leplz nengeng, murde trnzkrzlru Gct kc tqatwzlr-ngrmle ninge.

<sup>22</sup> Nzmu trnaxlrlru natqnge, trpnzngr alwx ngrdr. A' alwx ngrdr tutr mz nzpxtxpx-krdr natqnge.

<sup>23</sup> Murde doa kx pxtxpx-ngrde ninge pxtxpx-kz-ngrde Trtenge.

<sup>24</sup> Kxmule-esz' nzmcpelr nzale-krnge da kcng tqmatq-esz'ngr, kx trpnz-moungr kx rkrlz nza-lengr, a' alwx ngrdr tutr mz nzpxtxpx-zvz-krdr nigr ncdr Trtenge.

<sup>25</sup> Da lcng nzatutrlr natq kcng mz Nzryrn-grkxtr, tqrpilc kx, '*Nzpxtxpx-krdr ninge trpnzngr noude.*' " ✧

### *Kxokatr Kc Tqngi Mqngrkxtr*

<sup>26</sup> Jiszsz rpi-mople bagr kx, "Sa na-atwzlr-ngrmc Kxokatr bamu. Krlc Mqngrkxtr, kc tqngi nou da angidr amrlx, tqvzpxm mz Trtenge. Mzli kc navzo-ngrmle, sa na-aelwapx-ngrbzle ninge bamu.

<sup>27</sup> X mzli lcde, nayapwxtipxamu ninge, murde mnctrpa'mu bange abzo mz mzli kc ayrrngr tqwz-ngrne mz nrlc.

## 16

<sup>1</sup> "Pi-pnzbo da lcng bamu, murde nzrlxngitkrmu ma tqbao mzli kc lr nrlc nzatrkatigrdr

---

✧ **15:20** Matiu 10:24; Luk 6:40; Jon 13:16    ✧ **15:25** Sam 35:19; 69:4

nimu.

<sup>2</sup> Sa nayrlqtrpzlr nimu yz mz mangr-nzkrka'ngr x namapulrpx-ngdrdr nimu mztea. X mzli kc navzm, sa nanibqlr nimu, mz nzrpi-krdr kx nzwztrpzng mz Gct.

<sup>3</sup> A' sa nartrngztibzlr da lcng, murde trnzkr-lzlu nigr ncdrr Trtenge.

<sup>4</sup> Mz nzmu-krde lcde, nzrlxngiti-krmu namqngi mz nzdctipxkr drtwrmu kx pi-pnz-kaipo da lcng bamu. A' trpi-pnzpwc'u bamu mzli kc kai, murde nigu la tqmncbeku.

### *Nzwzkr Mqngrkxtr*

<sup>5</sup> "A' mzli ka nayzlupe-ngrbo mz Gct kc tqatwzlr-ngrmle ninge. X trpengr nzrpi-krmu kx, 'Navzn drlve?' ✧

<sup>6</sup> Murde drtwrmu vztz-zlwzpe mz nzpi-krbo bamu nzvzpe-krnge.

<sup>7</sup> A' da angidrtx lc napibo bamu. Mrlzvxitx nzprszpx-krbo nimu. Murde mz nzvz-krnge, sa na-atwzlr-ngrmc bamu Kxokatr, kc tqngi Mqngrkxtr. A' nzm trnavzwxu, Mqngrkxtr trnavzopuu bamu.

<sup>8</sup> X mzli kc navzo-ngrmle, sa na-aelwapx-ngrbzle mz lr nrlc kxnaleng alwx, x nztubq-krdrng trtakitrdeu, x nzaolvz-krdrng da vz-rbr.

<sup>9</sup> Sa na-aelwapx-ngrbzle badr kx alwx ngdrdr kxmyapxbz tutr mz trnzrlxngiti-krdr ninge.

<sup>10</sup> Mz nyzylu-krbo mz Trtenge trpe-moungr nzmc-krmu ninge. A' Mqngrkxtr sa natekqtrle ninge mz nzpi-krbzle mz lr nrlc kx nztubq-krdr

---

✧ 16:5 Jon 13:36; 14:5

trtakitrdeu. Murde sa na-aelwapx-ngrbzle badr nztubqkr nzmnc-krmu.

<sup>11</sup> X sa na-aelwapx-kz-ngrbzle badr kx nzaolvz-krdrng vz-rbr mz nzpctxpx-krdr ninge. Murde kxetu rdr Setzn, aclve mz nrlc ka. A' pnzpe kai drtwr Gct kx sa na-ayrplapxle nide kalr.

<sup>12</sup> Da kq̄lu kx napi-mopc' bamu, a' trpengr nzpi-krboleng mzli ka, murde ma tq̄rblix-zlwzbz bamu.

<sup>13</sup> A' mzli kc navzo-ngrm Mq̄ngrkxtr kc tq̄ngi nou da angidr, sa na-alvztrpzle bamu nzalvztr-ngrng angidr amrlx. Murde trnaycmnetru mz nide esz'-krde, a' napi-tpwzle da kx xlrtrpzle ng mz nao Gct. X naplzp̄bxle bamu da kx navzm.

<sup>14</sup> X sa na-aelwapx-ngrde nzmyalz-krnge mz nzpipx-krbzle bamu nzalvztr-krngeng.

<sup>15</sup> X da amrlx kcng tq̄ngisc Trtenge, scngeng. Delc tq̄rpi-ngrbo kx, 'Mq̄ngrkxtr napip̄bxle bamu nzalvztr-krngeng,' murde nzalvztrngr lcng nzvzpx-kzpq̄ng mz Trtenge."

*Nzvzkr Drtwr Kxmrbcne X Nzabrtz-zvzngr*

<sup>16</sup> Jiszs rpi-mople bagr kx, "Mzli kx mrbcne x trnamcwamuu ninge, zbz sa namc-mouamu ninge."

<sup>17</sup> Zbz sc tzveati-etrpe kzdung nigr, tq̄rpipekr kx, "?Nike drtwr ngr natq̄ lcng tq̄pimle bagu? Murde rpi-kaile kx nayzlu-mopwz mz Trtede. ✧

<sup>18</sup> ?X nike drtwr ngr natq̄deng 'mzli kx mrbcne?' Trkrlzkuu da lc tq̄pile."

<sup>19</sup> Krlz Jiszs kx suti drtwrgr nzveati-krbzkrle bade, sc tq̄rpipemle kx, "Rpibo kx 'mzli kx

mrbcne x trnamcwamuu ninge, zbz sa namc-mouamu ninge.' ?Da kc tqveati-etramu nide lc?

<sup>20</sup> Da angidrtx lc napibo bamu. Lr nrhc sa na-abrtzlvzlr da kc nawaisr-ngrdr ninge. A' drtwrmu sa navztx zlvz x nayrniamu. A' nzyrni-krmu sa nalrtipxle nzabrtz-zvz-krmu. ☆

<sup>21</sup> "Na-apule mzli kc olvz narmc-ngrde mz doa. Mzli lc drtwrde vz murde sc tqkrlzpebzle mzli r nzetqkr drtqde. A' mz nibr nzmika-krde, mrbrtitrpe drtwrde nzetqkr drtqde, murde drtwrde elalz-ngrm doa kc mzte tzmc.

<sup>22</sup> Mz nzmukrde lcde, mzli ka drtwrmu vzpe. A' sa namc-moux nimu mzli kc natulz-mou-ngrne mz nzbzng, x nabzmu sa na-abrtz zlvz. X trpnzng kx narkatpxbz nzabrtzng lc bamu.

<sup>23</sup> Da angidrtx lc napibo bamu. Mzli lcpwz trpengr nzrlx-krmamu da bange. A' krlzamu nzrlx-ngrbz da mz Trtenge, murde da kznike rlxtibzmu bade mz zmatq r drtqnge, sa na-angidatile.

<sup>24</sup> A' trgalr da kx rlxwiamu mz zmatq r drtqnge. Mz nzmukrde lcde, rlxamu da x sa na-angidati Gct, murde nabzmu na-abrtz zvz." ☆

### *Nzodatingr Zmatq Ngr Nrhc*

<sup>25</sup> Jisz rpi-mople bagr kx, "Krlzmle mzli ka, ryapwpxbo mz nzymne-ebzpxngr. A' mzli lc navztrp trpengr nzymne-ebzpx-krbo da, murde sa naycmnetr-zpwxpe-ngrbo Trtenge bamu.

---

☆ **16:20** Sam 30:11 ☆ **16:24** Matiu 7:7-8, 11; 21:22; Luk 11:9-10; Jon 14:13; 15:19

26 X mzli lcde, trnarlxtipou da kx suti drtwrmu mz Trtenge, a' narlxpebzmu da bade mz zmatq r drtqnge.

27 Murde Trtenge mrlzti-zlwzle nimu mz nzmrlzti-krmu ninge x nzlxngiti-krmu kx vzpxmc bade. Delc, tqsutingr drtwrde nzrlx-angidrpe-krbzmu da bade.

28 Eu, vzpxmc mz Trtenge x vzomc mz nrlc. X mzli ka narkalzpe-mopwc' x nayzlupebo bade."

29 Rpibzkr bade kx, "Mzli ka tr-rycmne-ebzpxpewq da, a' sc tqryokaetipx-angidrpeq drtwr ngrde.

30 X sc tqkrlzpekr kx krlzq da amrlx, murde krlzq nzayzlu-aningr nike yc mz drtwrgr, a' tr-rlxtikapzkr. Mz nzm-krde lcde, sc tqlxngitipekr kx vzpx-angidrme mz Gct."

31 Rpm Jiszs bagr kx, "A' nzrlxngiti-krmu nrgobe mzli ka.

32 Murde koma mz nrlckxbq nimu kc tqmwxl-rpeamu x tqngrlr-lxblrpeamu mrnyzmung. Mzli lcde, sa namncpex esz'-krnge mz nzodaline-krmu. A' trnamnc-angidrwxu esz'-krnge, murde Trtenge sc tqmnc-zvzm bange. ✧

33 Krlc tqpipx-pnz-ngrbo da lcnq bamu, murde nabzmu naycngr nrwx, mz nzaxvctr-lzbq-krmamu bange. Kxmule-esz' lr nrlc sa na-atrkatilr nimu, a' bzkq mwxlramu, murde odatipex zmatq ngr Setzn mz nrlc."

## 17

### *Nzkrka'kr Jiszs Mz Nzngini-krde Nardr Pris*

*Ngrgu* ☆

<sup>1</sup> Mz nibr nzalvztrngr lcngr, Jiszs obqtxlz Heven mz nzkrka'ngr. X sc tqrpipebzle mz Trtede kx,

“Trte, mzli r nzbz-krnge x nyzylu-mou-krbo bam, delc tqkrlzpebzle. Aelwapxngr nzmyalz-krnge mz nzbz-krnge, murde nzbz-krnge na-aelwapx-ngrde nzmyalz-krm.

<sup>2</sup> Aprcm bange zmatq, murde leplz amrlx namnclzmqng bange, x nakabo nzlungr kxboi mz leplz nengeng kcng tqamnqtrpe'ng bange.

<sup>3</sup> Drtwr ngr nzlungr lc tqboi ngi nzrkrlzngr nim, Gct angidr kc esz'txu, x ninge Jiszs Kxnm-cpx kc tqatwzlr-ngrme mz nrlc.

<sup>4</sup> Aelwapxpe-ngrbo mz lr nrlc nzmyalz-krm, mz nzaykrpxpe-krnge nzwznggr amrlx kcng tqkame bange.

<sup>5</sup> Trte, mzli ka vzmi mou ninge Heven, murde natwz-moux me matq-esz'ngr kc tqngi nyz-pnzngc mzli kc nrlc trnzwzka-ngrde.

<sup>6</sup> “Alvztrpe-ngrbo nim mz leplz kcng tqamnqtrpe'ng bange mz nrlc, krkcng tzyrlq-angidrpelr natqm.

<sup>7</sup> X mzli ka nzkrzlpelr kx da amrlx kcng tqkatimeng bange nzvzpxmqng bam.

<sup>8</sup> Murde alvztrpe-ngrbo badr natqm kcng tqkame bange, x nzlxngitipelr natqm lcngr. X nzkrz-angidrpelr kx vzpxmc bam x nim kc tqatwzlr-ngrmle ninge.

<sup>9</sup> “Krka'-ngrtxpo leplz nengeng kcng tqamnqtrpe'ng bange, murde nidr leplz nemqng. A' trkrka'-ngrneu lr nrlc.

<sup>10</sup> X leplz kcnq tɔŋgi nengeng nemqng. X leplz nemqng nengeng. X leplz lcng nzaelwapx-ngrdr nzmyalz-krnge mz da amrlx kcnq tzalepelr mz nzwztr-krmlr bange.

<sup>11</sup> Mzli ka trnamncpewxu mz nrlc, a' namnctxpwc'ng nidr mz nrlc mz nzvzpe-krbo bam. Trte, nim tr-esz'ngr. Delc aclve-angidr bz leplz lcng mz zmatq ngr drtqm kc tqkame bange, murde naesz'ting da kc tqwaiki nzesz'ti-krgi.

<sup>12</sup> Murde mz nzmnc-krbo badr mz nrlc ka, sc tqaclvepex nidr mz zmatq ngr drtqm, x trpnzng nidr kx mrbr, a' ngi txpwz doa kx vz-nqblqle nqm q ngr nzodangr, mz nzatutr-krde Nzryrngkxtr. ✧

<sup>13</sup> “Mzli ka navzpebo bam. X mzli kc tqmnc-ngrbo badr mz nrlc, ryapwxbo badr da kxkqlu, murde nzabrtzngr angidr nayc zvz mz nabzdr.

<sup>14</sup> Alvztrpe-ngrbo badr natqm, x nzlxngi-tipelr. Mz nzm-krde lcde, nzpctxpxngr lr nrlc nidr, murde drtwrdr badr lr nrlc tresz'tipeu. Da kc tqwai-kzx trnzngini-krpwc'u lr nrlc.

<sup>15</sup> A' tr-rlxtpwc'u nzkatxpx-krm nidr mz nrlc, a' okatr nidr murde ma tzvecpx-lzbqng mz nzlxngiti-krdr ninge, mzli kc Setzn kc Tqdrka'ngr tqatrkat-igrde nidr.

<sup>16</sup> Eu, da kc tqwaix, drtwrgr badr lr nrlc tresz'tiu, drtwrdr badr lr nrlc tresz'ti-kzu.

<sup>17</sup> Alqngi nidr x atrbz nabzdr mz da angidr kx vzpxm mz natqm. ✧

<sup>18</sup> Murde atwzlrpx-ngrne nidr mz nrlc, da kc tqwai nzatwzlr-krme ninge mz nrlc.

✧ **17:12** Sam 41:9; Jon 13:18    ✧ **17:17** Sam 119:142; Jon 1:14; 14:6



19 X rlr-lzbq-ngrbo bam murde navqti kz drtqdr nzrlr-lzbq-krbzlr.

20 “Trngi-tpwzu leplz nenge keng mzli ka tqkrka'-ngrne. A' krka'-kz-ngrne doa amrlx kx nalxngitilr ninge kalr, mz nzxlr-krdr Nr-pakxmrlz.

21 Trte, krka'-ngrne kx naesz'ting mz nzmnc-krdr, da kc tqwai nzaxvctr-lzbq-krme bange x na-axvctr-lzbq-krmc bam. X na-axvctr-lzbq-kzpqng bagi, murde lr nrlc nalxngitilr kx atwzlr-ngrme ninge.

22 X me matq Heven kx kame bange, kape-kzpo badr, murde naesz'ting, da kc tqwai nzesz'ti-krgi.

23 X mncpxmc badr x mncpxme bange, murde naesz'ti-kzng amrlx ngrdr. X mz nzesz'ti-krdr lc nakrlzng lr nrlc kx atwzlr-ngrme ninge, x mrlztiq leplz nengeng da kc tqwai nzmrlzti-krm ninge.

24 Trte, suti drtwrnge kx leplz nenge lcng namnc-kzkr badr mrkc namnc-ngrne Heven. Murde namclr me matq-esz'ngr kc tqngi nyznge tqka-pnzme murde mrlztiq ninge mzli kc nrlc trnzwzka-ngrde.

25 “Trte, nqm q krm tubq-esz'ngr. X kxmule-esz' trnzkrizu lr nrlc nim a' krlzx nim, x leplz nengeng amrlx nzkrzlzlr kx atwzlr-ngrme ninge.

26 Aelwapxpe-ngrbo nim badr mzli ka, x sa na-aelwapx-kzpo nim mz krkcng nalxngiti-kzlr ninge kalr. Murde nidr amrlx ngrdr na-aelwapx-ngrbzlr mz leplz nivz kcpwz tqmrlzti-ngrn ninge. X namncpx-kzpc' badr mz Mqngrkxtr kc nam-

ncpxm mz nabzdr. Eu, angida.”

## 18

*Nzrlolvzngr Jiszs*

*Matiu 26:47-56; Mak 14:43-50; Luk 22:47-53*

<sup>1</sup> Mz nibr nzkrka'kr Jiszs, nigr kc tqvzpe-moukr, x tqkawipekr Nabzlwá Kidron mz nrlarde kc. X sc tqprtrpekr mz nrlanc olivi.

<sup>2</sup> Mrlcde krlz kz Judzs kc tqamwale Jiszs, murde vz-zvzkr badr Jiszs mrlcde.

<sup>3</sup> Zbz, sc tqvzmipebz Judzs kcng dzbe ncblo nzling. Kzdq dzbede lc ngi ncblo ngr vea ne Rom x kzdq kz ngi pulis ngr Mangr-nzangiongr. Ncblo lcng nzatwzlrpxngr kxnzetu rdr pris x Farzsi. Nzngxlunebzng mz dxpu x lam, x nzrtwzbzng toki r vea x dalr nzotangr.

<sup>4-5</sup> X Jiszs krlzpele da amrlx kcng nawaisr-ngrde. Zbz sc tqvzpebz badr, tqrpibezle badr kx, “?Neke tqrtangrtiamu?” Nzrpibzlr kx, “Jiszs kc Naszret.” Rpihbz Jiszs kx, “Ninge kape.”

<sup>6</sup> X mzli kcpwz, sc tzvz-teblqpeng x nidr amrlx ngrdr nzpwekaong mz drtc' mz zmatq ngr Jiszs.

<sup>7</sup> Jiszs sc tqvea-mopwz badr, rpibzle kx, “?Neke tqrtangrtiamu?” Nzrpi-mopwzlr kx, “Jiszs kc Naszret.”

<sup>8</sup> Rpihbzle kx, “Pipebo bamu kx ninge ncblo lcde. Nzmu kx tqotimamu ninge, leplz nenge lcng navztxng.”

<sup>9</sup> Krlc tqycmne-ngrde lc murde nzkrka'-krde na-atukztr-zpwxle. Krlc mz nzrpi-krde kx, “Trte, trpnzngr leplz nengeng kx mrbr.” ✧

---

✧ 18:9 Jon 17:12

10 Zbz kzdq nigr, Saemon Pita, ycbz bade kc toki r vea, yr1qzbzle mz kxanzawz ne Nardr Pris, lakitxpxbzle nradrtqde kxrtc. Kxanzawz lc drtqde Malkzs.

11 A' rpibz Jiszs mz Pita kx, "Toki r vea scm alvco mou mz bxli rde. Murde rlrpxpe-ngrne nrkrdrtrqnge nzaetq-ngrbz mz nzvz-nqblq-krde me pnz drtwr Trtenge." ☆

12 Zbz ncblo kcng tqvzmibz Judzs nzlolvzlr Jiszs x nzpebzlr mqde.

13 X sc tzvzmipe-kaipzlr mz Kxetu Anas, murde nide kzdo Kaefzs kc tqngi Nardr Pris mz yiz lcde.  
\*

14 Kaefzs nide kc tqrpi-pnzbzle mz kxanzetu r lr Jiu kx takitrde ncblo dq naesz' nabz-ngrde leplz amrlx. ☆

*Pita Rpile Kx Trkrlzleu Jiszs*

*Matiu 26:57-58, 69-70; Mak 14:53-54, 66-68; Luk 22:54-57*

15 Zbz nigr mz Saemon Pita vz-nqblqzbzkr Jiszs. Kx krlzbzkr kc ma nyz Nardr Pris, olvz kxacive naonrx kc sc tqglxpele ninge. X sc tqlvxpxpemle

---

☆ **18:11** Matiu 26:39; Mak 14:36; Luk 22:42      \* **18:13** Mzli kc Jiszs tqngini ngrde doa ncblo, Anas sc tqngi Nardr Pris. A' mz yiz kc 15 AD gzpman ngr Roman sc rtulrtr-ngrbzle mz Anas nzaprpx-lzbq-krde. X nzmcpx-almazlr kzdode Kaefzs, kc tqyrlztibzle inyx Anas, mz nztekqtr-krde nide. Mzli kcng tqalvztrngr Jiszs x tztqlvztr-ngrde mz kros, Kaefzs nide Nardr Pris. A' mz nzvz-nqblq-krde Lou sc Mosis, Anas nzmu nangi nide Nardr Pris nakrlzbzle nzbz-krde. Mz drtwr lr Jiu, Anas sc tqngibe Nardr Pris x Kaefzs mnclzbz mz zmatq ngrde. Mc kz 'Nardr Pris x Kaefzs' mz Nzalvztr-ngrng Kxmyapxbz.      ☆ **18:14** Jon 11:50

naonrx bange mz nzvztr-kz-krpo mz makoa mrkc tzyrlwrtr-ngrbz.

<sup>16</sup> X rlxiti-kzpo bade nzvztr-krm Pita. X rlr-ngrmle murde krlzti-lzbqkr ncdR Nardr Pris.

<sup>17</sup> X rpibz olvz kc tqaclve naonrx mz Pita kx, “? Ni-kzp dq ncblo nede?” Rpibz Pita kx, “Trtingr.”

<sup>18</sup> Mz nrlckxbq lc nrlc bao. X kxznawzng x pulis ngr Mangr-nzangiongr nztelvlr kc nyr, x sc tzmulqpe-ngrdr. Zbz Pita kc tqvzpe-kzpz, tzmulqpeng badr nyr.

### *Jiszs Aveatr Anas*

*Matiu 26:59-66; Mak 14:55-64; Luk 22:66-71*

<sup>19</sup> Mzli lcde Anas kc tqngi kai Nardr Pris, aveatr-ngrde Jiszs mz nzalvztr-krdeng x ncblo nedeng.

<sup>20</sup> Rpibz Jiszs bade kx, “Ycmne-zvzbo mz leplz me nzyrlwrpx-lxblrngr, x nzalvztr-krngeng amrlx twztipo mangr-nzkrka'ngr x Mangr-nzangiongr mrkcng tzyrlwrpx-lxblrngr lr Jiu. Trpnzngr mzli kx alvztr-kapq-ngrne.

<sup>21</sup> ?Memule tqvea-ngrme bange? Veatibz mz leplz kcng tzlaltqmqng bange nike pibo badr. Sa napibzlr nike pixng.”

<sup>22</sup> Kx pibz Jiszs natq lcng, kzdq pulis ngr Mangr-nzangiongr sc tqtakrpebzle nar Jiszs, tqr-pipebzle kx, “?Kxmu nzymne-ngrbz mz Narde Pris lc tqycmne-ngrn?”

<sup>23</sup> Rpibz Jiszs kx, “Nzmu kx tqpix dq da kx vz-rbr, plztxpxbz mz leplz amrlx da lcde. ?A' nzmu kx tqngi da angidr kc tqpix, nike tqtakr-ngrbzme narnge?”

24 Zbz Jiszs sc tqatwzlrpe-ngrbz Anas mz Kae-fzs kx ngi Nardr Pris, mz nzvea-krbzle bade. Mzli lc, mq Jiszs sc tzpebepz.

*Pita Pokia-mou-ngrde Kx Trkrlzleu Jiszs*

*Matiu 26:71-75; Mak 14:69-72; Luk 22:58-62*

25 Mzli kc Pita tqtutrbe-ngrde mz nyr, nzrpibz kzdung leplz bade kx, “?Da zpwx kx trnginipuu ncblo nede?” A' Pita pokia mou, rpibzle kx, “Trtingr trnipwc'u.”

26 Kzdz kxnzawz-nrbalq ne Nardr Pris, mzlede krkc tqlakipxbz Pita nradrtqde, rpibzle mz Pita kx, “Da zpwxtx nim dq kz, murde nim kc tqmcx mz nrlanc.”

27 A' Pita pokia-mopwz, rpibzle kx, “Trtx-pnzngr! Trnipwc'u la tqpiq.” X mzli kcpwz kio kc tqkya'pe kz, da kc tqwai nzpi-pnzkr Jiszs le.

*Jiszs Nzvzmibz Mz Paelzt*

*Matiu 27:1-2, 11-14; Mak 15:1-5; Luk 23:1-5*

28 Mz nibr nzymne-krdr badr Jiszs, kxnzetu r lr Jiu drtwrdr sc tqesz'tipe mz nznibq-krdr nide. X sc tzkalzpemqng badr ma nyz Kaefzs, mzli kc tqprt-z-ngrm paglxnrlc. X sc tzvzmipelr mz ma kxetu nyz Paelzt, kxetu r lr Rom. Lr Jiu trnzdwatrpwzung ma nyzde murde ma tq-batrpzle badr trnztakitr-krdru mz nzprtrngr mz nzangiongr mz Nzamyangr.

29 Mz nzmu-krde lcde, Paelzt kc tqngi Gavzna ngr Judiz, sc tqvzpxpebz badr, tqrpibezle badr kx, “?Nike atrka mrlx lc?”

30 A' nzrpi-txpwzlr kx, “Nzmu nanginide ncblo kxmrlz, trpnzngr nzaprc-krbzkrle mz mqm.”

<sup>31</sup> Rpibz Paelzt badr kx, “Vzmiamu x ayrplapx-  
amu nide mz nzvz-nqblq-krde Loukxtr scmu.” A'  
nzrpibz kxnzetu r lr Jiu kx, “Eu, a' trpnzngr scgr  
zmatq ngr nznibqngr leplz.”

<sup>32</sup> Da lc prtzm, murde na-atutrlle nzrpipxkr  
Jiszs kxnamu nzbz-krde. †

<sup>33</sup> Paelzt vztr mou ma nyzde, kqlele Jiszs x sc  
tqveapebz, rpibzle kx, “?Myx kxmule, nim king  
r lr Jiu?”

<sup>34</sup> Rpibz Jiszs kx, “?Nzvea-krme lc vzdzm mz  
drtwrm o nzpibz kzdung leplz bam?”

<sup>35</sup> Rpibz Paelzt kx, “?Mz drtwrm ninge lr Jiu?  
Lr mrnyzmqng x kxnzetu rdr pris ngrmqng,  
nzaprcmlr nim bange. ?Pim bange, nike rtrngzti-  
rbrbzme?”

<sup>36</sup> Rpibz Jiszs kx, “Trnipc'u king r nrlc ka.  
Nzmu nangininge king r nrlc, ncblo nengeng  
nzkrzlzlr nzotangr mz nzarlax-krdr ninge mz  
mq lr Jiu. A' trtingr, trnipc'u king r mrka.”

<sup>37</sup> X rpi-mopwz Paelzt kx, “?Mz nzmu-krde  
lcde, ni-zpwxm king?” Rpibz Jiszs kx, “Eu, sa  
tqmrlz nzrpi-krm ninge king. Dekc tqvz-ngrmc  
x mzke' tzmc-ngrde mz nrlc, murde naycmnetr-  
ngrne da angidr. X doa amrlx kcng tzmrlzbx  
badr da angidr sa navz-nqblq-angidrlr ninge.”

<sup>38</sup> Rpibz Paelzt kx, “?Nike tqngi da angidr?”

*Paelzt Rlrpx-ngrde Nzbzkr Jiszs  
Matiu 27:15-26; Mak 15:15; Luk 23:13-25*

---

† **18:32** Natq Jiszs mz Jon 3:14, 8:28, x 12:32-34 drtwr ngrdr kx  
nabz mz nzrtqlvztrngr nide mz kros. Krlc kxmu nznibqkr lr  
Rom leplz kx nzvz-rbrng.

Zbz Paelzt vzpx-mopwz mz lr Jiu, sc tqr-pipebzle badr kx, "Trpnzngr da kx rmctitrpo nanibqngr mrlx lc.

<sup>39</sup> A' mz nzvz-nqblq-krde nqmq krmu, mz Nzamyangr kang kqlu rlrpx-ngrbo kc ncblo kxpresin. ?Myx kxmule, suti drtwrmu nzrlrpx-krbo bamu King rmu lc?"

<sup>40</sup> Kx nzxlrbzlrle, sc tznemipelr nzrpi-krdr kx, "Trsutiu drtwrgr mrlx la. A' kx suti drtwrgr Barabas." Barabas lc tqmnc mz presin murde nide ncblo kx pna zvz da x prtr mz dzbede kc tzrpilr namaszlrpx-ngrdr gzpman ngr Rom mz nzmnc-krdr Israel.

## 19

<sup>1</sup> Mz nzmu-krde lcde, sc tqrpipebz Paelzt mz ncblo ngr vea nedeng nzvzmi-krdr Jiszs mz nzriklangr.

<sup>2</sup> X nzngrlelr kc nqvi nzku nangi kraon x nzalaobzlr mz nar Jiszs. X nzakq-kzlr nzkq kxprpol, murde kala lcde takitrde king.

<sup>3</sup> X sc tzxtrngalvztitrpelelr nide, nzyrngzobzng bade x nzrpibzlr kx, "Nim la, King r lr Jiu! Rlxtikr kx nzmnc-krm naboi!" X sc tztzpebzlr narde.

<sup>4</sup> Paelzt vzpx-mopwz mz dzbe lr Jiu kcng, sc tqrpipebzle kx, "Vzmipxmc mrlx lc bamu murde nakrlzamu kx mz drtwrnge trpnzngr da kx vz-rbrtrpz bade kx nanibq-ngrde."

<sup>5</sup> Zbz Jiszs kc tqvzpxpebz, kraon r nzku kc sc tqycobep mz narde, x sc tqkqbe-ngrde nzkq kc tqprpol. Sc tqrpipebz Paelzt badr kx, "Krlc ncblo," murde rpile nayckqti drtwrdr Jiszs.

<sup>6</sup> A' kxnzetu rdr pris x pulis ngr Mangr-nzangiongr, kx nzmclr kc nide, sc tzipipebzlzr kx, "Tqlvztr mz kros! Tqlvztr mz kros!" Murde nzkrzlzr kx trpnzngr scdr zmatq ngr nzrtqlvztr-krdr nide. Rpibz Paelzt badr kx, "Vzmiamu esz'-krmu x tqlvztramu mz kros, murde mz drtwrnge trpnzngr da vz-rbrtrpz bade."

<sup>7</sup> Nzrpibz lr Jiu kx, "Mz Loukxtr scgr takitrde nzbz-krde, murde rtultr-lzbq mz nzngini-krde Mrlx Gct."

<sup>8</sup> Kx xlr Paelzt natq lcnq, sc tqmwxlz-zlwzpe.

<sup>9</sup> Vzmitr-moule Jiszs ma nyzde. X sc tqrveape-mopwz bade, rpibzle kx, "?Myx me vzkpiz-pwxme?" A' Jiszs anabu txpwz, trayzlupwzleu natqde.

<sup>10</sup> Rpi-mopwz Paelzt bade kx, "?Trsutiu drtwrm nzymne-krmc bange? ?Trkrlzwoq kx rngiscnge zmatq mz nzrpiwx-krnge nzarlaxngr nim o nzrtqlvztrngr nim mz kros?"

<sup>11</sup> Rpibz Jiszs kx, "Trpnzngr scm zmatq ngr nzaclve-krm ninge, a' ngi txpwz kx kabz Gct bam. Mz nzmu-krde lcde, leplz kcng tzaprcbzlzr ninge bam nzetukr alwx ngrdr myaszpxle alwx ngrm."

<sup>12</sup> Kx xlrbz Paelzt natq Jiszs lcnq, sc tqrtangrpe lrpzki kx na-arlapx-ngrde nide. A' nzrpibz lr Jiu kx, "Nzmu na-arlapxq mrlx lc, trwztrpwzmeu mz King r Rom. X sa narlwa-ngrbzkzr nim bade, murde doa kx rtultr-lzbq nzngini-krde king rnzlvzole King kc Rom."

<sup>13</sup> Kx xlrbz Paelzt natq lcnq, sc tqvzmipx-mopwzle Jiszs yz x tqwxbuo mou mrkc tzipi kx doa vz-rbr o trtingr, tzipibz *Rplz Kxmnzpz'* x mz natq lr Jiu nzrpibz *Gabata*.



14 Krlc nourla ngr zbq kc tzoliqtingr Sabat. X Paelzt sc tqxtrngapebz mz lr Jiu mz nzrpi-krbzle kx, "Krlc king rmu."

15 A' sc tznemipebzlr, nzrpi-krbzlr kx, "Vzmipx x tqlvztr mz kros!" A' rpibz Paelzt kx, "?Suti drtwrmu nzrtqlvztr-krnge king rmu mz kros?" A' nzrpibz kxnzetu rdr pris kx, "Trpnzngr king rgr, a' ngi txpwz King kc etu mrkc Rom!"

16 Zbz, Paelzt sc tqmetxpebz badr, x sc tqr-pipebzle mz ncblo ngr vea nedeng kx natqlvztrlr Jiszs mz kros.

### *Jiszs Nztqlvztr Mz Kros*

*Matiu 27:45-56; Mak 15:33-41; Luk 23:44-49*

17 Mz nzmu-krde lcde, ncblo ngr vea kcng nzrkamilzmlr Jiszs Jerusalem. X sc tzrtulrtrpe-ngrbzlr nzrglq-krde kros ngrde mrkc natqlvztr-ngrdr nide. X glqbzle mz newz kc tzrpibz *Bekrlz*, murde nzobq-krde apule bekrlez. Drtqde mz natq lr Jiu *Gclgata*. \*

18 X mrlcde, sc tzaopxpebzlr lrpz scde x tztqlvztr-pele nide mz kros. X nztqlvztr-kzlr ncblo kxnztrkang nzling taplxsr nrlar Jiszs.

19 Mz nzaelwapxngr da kc tqbzng r Jiszs, Paelzt yrle kcng natq x nzatu mrkc tztqlvztr-ngrdr nide mz kros. Nzyr kx,

JISZS KC NASZRET, KING R LR JIU.

20 Nzryrngr lc nzrlwx lr Jiu kxnzkqlung, murde mrkc tqdoo-ngrm Jiszs mz kros, trycpwzu rlr Jerusalem. Nzryrngr lcde nzyr mz natq lr Jiu, mz natq lr Rom kcng tzaclveng, x mz natq lr Grik kc tzrkrizlr leplz kxnzkqlung.

\* 19:17 Mz natq lr Rom, *Bekrlz* nzrpibz *Kalvzri*.

<sup>21</sup> A' kxnzetu rdr pris drtwrdr trkabz mz Paelzt murde trnzlxngitilru Jiszs nznigini-krde king rdr. Zbz sc tzrpipebzlr mz Paelzt kx, "Trmrlzu nzyr-krm 'King r lr Jiu,' a' kxnamu nzyr-krmle se, 'Mrlx lc rpile kx nide King r lr Jiu.' "

<sup>22</sup> A' rpibz Paelzt kx, "Nike yrpep, kxnamu nzyr-krde lape."

<sup>23</sup> Mz nibr nztqlvztr-krdr Jiszs mz kros, ncblo ngr vea kcng nztwzlr lrpz sc Jiszs, x sc tzpe-salitipelr ncte pwx, murde nataplxsr-ngrdr ncte kcng. A' nzq scde kxboi yc txpwz murde esz'ti.

<sup>24</sup> X sc tzrpipep kx, "Bzq pesalitiku nzq lc, a' na-ayrletiku daes mz nzkrz-krdu neke mz nigu kx narngisc." Mz nzm-krde lc, atutrle Nzryrngrkxtr kc tqrpil kx, "Nztwzlr lrpz scnge x nzakiti-lzbq-ngrdr; x nztwz-kzlr nzq kxboi scnge nzayrletilr daes mz nzkrz-krdr doa kx narngisc."

☆

<sup>25a</sup> Da lcng nzale ncblo ngr vea kcng.

### *Jiszs X Lxede*

<sup>25b</sup> Mzli lcde, olvz kx nztu-aepztrpznz mz kros ngr Jiszs nidr seleng, lxe Jiszs, x ilede angidr, x kzdq kz iledr Mxri kc tqngi olvz r Alfizs Klopzs, x Mxri kc Makdala.

<sup>26</sup> Jiszs mcomle nztulz-krbzkr ncdl lxedc. ☆ X sc tqrpipemle mz lxedc kx, "Lxe, mrlxm lape."

<sup>27</sup> X rpio-kzple bange kx, "Lxem lape." X abzo mzli lcde, sc tqvzmipex nide mz ma nyznge.

### *Nzbzkr Jiszs*

*Matiu 27:45-56; Mak 15:33-41; Luk 23:44-49*

28 Jiszs krlzpele kx nzwz-krdeng amrlx kcng tqkabz Trtede yrkrpxpe. X mz nzatutr-krde Nzryrngrkxtr, sc tqrpipele kx, "Drtwrnge br-lxkz." ✧

29 Kx nzxlrzbz ncblo ngr vea kcng nzymnekr Jiszs, sc tzotipelr kc lrpz, nzpetrlr mz neni, nzleolr mz waen kxrks, x sc tzkalzpebzlr mz nao Jiszs.

30 Kx abztrpz Jiszs waen kc, sc tqrpipele kx, "Nzwz-krnge yrkrpxpe." X biole narde x sc tqrlrpe-ngrbzle mqngrde mz Gct mz nzbz-krde. ✧

### *Blrir Jiszs Nzlu*

31 Zbq lc zbq ngr nzoliqtingr Sabat. Zbz kxnzetu r lr Jiu sc tzrlxtipebzlr mz Paelzt nzrlr-krbzle nzrtavxi-ngrbz nanyc ncblo kcng tztqlvztr mz kros, murde nabz-aning, x nayokaeomlr mz kros mz nzyrtzmq-krdr nidr. Murde Loukxtr scgr tr-rlrpx-ngrdeu namz nzdoo-krmle mz kros nzklz-krbzle milzpq, myapxbz mz Sabat. ✧

32 Kx rlrpe-ngrbz Paelzt le, sc tzotipe ncblo ngr vea nzrtavxi-ngrbz nanycdr. Nzoti-kailr kzdq ncblo kcng tztqlvztrng badr Jiszs x nzoti-moulr kralli.

33 A' kx nzklzlbzlr Jiszs, nzmclr nzbz-krde. Dekc trnztavxipe-ngrpwzlru nanycde.

34 Kxmule-esz', a' kzdq ncblo ngr vea kcng luplxtrpzle blrir Jiszs, x mzli kcpwz yrlepzm mrlcde mepyr x lue.

---

✧ 19:28 Sam 69:21; 22:15 ✧ 19:30 Sam 31:5 ✧ 19:31 Lou Kcpwz 21:23

<sup>35</sup> Da lcnq tqyapwxtibo ngi da angidr, murde mctx-angidrx. Delc tqpi-ngrbole bamu murde nalxngiti-kzamu Jiszs Kxnmcpix.

<sup>36</sup> Trnztavxi-ngrdru nanycde murde na-atutr Nzryrngrkxtr kc tqrpilc kx, "*Trpnzngr nrivr ngr-deng kx nztavxi.*" ✧

<sup>37</sup> X kzdq kz Nzryrngrkxtr rpilc kx, "*Lepiz sa naobqlvzlvzlr ncblo kc bliride tzluplxtr.*" ✧

### *Nzyrtzmqngr Jiszs*

*Matiu 27:57-61; Mak 15:42-47; Luk 23:50-56*

<sup>38</sup> Kzdq ncblo kx lxngitile Jiszs drtqde Josip kc Arimatia. A' traelwapx-ngrdeu nzlxngiti-krde Jiszs, murde mwxlrtile kxnxetu r lr Jiu. A' ncblo lc vzbz mz Paelzt, sc tqrlxtipebzle nzkao-krmle nrkrdrdq Jiszs mz kros mz nzyrtzmq-krdele. Zbz sc tqrlrpe-ngrbz Paelzt nzkao-krmlele.

<sup>39</sup> X Nikodimzs kc mzli kc kai tqvzbz mz Jiszs mz nrlckxbq, nzvzng ncdr Josip. ✧ Nikodimzs lc twzbzle dalr nzaelungr namz ngr Jiszs, nzmrlcpu-krdr takitr kilo kxnpnu-tq (30).

<sup>40</sup> Zbz sc tzkaopemlr namz ngr Jiszs, nzaelulr da lcnq, x sc tzbxtipelr lrpz, mz nzvz-nqblq-krde nqm q krgr mz nzyrtzmq-krgr namz.

<sup>41</sup> Mrkc tztqlvztrngr Jiszs mz kros, yc kc elr nabznrpx. X yc kc elr gq kxmrna kx nayrbqpx-ngrm namz ngr leplz, a' trgalr kx yrbqpxm elr.

<sup>42</sup> X sc tzyrlqtrpelr namz ngr Jiszs mz gq lcde, x nzalqlitrpzlr kc rplz kxetu nzpqbrtr-ngrdr naonrx. Murde mzli kc milzpq Nzamyangr

---

✧ **19:36** Nzrlaszng 12:46; Nzklqu-krdr 9:12; Sam 34:20 ✧ **19:37** Sekaraea 12:10; Nzaelwapxng 1:7 ✧ **19:39** Jon 3:1-2

kc tqabzope. X mz zbq lc Lou sc Mosis tr-rlrpx-ngrdeu nzwzng, murde Sabat ngi zbq kxnzamati.

## 20

*Jiszs Tulz-mop Mz Nzbzng*

*Matiu 28:1-10; Mak 16:1-8; Luk 24:1-12*

<sup>1</sup> Mz Sade mz nourla kxtpowz, Mxri kc Makdala sc tzolapeng badr kzdu-kzng olvz mz gq kc tqyrbqng namz ngr Jiszs, mz nzaelu-krdele. Kx nzkrzbzlr mrlcde, sc tzmcpelr rplz kc etu nzalqlipxe.

<sup>2</sup> Zbz sc tqngrlrpm bagr, ncd r Saemon Pita, sc tqrpipemle bagr kx, "Namz ngr Kxetu rgu nzglqtxpxpem mz butqbr kc, a' trkrlzpekru me nzyrlq-ngrde." ✧

<sup>3</sup> Kx xlrzbzkrle sc tqngrlrpekr ncd r Pita mz gq kc.

<sup>4</sup> Nzrkalz-krmgr kxes', zbz sc tqngrlrszpe Pita x krlzpe-kaipo mz butqbr kc.

<sup>5</sup> Yrngzobo mz naonrx x tcngztrpo, a' trdwatrwxu elr. A' mcx lrpz kcng tzbxtile.

<sup>6</sup> Mz nibrnge Pita kc tqngrlr-atebz x ngrlrtr rlrz mz nabz gq kc, x mc-kzle lrpz kcng tzbxti Jiszs yrbqtxnepe.

<sup>7</sup> X mc-kzle lrpz kc tzbxti narde nzbu-esz'ngrtrpe-ngrbz mz lrpz kc-kzng.

<sup>8</sup> Zbz dwatr-kzpo. Mc-kzx lrpz kcng, a' namz ngr Jiszs tryrbqpeu. X sc tqlxngitipex kx Jiszs lupe mou mz nzbz-krde.

---

✧ 20:2 Jon 13:23

9 Kxmule-esz' a' krlzmle mzli lc trkrlz-angidrkaqr natq keng tzyro mz Nzryrngrkxtr, kx Jiszs sa nabz, a' na-atulz-mop mz nzbz-krde.

10 Mz nibrde, nigr amrlx sc tqyzlupekr mrkcng tqmnc-ngrgr.

### *Jiszs AdcpX-lzbqBz Mz Mxri Kc Makdala*

11 Mxri kc Makdala yzlu mou mz gq lr Jiszs, sc tqyrnitrepbz yz, tqtcngztrpe elr.

12 Kx tcngztrpzle kc, mcle keng enjrl li nzkqng nzkq kxprki. Wxbuom kc mrkc tqobqki nar Jiszs x wxbu kc mrkc tqobqki nanycde.

13 NzrpiBzlr bade kx, “?Mxri, nike tqyrni-ngrn?” A' rpibzle kx, “Yrni-ngrne namz ngr Kxetu rnge nzglqtxpe, a' trkrlzwxu me nzayrbq-ngrde.”

14 Zbz Mxri lxlvrpxm, x sc tqmcpele Jiszs nztu-krbzle bade. A' trglxleu nide.

15 X sc tqveapebz Jiszs bade, rpi-kzpzle kx, “?Nike tqyrni-ngrn? ?Neke tqrtangrtiq?” Rpibz Mxri bade kx, “Nzmu kx tqglqBzme namz ngr Jiszs mz kzdq nrlc, pim bange murde naotix.” Krlc tqycmne-ngrbzle lc murde rpile kx nide ncblo kx wz mz nabznrpx kc.

16 Rpi-mopwz Jiszs bade kx, “Mxri!” Mxri kx lxlvr-mopwzle kc, sc tqglx-atele Jiszs. X rpile nakaplzle nide. X mz nzbilvz-krde nide, rpibzle kx, “Raboni!” Mz natq lr Jiu Raboni drtwr ngrde Kxakrlz rnge.

17 A' rpibz Jiszs bade kx, “Bzkq maletrepe' ninge, murde trvzdzkapc' mz Trtenge. A' navz-kaipo bade murde naesotr-kzpa'mu bange. A' vzbz mz

mzlengeng mzli ka, x pibz badr kx, 'Navzdz-kaipo mz Trtenge kc tqngi kz Trtemu, nide kc tqngi Gct rnge x Gct rmu.' "

<sup>18</sup> Zbz Mxri kc Makdala sc tqvzpem bagr, x sc tqpipemle nzmc-krde Jiszs kc tqlupe mou, x pikzple bagr natqdeng.

*Jiszs Adcpx-lzbqbz Mz Kzdung Ncblo Nedeng, A' Tomas Trprtrpwzu*

*Matiu 28:16-20; Mak 16:14-18; Luk 24:36-49*

<sup>19</sup> Mz Sade lcpwz mzli kcpe milzpq, yrlwr-lxblr-ngrgr kc ma, x amqngikr naonrx ngrde, murde mwxlrtrikr kxnzetu r lr Jiu. Mzli lcde pwrkilvc-ngrgr nztupe-krm Jiszs bagr, x rpimle bagr kx, "Krka'-ngrne kx Gct na-amnc-zpwxle nimu."

<sup>20</sup> Mz nibr nzycmne-krmle bagr, sc tqaelwape-ngrmle nabzlvz r mqde x blirde. Kx mc-krleng drtwrgr elatxlzm.

<sup>21</sup> X rpi-mople bagr kx, "Rlxtix kx namnc-zpwxamu. X atwzlr-ngrne nimu mz nzryapwxtipx-krmu nrpa rnge, da kc tqwai nzatwzlr-kai-krm Trtenge ninge."

<sup>22</sup> Zbz sc tqvxupemle bagr, x rpimle kx, "Twzamu Mqngrkxtr.

<sup>23</sup> X mzli ka, krkcng tqipqamu mz alwx ngrdr, ipq kz Gct nidr, a' krkcng tripqwamuu, tripq-kzu Gct nidr." ☆

*Jiszs Adcpx-lzbq-mopwz Mz Nzprtrpe-krbz Tomas*

<sup>24</sup> Kzdz nigr kcng nzpnu-esz'-nrade-li (12), Tomas kc kzdq drtqde Lipxm, trprtrpuu bagr mzli kc tqadcp-x-lzbq-ngrm Jiszs bagr.

<sup>25</sup> Sc tqpipebzkx bade kx, “Mcpekr Kxetu Lod rgu.” A' rpim Tomas bagr kx, “Trlxngitiwxu nimu. Nzmu kx tqlxngitipexle, namcx bzmr nilz kcng mz mqde, x nratoki r mqnge narlutr-ngrbo mz bzmr nilz kcng, x mqnge namaetrle blirde.”

<sup>26</sup> Mz nibr wiki lc, yrlwr-lxblr-moukr mz ma kx naonrx ngrde nzamqngi. A' mzli lc Tomas sc tqprtrpem bagr. X pwrkilvc-ngrgr Jiszs nztupe-mou-krmle mz mzlirgr. X rpimle bagr kx, “Krka'-ngrne kx Gct na-amnc-zpwxle nimu.”

<sup>27</sup> Zbz rpibzle mz Tomas kx, “Vzm Tomas, nratoki r mqm yrlqo mrlc, x mc nabzlvz r mqnge x maetr kz blirnge, x bzkq drtwrm abrlzpem, a' lxngitipe nzlu-kr-mopwc'.”

<sup>28</sup> Ayzlu-ngrbz Tomas natqde kx, “Da zpwxtx! Lxngitipex kx nim Kxetu Lod x Gct rnge.”

<sup>29</sup> Rpibz Jiszs bade kx, “Rlxngiti-ngrn nzmc-krm ninge. A' sa nangi da kxmrlz zlvz mzli kc leplz kc-kzng nzlxngiti-kzlr ninge, kxmule-esz' trnzmclru ninge. Murde sa na-amrlz Gct Trte nidr mz nzabrtzlvz-krde nzetukr nzrlxngiti-krdr.”

### *Nzwzkr Buk Lc*

<sup>30</sup> Da kxmatq kxkqlu kx ale-kzp Jiszs bagr. A' da lcdeng tryrowxu mz buk lc.

<sup>31</sup> A' yro-ngrne krlcng, murde nalxngiti-kzamu kx Jiszs nide Kxnzmcp x Mrlx Gct. X mz nzlxngiti-krmu nide, narmcti-kzamu nzlungkxboi.

## 21

*Jiszs Adcp-x-lzbqzb Mz Ncblo Nzrlimzng*



<sup>1</sup> Mz nibrde, Jiszs adcpx-lzbq-mop bagr mz nqlvi r Dxbu Gzlili kc tzrpi-kzpz Taebirizs. Kxmu nzadcpx-lzbq-krmle bagr nide sele.

<sup>2</sup> Kzdg zbg Saemon Pita badr Tomas kc tzrpibz Lipxm, x Natziel kc mztea Kena ngr Gzlili Provins, x ninge x mzlenge Jemes, x kzdu mou nigr nzling, nigr lcng rlimz mnc-lxblrkr me esz'.

<sup>3</sup> Zbz sc tqrpipem Saemon Pita bagr kx, "Navzpex mz nzmwangr." X rpibzkr bade kx, "Nanginigu." X sc tqvzopekr badr mz bot scgr. Mwakr mz nrlckxbq lcde, a' trpnzngr nc kxes' kx mwatigr. ✧

<sup>4</sup> Zbz mzli kc naprtzpe-ngrm nepi, Jiszs sc tqtupxpebz mz nabz drta', a' trglxkru nide.

<sup>5</sup> X sc tqrpixpemle bagr kx, "?Doa lcng, trpnzngr nc kx mwatiamu?" A' rpitrpzkr kx, "Trpnzngr kxes'."

<sup>6</sup> Rpipx-mop Jiszs bagr kx, "Apoamu br scmu mz nrlar bot kxrtc, murde namwatiamu du nc." Kx apookr kc br scgr, kx vztitrpz blzmr nc le, yangrngatikr nzveclz-krmgrle. ✧

<sup>7</sup> X sc tqrpipebo mz Pita kx, "Krlc Kxetu rgu." ✧ X Saemon Pita sc tqkalzpemle lrpz scde x sc tqpe-zpwxpele, murde kalo txpwz mz nzwz-krdr. Zbz dwao mz lue, sc tqwrtrpebz mz Jiszs.

<sup>8</sup> X sc tqvectrpemgr br scgr yrbupxm mz nc, x yatrpgr mepz, murde mrkc tqdwatr-ngrmgr esotrp mepz, takitr mita kx trtqki-esz' (100).

<sup>9</sup> Kx poomgr kc mepz, mckr kc nyr ngr dzpnzng, x ycom elr kcng nc x yctr-kzpz kcng bret.

10 Sc tqrpipem Jiszs bagr kx, “Twzmamu du nc kcong tqmwati-ateamu.”

11 Zbz Saemon Pita sc tqyzlupxpe mou mz bot, tqvectrpemgr badr br kc mepz. Nc lcdeng krlzbzle trtqki-esz'-nzpnu-nzlvqn-nrade-tq (153). X kxmule-esz' nc kqlu mz nzpookr br kc esz', a' br scgr trbxngeu.

12-13 Zbz sc tqrpipem Jiszs bagr kx, “Vzmamu, mutxnamu.” Jiszs vztrpz, kalzmle bret, sc tqakipemle bagr, x wai-kzle nc kc tqbzlule. Mz nzapu-krde kc nigr, trpnzngr mz nigr kx abrle nelzde mz nzrpi-krbzle kx, “?Nim neke?” A' drtwrgr esz'ti mz nzglx-krgr kx krlc Kxetu rgr.

14 X krlc nzwrde kratq nzadcpz-lzbq-krm Jiszs bagr, mz nibr nztulz-mou-krmle mz nzbz-krde.

### *Nzycmnekr Jiszs Ncdr Pita Kxrmnr-ngrbz*

15 Mz nibr nzmu-krgr, Jiszs sc tzvznepeng mz Pita. X sc tqrpipem Jiszs bade kx, “?Saemon mrlx Jon, nzaodu-krm ninge myaszpxle mrlx lcong?” Rpibz Pita bade kx, “Eu Kxetu, krlzpeq kx mrlztix nim.” Rpibzle bade kx, “Kx tqmule lcde, aclvebz leplz nengeng kcong tzapulr nei sip.”

16 Zbz rpi-mopwz Jiszs mz nzwrde krali kx, “?Saemon mrlx Jon, da angidr nzaodu-krm ninge?” Rpibz Pita kx, “Eu Kxetu, krlzpeq kx mrlztix nim.” Rpibz Jiszs kx, “Kx tqmule lcde, mailzbz sip nengeng.”

17 X rpi-mopwz Jiszs mz nzwrde kratq kx, “?Saemon mrlx Jon, da angidr kx mrlztiq ninge?” Pita drtwrde yrnibutx, murde Jiszs nzvea-krbzle nzwrde kratq kcpe. X sc tqrpipemle kx, “Kxetu Lod, nim kx rkrlz da amrlx, x krlz-angidr-kzq kx

mrlztix nim.” Rpi-mopwz Jiszs bade kx, “Aclvebz sip nengeng.”

<sup>18-19</sup> Zbz aelwapx-ngrbz Jiszs mz Pita kxnamu na-amatqle Gct mz nzbz-krde. Sc tqrpipeline kx, “Da angidrtx lc napibo bam. Mzli kc tqngini-ngrm obla, xplrq x krlzq nzamqngitrngr nrkalom x vzq drlve ke suti drtwrm. A' mzli kc nangini-ngrm lrtzlvz, sa napebzlr leplz mqm, x navzmilr nim me trsutiu drtwrm, x sa naglapx-kzpz mqm. Kxmule-esz', a' vz-nqblqm ninge!” \*

<sup>20</sup> Pita lxlvrkimle mq sc tqmcpele ninge, kc tqvz-nqblqbo nidr. Ninge kc tqdrtr-pnzbo nrlar Jiszs mzli kc tqmu-ngrgr, tqrpi-ngrbo bade “?Kxetu, neke tqamwale nim?” ☆

<sup>21</sup> Kx mcm Pita ninge, sc tqrpipeline mz Jiszs kx, “?Kxetu, nike nzwaisrngr ncblo lc mz nzbz-krde?”

<sup>22</sup> Rpibz Jiszs bade kx, “Trngiu nzwz-krm nzmu nasuti drtwrnge kx Jon nalu nakrlzmle nyzylu-krmc. A' vz-nqblqm ninge!”

<sup>23</sup> Mz nibrde, sc tzyapwxtinepe leplz nedeng amrlx mz mzlirdr kx trpnzngr nzbz-krnge. A' trpipwzu Jiszs trnzbz-krpwc'u, a' pibzle mz Pita kx trngiu nzwz-krde nzmu nasuti drtwrde kx nalux nakrlzmle nyzylu-krmle.

### *Natq Kxrmnrngr*

<sup>24</sup> Delape. Ninge Jon, ncblo ne Jiszs kc tqrycm-netrngr da kcng x yro-kzx. X nzkrzl leplz kx nike pix ngi da angidr.

---

\* **21:18-19** Kzdung leplz nzrpilr kx, *Naglapxbz mqm* drtwr ngrde kx mzli kc nabzngr Pita, mqde naglapxbz mz nztqlvztrngr nide mz kros. ☆ **21:20** Jon 13:23, 25

<sup>25</sup> X da kq̄lu kz kx rtrngztibz Jiszs. A' nzm̄u  
nayro da lcdeng amrlx, buk ngrdr naesz'-ngrdr  
nrlc ka.

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f